

明史

一百六十一之一百七十二



總裁官總理事務 經筵講官少保兼太子太保保和殿大學士兼管吏部戶部尚書事加六級張廷玉等奉

敕修

周新 李昌祺 蕭省身 陳士啟 應履平 林碩 況鐘 朱勝

陳本深 羅以禮莫愚趙泰 彭勗 孫鼎 夏時 黃潤玉 楊瓊 王懋葉錫趙亮

劉寶 陳選 夏寅 陳壯 張昇 宋端儀

周新南海人初名志新字日新成祖常獨呼新遂為名因以志新字洪武中以諸生貢入太學授大理寺評事以善決獄稱成祖即位改監察御史敢言多所彈劾貴戚震懼目為冷面寒鐵京師中至以其名怖小兒輒皆奔匿巡按福建奏請都司衛所不得凌府州縣府衛官相見均禮武人為之戢改按北京時令吏民罪徒流者耕北京閒田監禁詳擬往復待報多瘐死新請從北京行部或巡按詳允就遣以免淹滯從之且命畿內罪人應決者許收贖帝知新所奏無不允還朝即擢雲南按察使未赴改浙江冤民繫久聞新至喜曰我得生矣至果雪之初新入境羣蚋迎馬頭跡得死人榛中身繫小木印新驗印知死者故布商密令廣市布視印文合者捕鞠之盡獲諸盜一日視事旋風吹葉墜案前葉異他樹詢左右獨一僧

寺有之寺去城遠新意僧殺人發樹果見婦人屍鞠實磔僧一商暮歸恐遇劫藏金叢祠石下歸語以其妻旦往求金不得訴於新新召商妻訊之果商妻有所私商驟歸所私尙匿妻所聞商語夜取之妻與所私皆論死其他發奸摘伏皆此類也新微服行部忤縣令令欲拷治之聞廉使且至繫之獄新從獄中詢諸囚得令貪污狀告獄吏曰我按察使也令驚謝罪劾罷之永樂十年浙西大水通政趙居任匿不以聞新奏之夏原吉爲居任解帝命覆視得蠲振如新言嘉興賊倪弘三劫旁郡黨數千人累敗官軍新督兵捕之列木柵諸港泆賊陸走追躡之桃源繫以獻當是時周廉使名聞天下錦衣衛指揮紀綱使千戶緝事浙江攬賄作威福新欲按治之遁去頃之新齎文冊入京遇千戶涿州捕繫州獄脫走訴於綱綱誣奏新罪帝怒命逮新旗校皆錦衣私人在道撈掠無完膚既至伏陛前抗聲曰陛下詔按察司行事與都察院同臣奉詔禽奸惡奈何罪臣帝愈怒命戮之臨刑大呼曰生爲直臣死當作直鬼竟殺之他日帝悔問侍臣曰周新何許人對曰南海帝嘆曰額外乃有此人枉殺之矣後帝若見人緋衣立日中曰臣周新已爲神爲陛下治奸貪吏云後紀綱以罪誅事益白妻有節操新未遇時縫紉自給及貴偶赴同官妻內讒荆布如田家婦諸婦慚盡易其衣飾新死無子妻歸貧甚廣東巡撫楊信民曰周志新當代第一人可使其夫人終日餒即時賜給之妻死浙人仕廣東者皆會葬

李昌祺名禎以字行廬陵人永樂二年進士選庶吉士預修永樂大典備書疑事人多就質擢禮部郎中遷廣西左布政使坐事謫役尋宥還洪熙元年起故官河南與右布政使蕭省身繩豪猾去貪殘疏滯舉應救災恤貧數月政化大行憂歸宣宗已命侍郎魏源代而是時河南大旱廷臣以昌祺廉潔寬厚河南民懷之請起昌祺命奪喪赴官撫恤甚至正統改元上書言三事皆報可四年致仕家居二十餘年屏跡不入公府故廬裁蔽風雨伏臘不充景泰二年卒蕭省身泰和人與昌祺同舉進士洪熙元年布政考滿當給誥命奏父年八十餘願以給父帝嘉而許之後遂爲例居河南十二年治行與昌祺等

陳士啟名雷以字行泰和人永樂二年進士選庶吉士擢禮部郎中尙書呂震險忮屬吏皆憚之承奉惟謹士啟獨不少徇十二年三月吏部言布按二司多缺官帝曰布政按察吾方岳臣方數千里地懸數人手其簡廷臣賢能者分別用之於是諸曹郎給事中出爲監司者二十餘人而士啟得山東右參政盡心吏事不爲察察名督徭賦不峻期約青州饑疏請振之粟使至而饑民倍士啟復上疏先出粟予民謂使者曰有罪吾獨任廷議竟從之坐唐賽兒亂下獄數月釋還職高煦謀不軌士啟自青州暮馳歸語二司密聞於朝高煦既執從薛祿張本錄餘黨撫安人民事竣命清理山東軍籍宣德六年卒於官應履平奉化人建文二年進士授德化知縣歷官吏部郎中出爲常德知府宣宗初擢貴州按察使所至

祛除奸蠹數論時政舊制都督府遣使於外必領內勘合下都司不敢輒下衛至是軍府擅橫使者挾關
文四馳厯諸衛駿軍伍宣德七年履平抗疏言勘合之設所以防詐僞今右軍府遣發至黔者不遵故事
小人憑勢橫求詐冒何從省宣宗善其言都督陳政引罪帝令諸司永守之軍府爲之戢山雲鎮廣西以
備蠻歲調貴州軍萬人春秋更代還多逃亡則取原衛軍以補不遂逃者履平奏貴州四境皆苗蠻軍伍
虛有急孰與戰守今衛軍逃於廣西而以在衛者補不數年貴州軍伍盡空邊釁且起帝乃命雲嚴責廣
西諸衛追還逃軍俟足用卽遣歸罷貴州戍卒雲名將鎮粵有功輕履平書生正統元年履平劾雲弄權
擅作威福帝令雲自陳雲大驚引罪帝宥之明年上書言四事一鎮遠六府自湖廣改屬貴州當食川鹽
去蜀道遠仍食淮鹽爲便一軍衛糧支於重慶舟楫不通易就輕賈多耗費請以鎮遠秋糧輸湖廣者就
近支給一停黎平諸府歲辦黃白蠟一貴州初開三司月俸止一石今糧漸充裕請增給並從之時方面
以公事行部者例不給驛履平言儻車舟必擾民請給驛便又以軍伍不足請令衛所官旂犯雜死及徒
流者俱送鎮將立功期滿還伍邊軍犯盜及土官民與官旂罪輕者入粟缺儲所贖罪並從之三年遷雲
南左布政使時麓川用兵屢奏勞績八年致仕歸

林頊字懋弘閩縣人永樂十年進士授御史出按山東宣德初按浙江爲治嚴肅就擢按察使千戶湯某

結中官裴可烈爲奸利碩將繩以法中官誣碩毀詔書被逮碩叩頭言臣前爲御史官七品今擢按察使官三品日夜淬勵思報上恩小人不便欲去臣惟陛下裁察帝動容曰朕固未之信召汝面訊耳立釋碩復其官敕實可烈碩在浙久人懷其惠正統三年誤引赦例出人死僉事耿定劾之逮訊輸贖還職其冬遷廣東布政使未及任而卒其後寧波知府鄭珞劾可烈不法可烈竟罷去

況鐘字伯律靖安人初以吏事尙書呂震奇其才薦授儀制司主事遷郎中宣德五年帝以郡守多不稱職會蘇州等九府缺皆雄劇地命部院臣舉其屬之廉能者補之鍾用尙書蹇義胡濙等薦擢知蘇州賜敕以遣之蘇州賦役繁重豪猾舞文爲奸利最號難治鍾乘傳至府初視事羣吏環立請判牒鍾佯不省左右顧問惟吏所欲行止吏大喜謂太守闔易欺越三日召詰之曰前某事宜行若止我某事宜止若強我行若輩舞文久罪當死立捶殺數人盡斥屬僚之貪虐庸懦者一府大震皆奉法鍾乃蠲煩苛立條教事不便民者立上書言之清軍御史李立勾軍暴同知張徽承風指動以酷刑抑配平人鍾疏免百六十人役止終本身者千二百四十人屬縣遺賦四年凡七百六十餘萬石鍾請量折以鈔爲部議所格然自是頗蠲減又言近奉詔募人佃官民荒田官田準民田起科無人種者除賦額崑山諸縣民以死徙從軍除籍者凡三萬三千四百餘戶所遺官田二千九百八十餘頃應減稅十四萬九千餘石其他官田沒海

者賦額猶存宜皆如詔書從事臣所領七縣秋糧二百七十七萬九千石有奇其中民糧止十五萬三千餘石而官糧乃至二百六十二萬五千餘石有畝徵至三石者輕重不均如此洪永間令出馬役於北方諸驛前後四百餘匹期三歲遣還今已三十餘歲矣馬死則補未有休時工部征三梭闊布八百匹浙江十一府止百匹而蘇州乃至七百乞敕所司處置帝悉報許當是時屢詔減蘇松重賦鍾與巡撫周忱悉心計畫奏免七十餘萬石凡忱所行善政鍾皆協力成之所積濟農倉粟歲數十萬石振荒之外以代民間雜辦及逋租其爲政纖悉周密嘗置二簿識民善惡以行勸懲又置通關勘合簿防出納奸僞置綱運簿防運夫侵盜置館夫簿防非理需求興利除害不遺餘力鋤豪強植良善民奉之若神先是中使織造採辦及購花木禽鳥者踵至郡佐以下動遭笞縛而衛所將卒時凌虐小民鍾在斂跡不敢肆雖上官及他省吏過其地者咸心憚之鍾雖起刀筆然重學校禮文儒單門寒士多見振瞻有鄒亮者獻詩於鍾鍾欲薦之或爲匿名書毀亮鍾曰是欲我速成亮名耳立奏之朝召授吏刑二部司務遷御史初鍾爲吏時吳江平思忠亦以吏起家爲吏部司務遇鍾有恩至是鍾數延見執禮甚恭且令二子給侍曰非無僕隸欲籍是報公耳思忠家素貧未嘗緣故誼有所干人兩賢之鍾嘗丁母憂郡民詣闕乞留詔起復正統六年秩滿當遷部民二萬餘人走訴巡按御史張文昌乞再任詔進正三品俸仍視府事明年十二月卒於

官吏民聚哭爲立祠鍾剛正廉潔孜孜愛民前後守蘇者莫能及鍾之後李從智朱勝相繼知蘇州咸奉
敕從事然敕書委寄不如鍾矣李從智宜賓人朱勝金華人勝廉靜精敏下不能欺嘗曰吏貪吾不多受
牒隸貪吾不行杖獄卒貪吾不繫囚由是公庭清肅民安而化之居七年超遷江南左布政使初與鍾同
薦者戶部郎中羅以禮知西安兵部郎中趙豫知松江工部郎中莫愚知常州戶部員外郎邵晏知武昌
刑部員外郎馬儀知杭州陳本深知吉安御史陳鼎知建昌何文淵知温州皆賜敕乘傳行

陳本深字有源鄞人永樂初由鄉舉入國子監授刑部主事善發奸畿內盜殺人亡匿有司繫無辜十八
人於獄本深以計獲盜十八人皆免遷員外郎與況鍾等同受敕爲知府本深知吉安吉安多豪強好訐
訟巨猾彭搏等十九人橫閭里本深遣人與相結爲具召與飲伏壯士後堂拉殺之皆曳其屍以出一府
大驚樂安大盜曾子良據大盤山衆萬餘本深設伏大破之斬子良本深爲政舉大綱不屑苛細大猾旣
殲府中無事晨起鼓而升堂吏無所白輒鼓而休間有所訟呼至榻前析曲直遣之亦不受狀有抑不伸
者雖三尺童子皆得往白久之民恥爭訟尤折節士人節治學宮奏新先儒歐陽修周必大楊邦乂胡銓
楊萬里文天祥祠廟正統六年滿九載當遷郡人乞留詔予正三品俸摩前民嫁女本深聞鼓樂聲笑曰
吾來時乳下兒也今且嫁我尙留此耶遂請老前後守吉安十八年旣去郡人肖像祀之羅以禮桂陽人

永樂十三年進士由郎中知西安府遭喪補紹興再以喪去代者不稱職部民追思乞以禮於朝詔起復視事歲滿進秩復任已移知建昌所至皆有惠愛歷三郡凡二十七年乃致仕莫愚臨桂人由鄉舉以郎中出知常州奏請減宜興歲進茶數禁公差官陵虐有司嚴核上官薦劾之實皆報可郡民陳思保年十二世業漁其父兄行劫思保在舟中有司以爲從論當斬愚疏言小兒依其父兄非爲從比令全家舟居將舉家坐耶宣宗命釋之謂廷臣曰爲守能言此可謂有仁心矣正統六年秩滿郡民乞留巡撫周忱以聞詔進一階復任與愚同時爲同知者潞城趙泰字熙和由鄉舉入國子監歷事都察院授常州同知潞孟濱得勝二河作魏村閘周忱況鍾議減蘇州重糧泰亦檢常州官田租請並減之遷工部郎中命塞東昌決河忱薦爲協同都運益勤其職亡何疾卒

彭昂字祖期永豐人七歲入佛寺不拜僧強之叱曰彼不衣冠而袒跣何拜爲永樂十三年舉進士親老乞近地以養除南雄府教授學舍後有祠數現光怪學官弟子率禱祀昂撤而焚之滿考補建寧教授副使王增有疾醫者許宗道誣諸生游亭魘魅以舍旁童五郎祠爲徵增怒寘家七人重罪下近祠居民獄四百家昂抗論游氏非巫者五郎非邪神初捐地築城人也事載郡志中增愕索圖經證之大慚悔事得解建寧朱子故宅有祠無祭昂疏請春秋祭蠲子孫徭又勸尊賢堂祀胡安國蔡沈真德秀諸生翕然

醫學正統元年以楊士奇薦召授御史時初設提學官命督南畿學校詳立教條士風大振疏言國朝祠祭職在禮官修齋起梁武帝設醮起宋徽宗宜一切除之禁立庵院罷給僧尼度牒又言真定保定山東民逃鳳陽潁州以萬計皆守令匿災暴斂所致乞厚軫恤守令課績宜以戶口增耗爲殿最又請設南京諸衛武學皆報可所至葺治先賢墳祠母憂歸以孫鼎代最起復改吏部考功郎中出爲山東副使土木之變數言兵事以直不容於時致仕歸孫鼎字宜鉉廬陵人永樂間舉人歷松江教授正統八年楊溥薦爲御史董南畿學政置本源錄錄諸生善行行部不令人知單輿猝至諸生謁輒閉門試之卽日定甲乙諸生試歸榜已揭通衢請託者無所措手通州旱饑奏蠲糧三千四百餘石英宗北狩鼎試罷謂諸生曰故事當簪花宴今臣子枕戈之秋不敢陷諸君不義設茗飲步送諸門旣而詣闕上書請隨所用效死不報末幾以親老致仕知府張瑄疏言鼎孝追曾閔學繼朱程宜起居論思之職帝不允天順元年卒於家夏時字以正錢塘人永樂十六年進士授戶科給事中洪熙元年議改鈔法時力言其擾市肆無裨國用疏留中鈔果大沮民多犯禁議竟寢帝思時言命侍皇太子祀孝陵所過爲災傷輒白太子發粟以振留署南京戶科宣德初一日三上封事稱旨命署尙寶司兼理吏禮兵刑四科視七篆無留事命覈後湖黃冊陳便宜十四事都徐濟盪臨清武清旱以時請遣官振之尋擢江西僉事正統三年奏今守令多刻刑

無辜傷和干紀乞令御史按察司官遍閱罪囚釋寃滯逮按枉法官吏從之遷參議七年奏恤民大事多讓行十二年以大臣薦超擢廣西左布政使前後所上又十餘疏雖不盡用天下壯其敢言年未七十致仕歸卒其爲僉事時進知州柯暹所撰教民條約及均徭冊式刊爲令人皆便之時爲人廉潔好義親歿廬墓有異徵歿而鄉人祀之名其祠曰孝廉

黃潤玉字孟清鄞人五歲侍母疾夜不就寢十歲道見遺金不拾永樂初徙南方富民實北京潤玉請代父行官少之對曰父去日益老兒去日益長官異其言許之十八年舉順天鄉試授建昌府學訓導父喪除改官南昌宣德中用薦擢交趾道御史出按湖廣斥兩司以下不職者至百有二十人正統初詔推舉提學官以楊士奇薦擢廣西僉事提督學政時寇起軍興有都指揮妄掠子女萬餘口潤玉劾而歸之副使李立入民死罪至數百人亦爲辨釋南丹衛處萬山中戍卒冒瘴多死爲奏徙夷曠地母憂歸起官湖廣論罷巡撫李實親故二人實憤奏潤玉不諳刑律坐謫含山知縣以年老歸歸二十年年八十有九卒學者稱南山先生

楊瓚盩厔人永樂末進士知趙城縣課績爲山西最超擢鳳陽知府正統十年大計天下羣吏始命舉治行卓異者瓚及王懋葉錫趙亮等與焉鳳陽帝鄉勛臣及諸將子孫多犯令瓚請立戶稽出入由是始遵

約束瓊言民間子弟可造者多請增廣生員毋限額禮部採瓊言考取附學天下學校之有附學生由瓊議始擢浙江右布政使與鎮守侍郎孫原貞共平陶得二之亂景泰二年瓊以湖州諸府官田賦重請均之民田賦輕者而嚴禁詭寄之弊詔與原貞督之田賦稱平久之卒官王懋修武人永樂末進士爲海鹽知縣後超擢西安知府亦有聲葉錫永嘉人宣德五年進士爲吳縣知縣舉卓異遷奸民訐於朝將逮繫吳人羣詣闕頌錫乃令視事如故抵誣者罪尋擢寧國知府而趙亮爲慶雲典史亦在舉中同被宴賚時人以爲榮秩滿擢知本縣

劉實字嘉秀安福人宣德五年舉進士居三年選庶吉士正統初授金華府通判仍歲荒旱請蠲租且贖遺饑民子女義門鄭氏族大不能自給又買馬出丁供山西郵傳困甚亦以實言獲免母喪歸廬墓三載起順天府治中景泰時侍臣薦其文學召修宋元通鑑綱目實爲人耿介意所不可雖達官貴人不稍遜然頗自是見同曹所纂不當輒大笑聲徹廷陛人亦以此忌之天順初還原任四年擢知南雄府商稅巨萬舊皆入守橐實無所私中官至南雄入譖言府僚參謁留實折辱之民競前擁之出中官慚將召謝之實不往中官去至韶州聞韶人言南雄守且訟於朝矣懼馳奏誣實毀敕大不敬逮下詔獄實從獄中上書言臣官三十年未嘗以妻子自隨食糲衣敝爲國家愛養小民不忍困之以是忤朝使帝覽書意稍解

且釋之而實竟病死實苦節自持政務紛邇未嘗廢書士大夫重其學行其歿也南雄人哀而祠之孫丙自有傳

陳選字士賢臨海人父員韜宣德五年進士爲御史出按四川黜貪獎廉雪死囚四十餘人正統末大軍征鄧茂七往撫其民釋被誣爲賊者千餘家都指揮蔣貴要所部賄都督范雄病不能治軍皆劾罷之歷廣東右參政福建右布政使廣東值黃蕭養亂後而福建亦寇盜甫息員韜所至拊循教養得士民心選自幼端慤寡言笑以聖賢自期天順四年會試第一成進士授御史巡按江西盡黜貪殘吏時人語曰前有韓雍後有陳選廣寇流入贛州奏聞不待報遣兵平之憲宗卽位嘗劾尚書馬昂侍郎吳復鴻臚卿齊政救修撰羅倫學士倪謙錢溥言雖不盡行一時憚其風采已督學南畿頒冠婚祭祀儀於學宮令諸生以時肄之作小學集註以教諸生按部常止宿學宮夜巡兩廡察諸生誦讀除試牘糊名之陋曰已不自信何以信於人成化六年遷河南副使尋改督學政立教如南畿汪直出巡都御史以下皆拜謁選獨長揖直問何官選曰提學副使直曰大於都御史耶選曰提學何可比都御史但忝人師不敢自詘辱選詞氣嚴正而諸生亦羣集署外直氣懾好語遣之久之進按察使決遣輕繫數百人重囚多所平反囹圄爲空治尙簡易獨於臧吏無所假然受賂百金以上者坐六七銀而止或問之曰奸人惜財亦惜命若盡挈

所賂以貨要人卽法撓矣。歷廣東左右布政使。肇慶大水不待報輒發粟振之。二十一年詔減省貢獻而市舶中官革。眷奏乞均徭戶六十人添辦方物。選持詔書爭帝命。與其半眷由是怒。選番人馬力麻詭稱蘇門答刺使。臣欲入貢私市。易眷利其厚。賄將許之。選立逐之。去撒馬兒罕使者。自甘肅貢獅子。將取道廣東浮海歸。云欲往滿喇加更。而以進選疏言不可許。恐遺笑外番。輕中國。帝納其言。而眷憾選甚。先是番禺知縣高瑤沒眷通番資鉅萬。選移檄獎之。且聞於朝。至是眷誣奏。選瑤朋比爲貪墨。詔遣刑部員外郎李行會巡按御史徐同愛訊之。選有所黜吏張襲。眷意其怨。選引令誣証。選襲堅不從。執襲拷掠無異。辭行同愛畏眷。竟坐選如眷奏。與瑤俱被徵。士民數萬號泣。遮留使者。辟除乃得出。至南昌病。作行阻其醫藥。竟卒。年五十八。編修張元禎爲選治喪殮之。裴聞選死哀悼。乃上書曰。臣聞口能鑠金。毀足銷骨。竊見故罪人選。抱孤忠子處羣邪之中。獨立衆憎之地。太監眷通番敗露。知縣瑤按法持之。選移文獎厲。以激貪。儒固賢監司事也。都御史宋旻及同愛怯勢。養奸致眷橫行胸臆。穢清流。勘官行頤指煨煉。竟無左証。臣本小吏。詎誤觸法。被選黜罷。實臣自取。眷意臣憾。選厚賂噉臣。臣雖胥役。敢昧素心。眷知臣不可誘。曠行等逮。臣致理拷掠。彌月。臣忍死籲天。終無異口。行等乃依傍眷語。文致其詞。劾選勘災不實。擅便發倉曲庇屬官。意圖報謝。必如所云。是毀共姜爲夏姬。詬伯夷爲莊躄也。頃年嶺外地震水溢。漂民廬舍。

屬郡交牒報災老弱引領待哺而撫按藩臬若罔聞知選獨抱隱憂食不下咽謂展轉行勘則民命垂絕所以便宜議振志在救民非有他也選故剛正不堪屈辱憤懣旬日嬰疾而殞行幸其殞身阻其醫療訖命之日密走報眷小人佞毒一至於此臣擯黜罪人秉耒田野百無所圖誠痛忠良銜屈而爲聖朝累也不報員韜父子皆持操甚潔而員韜量能容物選務克己因自號克菴遇物亦稍峻人謂員韜德性四時皆備選得其秋焉嘗割田百四十畝贍其族人暨卒族人以選子戴貧還之戴不可而止弘治初主事林沂疏雪選寃詔復官禮葬正德中追贈光祿卿諡忠愍

夏寅字正夫松江華亭人正統十三年舉進士授南京吏部主事力學爲文以宏獎稱進郎中成化元年考滿入都上言徐州旱澇民不聊生饑餒切身必爲盜賊乞特遣大臣鎮撫蠲租發廩沿途貢船丁夫不足役及老稚而所載官物僅一箱餘皆私齎乞嚴禁絕准徐濟寧軍士赴京操練然其地實南北要衝宜各設文武官鎮守訓兵屯田常使兩京聲勢聯絡倉猝可以制變章下所司行之惟不設文武官遷江西副使提督學校其教務先德行進浙江右參政處州民苦虐政走山谷寅檄招之衆皆解散久之進山東右布政使弘治初致仕歸寅清直無黨援嘗語人曰君子有三惜此生不學一可惜此日閒過二可惜此身一敗三可惜世傳爲名言

陳壯字直大其先浙江山陰人祖坐事謫戍交趾後調京衛遂家焉壯舉天順八年進士授南京御史編修章懋等建言得罪抗疏救之帝遣中官采花木復疏諫尚書陳翌請以馬豆代百官俸壯言飼馬之物不可養士大夫事乃寢壯家素窶常祿外一無所取父母歿廬墓側居喪一循古禮歷江西僉事致仕歸家居十餘年弘治中以尚書張悅薦起官福建居二年又乞致仕時倪岳爲吏部素賢之擢河南副使歲荒振饑民懷其惠僉都御史林俊謝病舉以自代未及遷而壯又乞致仕巡撫孫需奏留之又二年竟致仕去

張昺字仲明慈谿人都御史楷孫也舉成化八年進士授鉛山知縣性剛明善治獄有嫁女者及婿門而失女互以訟於官不能決昺行邑界見大樹妨稼欲伐之民言樹有神巢其巔昺不聽率衆往伐有衣冠三人拜道左昺叱之忽不見比伐樹血流出樹間昺怒手斧之卒仆其樹巢中墮二婦人言狂風吹至樓上其一卽前所嫁女也有巫能隱形淫人婦女昺執巫痛杖之無所苦已並巫失去昺馳縛以歸卽巫背鞭之立死乃盡毀諸淫祠寡婦惟一子爲虎所噬訴於昺昺與婦期五日乃齋戒祀城隍神及期二虎伏庭下昺叱曰孰傷吾民法當死無罪者去一虎起斂尾去一虎伏不動昺射殺之以昇節婦一縣稱神鉛山俗婦人夫死輒嫁有病未死先受聘供湯藥者昺欲變其俗令寡婦皆具牒受判書二木曰羞嫁者跪

之曰節不嫁者跪之民傳四妻祝誓死守舅姑給令跪蓋木下身判從之祝投後園池中死邑大旱異夢
婦人泣拜覺而識其里居姓氏往詰其狀及啟土貌如生舅哭之慟曰殺婦者吾也爲文以祭改葬焉天
遂大雨諸異政多類此擢南京御史弘治元年七月偕同官上言邇臺諫交章論事矣而屬蹕糾儀者不
免錦衣捶楚之辱是言路將塞之漸也經筵既舉矣而封章累進卒不能回寒暑停免之說是聖學將怠
之漸也內侍雖斥梁芳而賜祭仍及便辟是復啟寵倖之漸也外戚雖罪萬喜而莊田又賜皇親是驕縱
姻婭之漸也左道雖斥而符書尙揭於宮禁番僧旋復於京師是異端復興之漸也傳奉雖革而千戶復
除張質通政不去張苗是傳奉復啟之漸也織造停矣仍聞有蟒衣牛斗之織淫巧其漸作乎寶石廢矣
又聞有戚里不時之賜珍玩其漸崇乎詩云靡不有初鮮克有終願陛下以爲戒帝嘉納之先是壽以雷
震孝陵柏樹與同官劾大學士劉吉等十餘人給事中周紘亦與同官劾吉吉銜之其冬壽紘奉命閱軍
軍多缺伍兩人欲劾奏守備中官蔣琮琮先事劾兩人章下內閣吉修隙擬黜之外尙書王恕抗章曰不
治失伍之罪而罪執法之臣何以服天下再疏爭言官亦論救乃調壽南京通政司經歷紘南京光祿寺
署丞久之曷用薦遷四川僉事富豪殺人屢以賄免御史檄曷治果得其情尋進副使守備中官某將進
術士周慧於朝曷禽慧論徙之極邊歲餘引疾歸環堵蕭然擁經史自娛都御史王璟以振荒至餽曷百

金堅摺不得受下戶饑民粟以答其意知縣丁洪晏令鉛山所取士也旦夕候起居爲具蔬食壽曰吾誠不自給奈何以此煩令君卒弗受炊烟屢絕處之澹如及卒含斂不具洪爲經紀其喪

宋端儀字孔時莆田人成化十七年進士官禮部主事雲南缺提學官部議屬端儀吏先期洩之端儀曰啟事未登已喧衆口人其謂我干乞乎力辭之已進主客員外郎貢使以贄見悉却不納初在國學爲祭酒邱濬所知及濬柄政未嘗一造其門廣東提學缺部以端儀名上濬竟沮之濬卒始以按察僉事督廣東學校卒官端儀慨建文朝忠臣湮沒乃搜輯遺事爲革除錄建文忠臣之有錄自端儀始也

贊曰明初重監司守牧之任尙書有出爲布政使而侍郎爲參政者監司之入爲卿貳者比比也守牧稱職增秩或至二品天順而後巡撫之寄專而監司守牧不得自展布重內輕外之勢成矣夫賦政於外於民最親李昌祺陳本深之屬靜以愛民況鍾張昺能於其職所謂承宣德化爲天子分憂者非耶周新陳選寃死爲可哀讀張褻書又以見公正之服人者至而直道之終不泯也

明史卷一百六十一終

總裁官總理事務 經筵講官少保兼太子太保保和殿大學士兼管吏部戶部尚書事加六級張廷玉等奉

敕修

尹昌隆

耿通 陳壽

戴綸 林長懋

陳祚 郭循

劉球 子鉞舒

陳鑑 何觀

鍾同 孟珙

章綸 子元應

廖莊

倪敬 盛景等

楊瑄 子源

尹昌隆字彥謙泰和人洪武中進士及第授修撰改監察御史惠帝初卽位視朝晏昌隆疏諫曰高皇帝

雞鳴而起昧爽而朝未日出而臨百官故能庶績咸熙天下乂安陛下嗣守大業宜追繩祖武兢兢業業

憂勤萬幾今乃卽於晏安日上數刻猶未臨朝羣臣宿衛疲於伺候曠職廢業上下懈弛播之天下傳之

四裔非社稷福也帝曰昌隆言切直禮部其宣示天下使知朕過未幾以地震上言謫福寧知縣燕兵既

逼昌隆以北來奏章動引周公輔成王爲詞勸帝罷兵許王入朝設有蹉跌便舉位讓之若沈吟不斷進

退失據將求爲丹徒布衣且不可得成祖入京師昌隆名在奸臣中以前奏貸死命傅世子於北平永樂

二年册世子爲皇太子擢昌隆左春坊左中允隨事匡諫太子甚重之解縉之黜同日改昌隆禮部主事

尚書呂震方用事性刻忮當其獨處精思以手指刮眉尾則必有密謀深計官屬相戒無敢白事者昌隆

前白事震怒不應移時又白之震愈怒拂衣起昌隆退白太子取旨行之震大怒奏昌隆假托宮僚陰欲樹結潛蓄無君心逮下獄尋遇赦復官父憂起復謁震震溫言接之入理前奏復下錦衣衛獄籍其家帝凡巡幸下詔獄者率輿以從謂之隨駕重囚昌隆與焉後數年谷王謀反事發以王前奏昌隆爲長史坐以同謀詔公卿雜問昌隆辯不已震折之獄具置極刑死夷其族後震病且死號呼尹相言見昌隆守欲殺之云

耿通齊東人洪武中舉於鄉授襄陽教授承樂初擢刑科給事中歷左右給事剛直敢言嘗劾都御史陳瑛御史袁綱覃珩朋比爲蒙蔽構陷無辜綱珩已下獄瑛長官不宜獨宥又言驍騎諸衛倉壞工部侍郎陳壽不預修糧至無所受多損耗病民工部尙書宋禮不卹下匠役滿不卽遣歸多至失所瑛等皆被鐫責當是時給事中敢言者通與陳諤舉朝憚其風采久之擢大理寺右丞帝北巡太子監國漢王高煦謀奪嫡陰結帝左右爲讒間宮僚多得罪者監國所行事率多更置通從容諫帝太子事無大過誤可無更也數言之帝不悅十年秋有言通受請託故出人罪者帝震怒命都察院會文武大臣鞫之午門曰必殺通無赦羣臣如有當通罪斬帝曰失出細故耳通爲東宮關說壞祖法離間我父子不可恕其置之極刑廷臣不敢爭竟論姦黨磔死陳諤字克忠番禺人承樂中以鄉舉入太學授刑科給事中遇事剛果彈劾

無所避每奏事大聲如鐘帝令餓之數日奏對如故曰是天性也每見呼爲大聲秀才嘗言事忤旨命坎瘞奉天門露其首七日不死赦出還職已復忤旨罰修象房貧不能僱役躬自操作適駕至問爲誰謁卽劄前具道所以帝憐之命復官歷任順天府尹政尙嚴鷲執政忌之出爲湖廣按察使改山西坐事落職仁宗卽位遇赦當還故官帝以謁前在湖廣頗撫楚王細故謫海鹽知縣遷荆王長史爲王府所厭苦宣德三年遷鎮江同知致仕歸卒

戴綸高密人永樂中自昌邑訓導擢禮科給事中與編修林長懋俱侍皇太孫說書歷中允諭德仁宗卽位太孫爲太子遷洗馬仍侍講讀始成祖命太孫習武事太孫亦雅好之時出騎射綸與長懋以太孫春秋方富不宜荒學問而事游畋時時進諫綸又具疏爲帝言之他日太孫侍帝問宮臣相得者誰也太孫以綸對因出綸奏付之太孫由此怨綸長懋者莆田人以鄉薦歷青州教授擢編修仁宗初進中允爲人剛嚴累進直言與綸善宣宗卽位加恩宮僚擢綸兵部侍郎頃之復以諫獵忤旨命參贊交趾軍務而長懋自南京來後至亦出爲鬱林知州無何坐怨望並逮至京下錦衣衛獄帝臨鞫之綸抗辯觸帝怒立錐死籍其家諸父河南知府賢太僕寺卿希文皆被繫而長懋在獄十年英宗立乃得釋復其官還守鬱林有惠政其卒也州人立廟祀之

陳祚字永錫吳人永樂中進士擢河南參議十五年與布政使周文燾王文振合疏言建都北京非便並
謫均州太和山佃戶躬耕力作處之晏然仁宗立詔選用遷謫諸臣祚在選中會帝崩不果用宣德二年
命憲臣卽均州羣試之祚策第一試吏部復第一遂擢御史巡按福建方面大吏多被彈擊禁止和買閩
人德之還奏白塔河上通邵伯湖下注大江蘇松舟楫多從往來淺狹湮塞請開濬從之轉漕果便尋出
按江西時天下承平帝頗事遊獵玩好祚馳疏勸勤聖學其略曰帝王之學先明理明理在讀書陛下雖
有聖德而經筵未甚興舉講學未有程度聖賢精微古今治亂豈能周知洞晰真德秀大學衍義一書聖
賢格言無不畢載願於聽政之暇命儒臣講說非有大故無得間斷使知古今若何而治政事若何而得
必能開廣聰明增光德業而邪佞之以奇巧蕩聖心者自見疎遠天下人民受福無窮矣帝見疏大怒曰
豎儒謂朕未讀大學耶薄朕至此不可不誅學士陳循頓首曰俗士處遠不知上無書不讀也帝意稍解
下祚獄逮其家人十餘口隔別禁繫者五年其父竟瘐死其時刑部主事郭循諫拓西內皇城修離宮逮
入面詰之循抗辯不屈亦下獄英宗立祚與循皆得釋復官祚再按湖廣以奏遼王貴烺罪有所隱與巡
撫侍郎吳政逮至京下獄尋赦出時王振用事法務嚴峻祚上言乃者法司論獄多違定律如侍郎吳璽
誤舉主事吳軌宜坐貢舉非其人律乃坐以奏事有規避律斬及軌自經死獄官獄卒罪應遞減乃援不

應爲重罪概杖之一事如此餘可推矣天時不順災沴數見未必非此帝是之以其章求法司尋改南京

墨面甚安獨重里人邢量量博學士隱於卜傲屋數椽或竟日不舉火祚數挾册就質疑往往至暮郭循字循初書

陵人居官有才譽也中以尙書魏源薦擢廣東參政有剽寇功景泰初卒

劉球字廷振安福人永樂十九年進士家居讀書十年從學者甚眾受主事胡濙薦侍經筵與修宣

宗寶錄改翰林侍講從弟珙知莆田遣一夏布球封還貽書戒之正統六年帝以王振言大舉征麓川球

上疏曰帝王之馭四裔必有其小而防其大以適緩急之宜爲天下久安計也周伐崇不克退修德教以

待其降至於癡狃則命南仲城朔方以備之漢征南越不利卽罷兵賜書通好至於匈奴雖已和親猶羸

民徙居塞下入粟實邊復命魏尙守雲中拒之今麓川殘寇思任發素本羈屬以邊將失馭致勤大兵雖

渠魁未殲亦多戮羣醜爲誅爲舍無繫輕重璽書原其罪釁使得自新甚盛德也邊將不達聖意復議大

舉欲屯十二萬衆於雲南以趣其降不降則攻之不慮王師不可輕出蠻性不可驟馴地險不可用衆客

兵不可久淹況南方水旱相仍軍民交困若復動衆紛擾爲憂臣竊謂宜緩天誅如周漢之於崇越也至

於瓦剌終爲邊患及其末卽騷動正宜以時防禦迺欲移甘肅守將以事南征卒然有警何以爲禦臣竊

於瓦剌終爲邊患及其末卽騷動正宜以時防禦迺欲移甘肅守將以事南征卒然有警何以爲禦臣竊

於瓦剌終爲邊患及其末卽騷動正宜以時防禦迺欲移甘肅守將以事南征卒然有警何以爲禦臣竊

以爲宜慎防遏如周漢之於獫狁匈奴也伏望陛下罷大舉之議推選智謀將帥輔以才識大臣量調官軍分屯金齒諸要害結木邦諸蠻以爲援乘間進攻因便撫諭寇自可服至於西北障塞當敕邊臣巡視濬築溝垣增繕城堡勤訓練嚴守望以防不虞有備無患之道也章下兵部謂南征已有成命不用球言八年五月雷震奉天殿球應詔上言所宜先者十事其略曰古聖王不作無益故心正而天不違之臣願皇上勤御經筵數進儒臣講求至道務使學問功至理欲判然則聖心正而天心自順夫政由己出則權不下移太祖太宗日視三朝時召大臣於便殿裁決庶政權歸總於上皇上臨御九年事體日熟願守二聖成規復親決故事使權歸於一古之擇大臣者必詢諸左右大夫國人及其有犯雖至大辟亦不加刑第賜之死今用大臣未嘗皆出公論及有小失輒極桎鑿楚之然未幾時又復其職甚非所以待大臣也自今擇任大臣宜允愜衆論小犯則置之果不可容下法司定罪使自爲計勿輒繫庶不乖共天職之意今之太常卽古之秩宗必得清慎習禮之臣然後可交神明今卿貳皆缺宜選擇儒臣使領其職古者省方巡狩所以察吏得失問民疾苦兩漢唐宋盛時數遣使巡行郡縣洪永間亦嘗行之今久不舉故吏多貪虐民不聊生而軍衛尤甚宜擇公明廉幹之臣分行天下古人君不親刑獄必付理官蓋恐徇喜怒而有所輕重也邇法司所上獄多奉敕增減輕重法司不能執奏及訊他囚又觀望以爲輕重民用多寃宜

使各舉其職至運磚輸米諸例均非古法尤宜罷之春秋營築悉書戒勞民也京師興作五六年矣曰不煩民而役軍軍獨非國家赤子乎況營作多完宜罷工以蘇其力各處水旱有司旣不振救請減租稅或亦徒事虛文宜令戶部以時振濟量加減免使不致失業麓川連年用兵死者十七八軍費餉賞不可勝計今又遣蔣貴遠征緬甸責獻思任發果禽以歸不過臬諸通衢而已緬將挾以爲功必求與木邦共分其地不與則致怒與之則兩蠻坐大是滅一麓川生二麓川也設有蹉跎兵事無已臣見皇上每錄重囚多有令從軍仁心若此今欲生得一失地之竄寇而驅數萬無罪之衆以就死地豈不有乖於好生之仁哉況思機發已嘗遣人來貢非無悔過乞免之意若敕緬斬任發首來獻仍敕思機發盡削四境之地分於各寨新附之蠻則一方可寧矣迤北貢使日增包藏禍心誠爲難測宜分遣給事御史閱視京邊官軍及時訓練勿使借工各廠服役私家公武舉之選以求良將定召募之法以來武勇廣屯田公鹽法以厚儲蓄庶武備無缺而外患有防疏入下廷議言球所奏惟擇太常官宜從令吏部推舉修撰董璘遂乞改官太常奉享祀事初球言麓川事振固已銜之欽天監正彭德清者球鄉人也素爲振腹心凡天文有變皆匿不奏倚振勢爲姦公卿多趨謁球絕不與通德清恨之遂摘疏中攬權語謂振曰此指公耳振益大怒會璘疏上振遂指球同謀並逮下詔獄屬指揮馬順殺球順深夜攜一小校持刀至球所球方臥起立

大呼太祖太宗頸斷體猶植遂支解之瘞獄戶下璘從旁竊血裙遺球家後其子鉞求得一臂裹裙以殮順有子病久忽起掉順髮拳且蹴之曰老賊令爾他日禍逾我我劉球也順驚悸俄而子死小校亦死璘字德文高郵人有孝行獄解遂歸不復出球死數年瓦刺果入寇英宗北狩振被殺朝士立擊順斃之而德清自土木遁還下獄論斬尋庾死詔戮其屍景帝憐球忠贈翰林學士諡忠愍立祠於鄉球二子長鉞次鈺皆篤學躬耕養母球既得卹兄弟乃出應舉先後成進士鉞廣東參政鈺雲南按察使

陳鑑字貞明高安人宣德二年進士授行人正統中擢御史出按順天言京師風俗澆漓其故有五一事佛過甚二營喪破家三服食靡麗四優倡爲蠹五博塞成風章下禮部格不行改按貴州時麓川酋思任發子思機發遁孟養屢上書求宥罪通貢不許復大舉遠征兵連不解雲貴軍民疲敝苗乘機煽動閩浙間盜賊大起舉朝皆知其不可懲劉球禍無敢諫者十四年正月鑑抗疏言賊酋遠遁不爲邊患宜專責雲南守臣相機勦滅無遠勞禁旅王振怒欲困之改鑑雲南參議使赴騰衝招賊已復據鑑爲巡按時嘗請改四川播州宣慰司隸貴州爲鑑罪令兵部劾之論死繫獄景帝嗣位乃得赦尋授河南參議致仕歸卒自正統中劉球以忤王振寃死鑑繼下獄中外莫敢言事數年至景帝時言路始開爭發憤上書有
何觀者復以言得罪去觀以善書爲中書舍人景泰二年劾尙書王直輩正統時阿附權奸不宜在左右

中貴見權奸語以爲侵己激帝怒下科道參議吏科毛玉主奏稿力詆觀林臨葉盛持之乃刪削奏上會御史疏亦上中有觀考滿不遷私憾吏部語帝怒下觀詔獄杖之謫九溪衛經歷

鍾同字世京吉安永豐人父復宣德中進士及第歷官修撰與劉球書球上封事紆與俱復妻勸止之球請復邸邀偕行復已他往妻從屏問詈曰汝自上疏何累他人爲球出歎曰彼乃謀及婦人遂獨上奏竟死居無何復亦病死妻深悔之每哭輒曰早知爾曷若與劉君偕死同幼聞母言卽感奮思成父志嘗入吉安忠節祠見所祀歐陽修楊邦乂諸人歎曰死不入此非夫也景泰二年舉進士明年授御史懷獻太子旣薨中外望復沂王於東宮同與郎中章綸早朝語及沂王皆泣下因與約疏請復儲五年五月同因上疏論時政遂及復儲事其略曰近得賊諜言也先使偵京師及臨清虛實期初秋大舉深入直下河南臣聞之不勝寒心而廟堂大臣皆恬不介意昔秦伐趙諸侯自若孔子順獨憂之人皆以爲狂臣今者之言何以異此臣草茅時聞寺人構惡戕戮直臣劉球遂致廷臣箝口假使當時犯顏有人必能諫止上皇之行何至有蒙塵之禍陛下赫然中興鋤奸黨旌忠直命六師禦敵於郊不戰而三軍之氣自倍臣謂陛下方且鞭撻四裔坐致太平奈何邊氛甫息瘡痍未復而侈心遽生失天下望伏願取鑒前車厚自審厲毋徇貨色毋甘嬉遊親庶政以總威權敦倫理以厚風俗辨邪正以專委任嚴賞罰以彰善惡崇風憲以

正紀綱去浮費罷冗員禁僧道之蠹民擇賢將以訓士然後親率羣臣謝過郊廟如成湯之六事自責唐
太宗之十漸卽改庶幾天意可回國勢可振又言父有天下固當傳之於子乃者太子薨逝足知天命有
在臣竊以爲上皇之子卽陛下之子沂王天資厚重足令宗社有託伏望擴天地之量敦友子之仁蠲吉
具儀建復儲位實祖宗無疆之休又言陛下命將帥各陳方略經旬踰時互相委責及石亨柳溥有言又
不過庸人孺子之計平時尙爾一旦有急將何策制之夫禦敵之方莫先用賢陛下求賢若渴而大臣之
排抑尤甚所舉者率多親舊富厚之家卽長材屈抑執肯爲言朝臣欺謾若此臣所以撫膺流涕爲今日
妨賢病國者醜也疏入帝不懌下廷臣集議寧陽侯陳懋吏部尙書王直等請帝納其言因引罪求罷帝
慰留之越數日章綸亦疏言復儲事遂並下詔獄明年八月大理少卿廖莊亦以言沂王事子杖左右言
事由同倡帝乃封巨梃就獄中杖之同竟死時年三十二同之上疏也策馬出馬伏地不肯起同叱曰吾
不畏死爾奚爲者馬猶盤辟再四乃行同死馬長號數聲亦死英宗復位贈同大理左寺丞錄其子啟爲
國子生尋授咸寧知縣啟請父遺骸歸葬詔給舟車路費成化中授次子越邁政知事給同妻羅氏月廩
尋賜同諡恭愍從祀忠節祠與球聯位竟如同初志方同下獄時有禮部郎孟玘者亦疏言復儲事帝不
罪而進士楊集上書于謙曰奸人黃瑛獻議易儲不過爲逃死計耳公等遽成之公國家柱石獨不思所

以善後乎今同等又下獄矣脫諸人死杖下而公等坐享崇高如清議何嫌以書示王文文曰書生不知忌諱要爲有膽當進一官處之乃以集知安州玳閣人集常熟人也

章綸字大經樂清人正統四年進士授南京禮部主事景泰初召爲儀制郎中綸見國家多故每慷慨論事嘗上太平十六策反覆萬餘言也先既議和請力圖修攘以待其變中官興安請帝建大隆福寺成將臨幸綸具疏諫河東鹽運判官濟南楊浩除官未行亦上章諫帝卽罷幸浩後累官副都御史巡撫延綏綸又因災異請求致變之由語頗切至五年五月鍾同上奏請復儲越二日綸亦抗疏陳修德弭災十四事其大者謂內官不可干外政佞臣不可假事權後宮不可盛聲色凡陰盛之屬請悉禁罷又言孝弟者百行之本願退朝後朝謁兩宮皇太后修問安視膳之儀上皇君臨天下十有四年是天下之父也陛下親受冊封是上皇之臣也陛下與上皇雖殊形體實同一人伏讀奉迎還宮之詔曰禮惟加而無替義以卑而奉尊望陛下允蹈斯言或朔望或節旦率羣臣朝見延和門以展友于之情實天下之至願也更請復汪后於中宮正天下之母儀還沂王之儲位定天下之大本如此則和氣充溢災沴自弭疏入帝大怒時日已暝宮門閉乃傳旨自門隙中出立執綸及鍾同下詔獄榜掠慘酷逼引主使及交通南宮狀瀕死無一語會大風揚沙晝晦獄得稍緩令錮之明年杖廖莊闕下因封杖就獄中杖綸同各百同竟死綸長

繫如故英宗復位郭登言綸與廖莊林聰左鼎倪敬等皆直言忤時宜加旌擢帝乃立釋綸命內侍檢前疏不得內侍從旁誦數語帝嗟歎再三擢禮部右侍郎綸既以大節爲帝所重而性亢直不能諧俗石亨貴倖招公卿飲綸辭不往又數與尙書楊善論事不合亨善共短綸乃調南京禮部就改吏部憲宗卽位有司以遺詔請大婚綸言山陵尙新元朔未改百日從吉心竄自安陛下踐阼之初當以孝治天下三綱五常實原於此乞俟來春舉行議雖不從天下咸重其言成化元年兩淮饑奏救荒四事皆報可四年秋子元應以冒籍舉京闈給事中朱清御史楊智等因劾綸命侍郎葉盛勘之明年綸及僉都御史高明考察庶官兩人議不協疏旣上綸復獨奏給事中王讓不赴考察且言明剛愎自用己言多不見從乞與明俱罷章並下盛等於是讓及下考諸臣連章劾綸綸亦屢疏求罷帝不聽旣而盛等勘上元應實冒籍帝宥綸而所奏他事亦悉不問未幾復轉禮部温州知府范奎被論調官綸言温州臣鄉郡奎大得民心解官之日士民三萬人哭泣攀轅留十八日乃得去請還之以慰民望章下所司竟報寢綸性慤好直言不爲當事者所喜爲侍郎二十年不得遷請老去久之卒居數年其妻張氏上其奏稿且乞恩帝嘉歎贈南京禮部尙書諡恭毅官一子鴻臚典簿元應後舉進士爲南京給事中偕同官論陳鉞罪忤旨停俸孝宗嗣位上治本五事仕終廣東布政使

廖莊字安止吉水人宣德五年進士八年改庶吉士與知縣孔友諒等七人歷事六科英宗初授刑科給事中正統二年御史元亮請如詔書蠲邊軍侵沒糧餉不允按察使龔鏗亦請如詔書宥盜犯之未獲者法司亦寢不行莊以詔書當信上章爭之五年詔京官出修荒政兼徵民逋莊慮使者督趣困民請寬災傷州縣俟秋成從之振荒陝西全活甚眾還奏寬卹九事多議行楊士奇家人犯法偕同官論列或曰獨不爲楊公地乎曰正所以爲楊公也八年命與御史張驥同署大理寺事踰月授左寺丞十一年遷南京大理少卿踰二年奸人陳秩者與所親賈福爭襲指揮職南京刑部侍郎齊韶納珠賄欲奪福官與之爲莊所駁韶捶福至死被逮秩亦誣莊俱徵下詔獄會韶他罪並發棄市莊乃得釋景泰五年七月上疏曰臣曩在朝見上皇遣使冊封陛下每遇慶節必令羣臣朝謁東廡恩禮隆洽羣臣皆感歎謂上皇兄弟友愛如此今陛下奉天下以事上皇願時時朝見南宮或講明家法或商略治道歲時令節俾羣臣朝見以慰上皇之心則祖宗在天之神安天地之心亦安矣太子者天下之本上皇之子陛下之猶子也宜令親儒臣習書策以待皇嗣之生使天下臣民曉然知陛下有公天下之心豈不美歟蓋天下者太祖太宗之天下仁宗宣宗繼體守成者此天下也上皇北征亦爲此天下也今陛下撫而有之宜念祖宗創業之艱難思所以係屬天下之心卽再災召祥之道莫過於此疏入不報明年莊以母喪赴京關給勘合詣東

角門朝見帝憶莊前疏命廷杖八十謫定羌驛丞天順初召還時母喪未終復遭父喪特予祭葬命起復仍官南京天順五年就擢禮部右侍郎改刑部成化初召爲刑部左侍郎逾年卒贈尙書諡恭敏莊性剛喜面折人過而實坦懷無芥蒂不屑細謹好存謝賓客爲歡狎旣官法司或勸稍屏謝往來違嫌疑莊笑曰昔人有言臣門如市臣心如水吾無媿吾心而已卒之日無以爲斂衆哀錢助其喪初景帝時英宗在南宮左右爲離間及懷憲太子薨羣小恐沂王復立讒搆愈甚故鍾同章綸與莊相繼力言皆得罪然帝頗感悟六年七月辛巳刑科給事中徐正請問言事亟召入乃言上皇臨御歲久沂王嘗位儲副天下臣民仰戴宜遷置所封之地以絕人望別選親王子育之宮中帝驚愕大怒立叱出之欲正其罪慮駭衆乃命謫遠任而帝怒未解已復得其淫穢事謫戍鐵嶺衛蓋帝雖怒同等所言過激而小人之言亦未遽聽也迨英宗復辟于謙王文以謀立外藩誅死其事遂不白云

倪敬字汝敬無錫人正統十三年進士擢御史景泰初畿輔饑命出視請蠲田租戶部持不可再疏爭竟得請巡按山西時有入粟補官令敬奏罷之戍將侵餉者悉按治豪猾斂迹再按福建時議將復銀冶敬未行抗疏論得寢旣至奏罷諸司器物濫取於民者鎮守內臣戴細保貪橫敬列其罪以聞帝召細保還命敬捕治其黨吏民相慶代還留家四月逮治尋復職六年七月以時多災異偕同官吳江盛景江陰杜

有蕪湖黃讓安福羅俊固始汪清上言府庫之財不宜無故而予遊觀之事不宜非時而行曩以齋僧屢出帑金易米不知櫛風沐雨之邊卒趨事急公之貧民又何以濟之近聞造龍舟作燕室營繕日增嬉遊不少非所以養聖躬也章綸鍾同直言見忤幽錮踰年非所以昭聖德也願罷桑門之供輟宴佚之娛止興作之役寬直臣之囚帝得疏不懌下之禮部部臣稱其忠愛帝報聞然意終不釋未幾詔都御史蕭維禎考察其屬諭令去之御史罷黜者十六人而敬等預焉皆謫爲典史敬得廣西宜山英宗復辟詔皆授知縣乃以敬知祥符安遠侯柳溥器敬西征請以自隨改都信府都事踰年師還卒士類惜之盛景等五人皆進士景雋爽負氣嘗按廣東劾巡撫侍郎揭稽不職稽坐左遷景後爲羅江知縣擢敘州知府並有禦寇功杜宥爲英德知縣鄰境多寇創立縣城嘗被圍糧盡宥死守不下夜縋死士焚其營賊始驚潰移韶州通判謝病歸黃讓知安岳遷中府都事以撻錦衣衛隸爲門達所譖戍廣西赦還復冠帶貧甚課耕自給羅俊嘗巡按四川有廉聲仕終南雄知府

楊瑄字廷獻豐城人景泰五年進士授御史剛直尙氣節景帝不豫廷臣請立東宮帝不允瑄與同官錢鏐樊英等約疏爭會奪門事起乃已天順初印馬畿內至河間民訴曹吉祥石亨奪其田瑄以聞並列二人怙寵專權狀帝語大學士李賢徐有貞曰眞御史也遂遣官按覈而命吏部識瑄名將擢用吉祥聞之

懼訴於帝請罪之不許未幾亨西征還適彗星見十三道掌道御史張鵬盛暉周斌費廣張寬王鑑趙文博彭烈張奎李人儀邵銅鄭冕陶復及御史劉泰魏翰康驥將劾亨吉祥諸違法事先一日給事中王鉉洩於亨亨與吉祥泣訴帝誣鵬等爲己誅內官張永從子結黨排陷欲爲永報讐明日疏入帝大怒收鵬及瑄御文華殿悉召諸御史擲彈章俾自讀斌且讀且對神色自若至冒功濫職帝詰之曰彼帥將士迎駕朝廷論功行賞何云冒濫斌曰當時迎駕止數百人光祿賜酒饌名數具在今超遷至數千人非冒濫而何帝默然竟下瑄鵬及諸御史於獄榜掠備至詰主使者瑄等無所引乃坐都御史耿九疇羅綺主謀亦下獄論瑄鵬死餘遣戍亨等復譖諸言官帝諭吏部給事御史年踰三十者留之餘悉調外尙書王翱列上給事中何玘等十三人御史吳禎等二十三人詔以玘等爲州判官禎等爲知縣會大風震雷拔木發屋須臾大雨雹亨吉祥家大木俱折二人亦懼掌欽天監禮部侍郎湯序本亨黨亦言上天示警宜恤刑獄於是帝感悟戍瑄鵬鐵嶺衛餘貶知縣秦翰驥三人復職而玘禎等亦得無調瑄鵬行半道適承天門災肆赦放還或謂當請亨吉祥謝二人卒不往復謫戍南丹憲宗卽位並還故官瑄尋遷浙江副使按行海道禁將校私縱戍卒修捍海塘築海鹽堤岸二千三百丈民得莫居爲副使十餘年政績卓然進按察使西湖水舊可溉諸縣田四十六萬頃時堰塞過半瑄請浚之設防置牐以利灌溉功未就卒海鹽人

祠祀之子源字本清幼習天文授五官監候正德元年劉瑾等亂政源上言自八月初大角及心宿中星動搖不止大角天王之坐心宿中星天王正位也俱宜安靜今乃動搖其占曰人主不安國有憂意者陛下輕舉逸遊弋獵無度以致然也又北斗第二第三第四星明不如常第二曰天璇后妃之象后妃不得其寵則不明廣營宮室妄鑿山陵則不明第三曰天機不愛百姓驟興征徭則不明第四曰天權號令不當則不明伏願陛下祇畏天戒安居深宮絕嬉戲禁遊畋罷騎射停工作申嚴號令毋輕出入抑遠寵傳裁節賜予親元老大臣日事講習克修厥德以弭災變疏下禮部尙書張昇等稱源忠愛報聞迨十月暹霧時作源言此衆邪之氣陰冒於陽臣欺其君小人擅權下將叛上引譬甚切瑾怒矯旨杖三十釋之又上言自正德二年來占得火星入太微垣帝座前或東或西往來不一乞收攬政柄思患預防蓋專指瑾也瑾大怒召而叱之曰若何官亦學爲忠臣源厲聲曰官大小異忠一也又矯旨杖六十謫戍肅州行至河陽驛以創卒其妻斬蘆荻覆之葬驛後楊氏父子以忠諫名天下爲士論重而源小臣抗節尤人所難天啟初賜諡忠懷盛暉字時望無錫人周斌字國用昌黎人王鑑太原人趙文博代州人彭烈峽江人李人儀隆昌人邵銅閩縣人鄭冕樂平人皆進士授御史暉降東鹿知縣斌江陰鑑膚施文博淳化烈江浦人儀襄陽銅博羅冕衡山並有善政東鹿徭役苦不均暉爲立九則法繼者莫能易母憂去服除民相率

詣闕乞遷黜再任益不用鞭扑訟者諭之輒叩頭不復辯鄰邑訟不決亦皆赴訴片言折之各心厭去郊外有隙地爭來築室居之遂成市號爲清官店斌在江陰有惠政民歌曰旱爲災周公禱之甘露來水爲患周公禱之陰雨散天順七年先以薦擢開封知府而黜等至憲宗嗣位所以治行聞帝曰諸臣直諫爲權倖所排又能稱職其悉予郡於是擢黜知邵武鑑延安文博衛輝烈河南人儀荊州銅溫州冕衡州黜復以任治劇調延平巡按御史上黜政績陝西湖廣守臣亦上鑑人儀居縣時治行皆特賜封誥黜累遷陝西左布政使時三邊多警歲復浚饑黜經畫餽餉無缺軍民悉安成化十七年召爲刑部右侍郎居二年山東旱饑盜起改黜左副都御史往巡撫黜至露禱大雨霑槁禾復蘇舉救荒之政旣振餘粟尙百餘萬石又推行九則法於諸府黜暴除苛民甚德之居三年以老致仕弘治中卒斌歷廣東右布政使初去江陰民立生祠及自開封遷去民亦涕泣追送焉鑑初爲御史嘗於左順門面斥中官非禮中官怒甚因考察屬都御史蕭維禎去之維禎不可而止文博終巡撫河南右副都御史烈廣東左布政使費廣等無考

贊曰直言敢諫之士激於事變奮不顧身獲罪固其所甘心耳然觀尹昌隆死於呂震耿通陷於高煦劉球之斃陳鑑之繫由於王振楊瑄之戍厄於石亨曹吉祥乃至戴綸諫遊嶼陳祚請勤學鍾同章綸廖莊

僞復儲倪敬等直言時事皆用賈禍忠臣之志抑而不伸亦可悲夫

明史卷一百六十二終

總裁官總理事務 經筵講官少保兼太子太保保和殿大學士兼管吏部戶部尚書事加大級張廷玉等奉

敕修

李時勉

陳敬宗

劉鉉

薩琦

邢讓

李紹

林瀚

子庭楊庭機孫嫌煙

謝鐸

魯鐸

趙永

李時勉名懋以字行安福人成童時冬寒以衾裹足納桶中誦讀不已中永樂二年進士選庶吉士進學文淵閣與修太祖實錄授刑部主事復與重修實錄書成改翰林侍讀性剛鯁慨然以天下為己任十九年三殿災詔求直言條上時務十五事成祖決計都北京時方招徠遠人而時勉言營建之非及連國入貢人不宜使羣居輦下忤帝意已觀其他說多中時病抵之地復取視者再卒多施行尋被讒下獄歲餘得釋楊榮薦復職洪熙元年復上疏言事仁宗怒甚召至便殿對不屈命武士撲以金瓜腦折者三曳出幾死明日改交趾道御史命日慮一囚言一事章三上乃下錦衣衛獄時勉於錦衣千戶某有恩千戶適涖獄密召醫療以海外血竭得不死仁宗大漸謂夏原吉曰時勉廷辱我言已勃然怒原吉慰解之其夕帝崩宣宗即位已踰年或言時勉得罪先帝狀帝震怒命使者縛以來朕親鞫必殺之已又令王指揮即

縛斬西市毋入見王指揮出端西旁門而前使者已縛時勉從端東旁門入不相值帝遙見罵曰爾小臣敢觸先帝疏何語趣言之時勉叩頭曰臣言諒闇中不宜近妃嬪皇太子不宜遠左右帝聞言色稍霽徐數至大事止帝令盡陳之對曰臣惶懼不能悉記帝意益解曰是第難言耳草安在對曰焚之矣帝乃太息稱時勉忠立赦之復官侍讀比王指揮詣獄還則時勉已襲冠帶立階前矣宣德五年修成祖實錄成遷侍讀學士帝幸史館撒金錢賜諸學士皆俛取時勉獨正立帝乃出餘錢賜之正統三年以宣宗實錄成進學士掌院事兼經筵官六年代貝泰爲祭酒八年乞致仕不允初時勉請改建國學帝命王振往視時勉待振無加禮振銜之廉其短無所得時勉嘗芟彝倫堂樹旁枝振遂言時勉擅伐官樹入家取中旨與司業趙琬掌饌金鑑並枷國子監前官校至時勉方坐東堂閱課士卷徐呼諸生品第高下顧僚屬定甲乙揭榜乃行方盛暑枷三日不解監生李貴等千餘人詣闕乞貸有石大用者上章願以身代諸生圖集朝門呼聲徹殿庭振聞諸生不平恐激變及通政司奏大用章振內慚助教李繼請解於會昌侯孫忠忠皇太后父也忠生日太后使人賜忠家忠附奏太后太后爲言之帝帝初不知也立釋之繼不拘檢押時勉嘗規切之繼不能盡用然心感時勉言至是竟得其助大用豐潤人樸魯初不爲六館所知及是名動京師明年中鄉試官至戶部主事九年帝視學時勉進講尚書辭旨清朗帝悅賜予有加連疏乞致仕

不九十二年春乃得請朝臣及國子生餞都門外者幾三千人或遠送至登舟候舟發乃去英宗北狩時
勉日夜悲慟遣其孫驥詣闕上書請選將練兵親君子遠小人褒表忠節迎還車駕復讐雪恥景泰元年
得旨褒答而時勉卒矣年七十七謚文毅成化五年以其孫頤請改謚忠文贈禮部侍郎時勉爲祭酒六
年列格致誠正四號訓勵甚切崇廉恥抑奔競別賢否示勸懲諸生貧不能婚葬者節省餐錢爲贍給督
令讀書燈火達旦吟誦聲不絕人才盛於昔時始太祖以宋訥爲祭酒最有名其後寧化張顯宗申明學
規人比之訥而胡儼當成祖之世尤稱人師然以直節重望爲士類所依歸者莫如時勉英國公張輔暨
諸侯伯奏願偕詣國子監聽講帝命以三月三日往時勉升師席諸生以次立講五經各一章畢事設酒
饌諸侯伯讓曰受教之地當就諸生列坐惟輔與抗禮諸生歌鹿鳴之詩賓主雍雍盡暮散去人稱爲太
平盛事

陳敬宗字光世慈谿人永樂二年進士選庶吉士進學文淵閣與修永樂大典書成授刑部主事又與修
五經四書大全再修太祖實錄授翰林侍講內艱歸宣德元年起修兩朝實錄明年轉南京國子監司業
帝諭之曰侍講清華之選司業師儒之席位雖不崇任則重矣九年秩滿遷祭酒正統三年上書言舊制
諸生以在監久近送諸司歷事比來有因事予告者遷延累歲至撥送之期始赴實長奸情請以肄業多

寡爲次第又近有願就雜職之例士風卑陋誠非細故請加禁止從之敬宗美鬚髯容儀端整步履有定則力以師道自任立教條革陋習大館士千餘人每升堂聽講設饌會食整肅如朝廷稍失容卽令待罪堂下僚屬憚其嚴誣以他事訟之法司周忱與敬宗善曰盍具疏自理爲屬草辭稍遷就敬宗驚曰得無誑君耶不果上事亦竟白滿考入京師王振欲見之令忱道意敬宗曰吾爲諸生師表而私謁中貴何以對諸生振知不可屈乃貽之文錦羊酒求書程子四箴冀其來謝敬宗書訖署名而已返其幣終不往見王直爲吏部尙書從容謂曰先生官司成久將薦公爲司寇敬宗曰公知我者今與天下英才終日論議顧不樂耶性善飲酒至數斗不亂襄城伯李隆守備南京每留飲聲伎滿左右竟日舉杯未嘗一盼其嚴重如此十二年冬乞休不允景泰元年九月與尙書魏驥同引年致仕家居不輕出有被其容接者莫不興起天順三年五月卒年八十三後贈禮部侍郎諡文定初敬宗與李時勉同在翰林袁忠徹嘗相之曳二人並列曰二公他日功名相埒敬宗儀觀魁梧時勉貌稍寢後二人同時爲兩京祭酒時勉平恕得士敬宗方嚴終明世稱賢祭酒者曰南陳北李

劉鉉字宗器長洲人生彌月而孤及長刲股療母疾母卒哀毀以孝聞永樂中用善書徵入翰林舉順天鄉試授中書舍人宣德時預修成祖仁宗實錄遷兵部主事仍供事內廷正統中再修宣宗實錄進侍講

以學士曹鼎等薦與修撰王振教習庶吉士景帝立進侍講學士直經筵三年以高穀薦遷國子祭酒時以國計不足放遣諸生不願歸者停其月廩鉉言養才國家急務今倉廩尙盈奈何靳此遂得復給又令甄別六館生年老貌寢學藝疎淺者斥爲民鉉言諸生荷教澤久豈無片長況離親戚棄墳墓艱苦備至一旦被斥非朝廷育才意乞揀年貌衰而有學者量授之官帝可其奏尋以母喪歸服闋赴都陳詢已爲祭酒帝重鉉命與詢並任天順初改少詹事侍東宮講讀明年十月卒帝及太子皆賜祭賻贈有加憲宗立贈禮部侍郎諡文恭鉉性介特言行不苟教庶吉士及課國子生規條嚴整讀書至老彌篤仲子瀚以進士使南方瀕行閱其衣篋比還篋如故乃喜曰無玷吾門矣瀚官終副使能守父訓薩琦字廷珪其先西域人後著籍閩縣舉宣德五年進士歷官禮部侍郎兼少詹事天順元年卒琦有文德狷潔不苟合名行與鉉相頡頏云

邢讓字遜之襄陵人年十八舉於鄉入國子監爲李時勉所器與劉珣齊名登正統十三年進士改庶吉士授檢討景泰元年李實自瓦剌還請再遣使迎上皇景帝不許讓疏曰上皇於陛下有君之義有兄之恩安得而不迎且令寇假大義以問我其何辭以應若從羣臣請仍命實齋敕以往且述迎復之指雖上皇還否未可必而陛下恩義之篤昭然於天下萬一迎而不許則我得責直於彼以興問罪之師不亦善

乎疏入帝委曲諭解之天順末父憂歸未終喪起修英宗實錄進修撰成化二年超遷國子祭酒慈諫太后崩議祔廟禮讓率僚屬疏諫兩京國學教官例不得遷擢讓等以爲言由科目者滿考得銓敘讓在太學亦力以師道自任修辟雍通志督諸生誦小學及諸經痛懲謁告之弊時以此見稱而謗者亦衆爲人負才狹中意所輕重輒形於詞色名位相軋者多忌之五年擢禮部右侍郎越二年以在國子監用會饑錢事與後祭酒陳鑑司業張業典籍王允等俱得罪坐死諸生訴闕下請代復詔廷臣雜治卒坐死贖爲民鑑旣得罪吏部尙書姚夔請起致仕禮部侍郎李紹爲祭酒馳召之而紹已卒紹字克述安福人宣德八年進士改庶吉士授檢討大學士楊士奇臥病英宗遣使詢人才士奇舉紹等五人以對土木之敗京師戒嚴朝士多遣家南徙紹曰主辱臣死奚以家爲卒不遣累遷翰林學士以李賢王翱薦擢禮部侍郎成化二年以疾求解職紹好學問居官剛正有器局能獎掖後進其卒也帝深惜之

林瀚字亨大閩人父元美永樂末進士撫州知府瀚舉成化二年進士改庶吉士授編修再遷諭德請急歸弘治初召修憲宗實錄充經筵講官稍遷國子監祭酒進禮部右侍郎掌監事如故典國學垂十年饑銀歲以百數計悉貯之官以次營立署舍師儒免僦居由瀚始歷吏部左右侍郎十三年拜南京吏部尙書以負異率羣僚陳十二事御史王獻臣自遼東逮下詔獄儒士孫伯堅等負緣爲中書舍人瀚疏爭忤

旨乞罷不許已奏請重根本曰保固南京曰佑啟皇儲曰撫綏百姓曰增進賢才正德元年四月吏部尙書馬文升去位曾官邱俊石介等薦瀚帝用侍郎焦芳乃改瀚南京兵部參贊機務命未至瀚引疾乞休因陳養正心崇正道務正學親正人四事優詔慰留時災異數見瀚及南京諸臣條時政十二事語涉近俸多格不行瀚素剛方與守備中官不合他內臣進貢道其地者瀚每裁抑之遂交譖於劉瑾會劉健謝遷罷政瀚聞太息言官戴銑等以留健遷被徵瀚獨贖送瑾聞益恨明年二月假銑等獄詞譴瀚浙江參政致仕旋指爲奸黨瑾誅復官致仕予月廩歲隸如故事尋命有司歲時存問瀚爲人謙厚而自守介然卒年八十六贈太子太保諡文安子九人庭榻庭機最顯庭榻字利瞻瀚次子也弘治十二年進士授兵部主事歷職方郎中吏部尙書張綵欲改爲御史固謝之乃以爲蘇州知府頻歲大水疏請停織造罷繁征割關課備振再上始報可遷雲南左參政正德九年以父老乞侍養時子炫已成進士官禮部主事亦謁假歸三世一堂鄉人稱盛事嘉靖初父憂服闋起官江西歷湖廣左右布政使舉治行卓異擢右副都御史巡撫保定諸府歷工部右侍郎應詔言郊壇大工南城西苑相繼興作請以儉約先天下又因災傷乞撤還採木燒造諸使進左拜尙書加太子太保時帝方大興土木功庭榻所規畫多稱意會詔建沙河行宮庭榻議加天下田賦爲御史桑喬給事中管見所劾乞罷歸卒贈少保諡康懿炫終通政司參議庭

機字利仁瀚季子也嘉靖十四年進士改庶吉士授檢討遷司業擢南京祭酒累遷至工部尚書穆宗立
調禮部俱官陪京時子爍已爲祭酒遂致仕歸萬厯九年卒年七十有六贈太子太保謚文僖子爍煒爍
字貞恆庭機長子嘉靖二十六年進士改庶吉士授檢討景恭王就邸命爍侍講讀三遷國子祭酒自爍
祖瀚父庭機三世爲祭酒前此未有也隆慶改元擢禮部右侍郎充日講官寇犯邊條上備邊七事改吏
部調南京吏部署禮部事魏國公徐鵬舉廢長立幼爍持不可萬厯元年進工部尚書改禮部仍居南京
名位一與父庭機等母喪去官服闋以庭機篤老侍養家居七年先父庭機卒贈太子少保謚文恪明代
三世爲尚書並得謚文林氏一家而已子世勤性篤孝芝生者三枯篁復青御史上其事被旌煒字貞耀
庭機次子也嘉靖四十一年進士授戶部主事歷廣西副使兄爍卒請急歸養久之歷太僕少卿因災異
極陳礦稅之害請釋逮繫諸臣不報終南京工部尚書致仕林氏三世五尚書皆內行修潔爲時所稱
謝鐸字鳴治浙江太平人天順末進士改庶吉士授編修預修英宗實錄性介特力學慕古講求經世務
成化九年校勘通鑑綱目上言綱目一書帝王龜鑑陛下命重加考定必將進講經筵爲致治寶也今天
下有太平之形無太平之實因仍積習廢實徇名曰振綱紀而小人無畏忌曰勵風俗而縉紳棄廉恥飭
官司而汙暴益甚恤軍民而罷敝益極減省有制而興作每疲於奔命蠲免有詔而徵斂每困於迫呼考

察非不舉而俸門日開簡練非不行而私撓日衆賞竭府庫之財而有功者不勸罰窮職覆之案而有罪者不懲以至修省祈禱之命屢頒水旱災傷之來不絕禁垣被震城門示災不思竦動旋轉以大答天人之望是則誠可憂也願陛下以古證今兢兢業業然後可長治久安而載籍不爲無用矣帝不能從時塞上有警條上備邊事宜請養兵積粟收復東勝河套故疆又言今之邊將無異晚唐債帥敗則士卒受其殃捷則權豪蒙其賞且尅侵軍餉辦納月錢三軍方怨憤填膺孰肯爲國效命者語皆切時弊秩滿進侍講直經筵遭兩喪服除以親不逮養遂不起弘治初言者交薦以原官召修憲宗實錄三年擢南京國子祭酒上言六事曰擇師儒慎科貢正祀典廣載籍復會饌均撥歷其正祀典請進宋儒楊時而罷吳澄禮部尙書傅瀚持之乃進時而澄祀如故明年謝病去家居將十年薦者益衆會國子缺祭酒部議起之帝素重鐸擢禮部右侍郎管祭酒事屢辭不許時章懋爲南祭酒兩人皆人師諸生交相慶居五年引疾歸鐸經術湛深爲文章有體要兩爲國子師嚴課程杜請謁增號舍修堂室擴廟門置公廡三十餘居其屬諸生貧者周恤之死者請官定制爲之殮家居好周恤族黨自奉則布衣蔬食正德五年卒贈禮部尙書

諡文肅

魯鐸字振之景陵人弘治十五年會試第一歷編修閉門自守不妄交人武宗立使安南却其餽正德二

年遷國子監司業累擢南祭酒尋改北鐸屢典成均教士切實爲學不專章句士有假歸廢學者訓飭之
悔過乃已久之謝病歸嘉靖初以刑部尙書林俊薦用孝宗朝謝鐸故事起南祭酒踰年復請致仕累徵
不起卒諡文恪鐸以德望重於時居鄉有盜掠牛馬或給云魯祭酒物也舍之去大學士李東陽生日鐸
爲司業與祭酒趙永皆其門生也相約以二帕爲壽比檢笥亡有徐曰鄉有饋乾魚者盍以此往詢諸庖
食過半矣以其餘詣東陽東陽喜爲烹魚置酒留二人飲極歡乃去永字爾錫臨淮人與鐸同年進士亦
官編修復與鐸相繼爲祭酒尋遷南京禮部侍郎大學士楊一清重其才欲引以自助乃爲他語挑之永
正色曰可以纓冠污吾道乎遂請致仕去人服其廉介

贊曰明太祖時國學師儒體貌優重魏觀宋訥爲祭酒造就人才克舉其職諸生啣命奉使往往擢爲大
官不專以科目進也中葉以還流品稍雜撥厯亦爲具文成均師席不過爲儒臣序遷之地而已李時勉
陳敏宗諸人方廉清鯁表範卓然類而傳之庶觀者有所法焉

總裁官總理事務 經筵講官少保兼太子太保保和殿大學士兼管吏部戶部尚書事加六級張廷玉等奉

敕修

鄒

緝鄭維桓

弋

謙黃驥

黃

澤孔友諒

范濟

聊

讓郭佑胡仲倫
華敏賈斌

左

鼎練綱

曹

凱許仕

劉

煒尙

單字姚顯

楊浩

張

昭賀煬

高瑤虎臣

鄒緝字仲熙吉水人洪武中舉明經授星子教諭建文時入為國子助教成祖即位擢翰林侍講立東宮兼左中允屢署國子監事永樂十九年三殿災詔求直言緝上疏曰陛下肇建北京焦勞聖慮幾二十年工大費繁調度甚廣冗官蠶食耗費國儲工作之夫動以百萬終歲供役不得躬親田畝以事力作猶且征求無藝至伐桑棗以供薪剝桑皮以為楮加之官吏橫征日甚一日如前歲買辦顏料本非土產動料千百民相率斂鈔購之他所大青一斤價至萬六千貫及進納又多留難往復展轉當須二萬貫鈔而不足供一柱之用其後既遣官采之產所而買辦猶未止蓋緣工匠多派牟利而不顧民艱至此夫京師天下根本人民安則京師安京師安則國本固而天下安自營建以來工匠小人假託威勢驅迫徙徙號令方施廬舍已壞孤兒寡婦哭泣號倉皇暴露莫知所適遷移甫定又復驅令他徙至有三四徙不得息

者及其既去而所空之地經月逾時工猶未及此陛下所不知而人民疾怨者也貪官污吏徧布內外剝削及於骨髓朝廷每遣一人卽是其人養活之計虛取苛求初無限量有司承奉惟恐不及間有廉疆自守不事干媚者輒肆譏毀動得罪譴無以自明是以使者所至有司公行貨賂剝下媚上有同交易夫小民所積幾何而內外上下誅求如此今山東河南山西陝西水旱相仍民至剝樹皮掘草根以食老幼流移艱踏道路賣妻鬻子以求苟活而京師聚集僧道萬餘人日耗廩米百餘石此奪民食以養無用也至報効軍士朝廷厚與糧賜及使就役乃驕傲橫恣閑遊往來此皆姦詭之人懼還原伍假此規避非真有報効之心也朝廷歲令天下織錦鑄錢遣內官買馬外蕃所出常數千萬而所取曾不能一二馬至雖多類皆驚下責民牧養騷擾殊甚及至死傷輒令賠補馬戶貧困更鬻妻子此尤害之大者漠北降人賜居室盛供帳意欲招其同類也不知來者皆懷窺覘非真遠慕王化甘去鄉土宜於來朝之後遣歸本國不必留爲後日子孫患至宮觀禱祠之事有國者所當深戒古人有言淫祀無福況事無益以害有益蠹財妄費者乎凡此數事皆下失民心上違天意怨讟之興實由於此夫奉天殿者所以朝羣臣發號令古所謂明堂也而災首及焉非常之變也非省躬責己大布恩澤改革政化疏滌天下窮困之人不能回上天譴怒前有監生生員以單丁告乞侍親因而獲罪遣戍者此實有虧治體近者大赦法司執滯常條當赦

者尙復拘繫並乞重加湔洗蠲除租賦一切勿征有司百官全其廩祿拔簡賢才申行薦舉官吏貪贓蠹政者覈其罪而罷黜之則人心歡悅和氣可臻所以保安宗社爲國家千萬年無窮之基莫有大於此者矣且國家所恃以久長者惟天命人心而天命常視人心爲去留今天意如此不宜勞民當還都南京奉謁陵廟告以災變之故保養聖躬休息於無爲毋聽小人之言復有所興作以誤陛下於後也書奏不省時三殿初成帝方以定都詔天下忽罹火災頗懼下詔求直言及言者多斥時政帝不憚而大臣復希旨誣言者帝於是發怒謂言事者謗訕下詔嚴禁之犯者不赦侍讀李時勉侍講羅汝敬俱下獄御史鄭維桓何忠羅通徐璿給事中柯暹俱左官交趾惟緝與主事高公望庶吉士楊復得無罪是年冬緝進右庶子兼侍講明年九月卒於官緝博極羣書居官勤慎清操如寒士子循宣德中爲翰林待詔請贈父母帝諭吏部曰曩皇祖征沙漠朕守北京緝在左右陳說皆正道良臣也其子之鄭維桓慈谿人永樂十三年進士出知交趾南清州卒柯暹池州建德人由鄉舉出知交趾驩州累官浙江雲南按察使

弋謙代州人永樂九年進士除監察御史出按江西言事忤旨貶峽山知縣復坐事免歸仁宗在東宮素知謙骨鯁及嗣位召爲大理少卿直陳時政言官吏貪殘政事多非洪武之舊及有司誅求無藝帝多採納既復言五事詞太激帝乃不憚尙書呂震吳中侍郎吳廷用大理卿虞謙等因劾謙誣罔都御史劉觀

令衆御史合糾謙帝召楊士奇等言之士奇對曰謙不諳大體然心感超擢恩欲圖報耳主聖則臣直惟陛下優容之帝乃不罪謙然每見謙詞色甚厲士奇從容言陛下詔求直言謙言不當觸怒外廷悚惕以言爲戒今四方朝覲之臣皆集闕下見謙如此將謂陛下不能容直言帝惕然曰此固朕不能容亦呂震輩迎合以益朕過自今當置之遂免謙朝參令專視司事未幾帝以言事者益少復召士奇曰朕怒謙矯激過實耳朝臣遂月餘無言爾語諸臣曰朕心士奇曰臣空言不足信乞親降璽書遂令就榻前書敕引過曰朕自卽位以來臣民上章以數百計未嘗不欣然聽納苟有不當不加譴訶羣臣所共知也問者大理少卿弋謙所言多非實事羣臣迎合朕意交章奏其實直請置諸法朕皆拒而不聽但免謙朝參而自是以來言者益少今自去冬無雪春亦少雨陰陽愆和必有其咎豈無可言而爲臣者懷自全之計退而默默何以爲忠朕於謙一時不能含容未嘗不自愧咎爾羣臣勿以前事爲戒於國家利弊政令未當者直言勿諱謙朝參如故時中官採木四川貪橫帝以謙清直命往治之擢謙副都御史賜鈔以行遂罷採木之役宣德初交趾右布政戚遜以貪淫黜命謙往代王通棄交趾謙亦論死正統初釋爲民土木之變謙布衣走闕下薦通及甯懋阮遷等十三人皆奇才可用衆議以通副石亨謙請專任通事遂寢廷臣以謙負重名奏留之亦不報景泰二年復至京疏薦通等不納罷歸未幾卒仁宗性寬大容直言謙以故得

無罪反責呂震等而黃驥言西域事帝亦謂震而行其言驥全州人洪武中中鄉舉爲沙縣教諭永樂時擢禮科給事中常三使西域仁宗初上疏言西域貢使多商人假托無賴小人投爲從者乘傳役人運貢物至京師賞賚優厚番人慕利貢無虛月致民失業妨農比其使還多齎貨物車運至百餘輛丁男不足役及婦女所至辱驛官鞭夫隸無敢與較者乞敕陝西行都司惟哈密諸國王遣使入貢者許令來京止正副使得乘驛馬陝人庶少甦至西域所產惟馬切邊需應就給甘肅軍士其礪砂梧桐蘆之類皆無益國用請一切勿受則來者自稀浮費益省帝以示尙書呂震且讓之曰驥嘗奉使悉西事卿西人顧不悉邪驥言是其卽議行後遷右通政與李琦羅汝敬撫諭交趾不辱命使還尋卒

黃澤閩縣人永樂十年進士擢河南左參政南陽多流民拊循使復業營率丁役至北京周恤備至久之調湖廣仁宗卽位入覲言時政多見采宣宗立下詔求言澤上疏言正心恤民敬天納諫練兵重農止貢獻明賞罰遠嬖倖汰冗官十事其言遠嬖倖曰刑餘之人其情幽陰其慮險譎大姦似忠大詐似信大巧似愚一與之親如飲醇酒不知其醉如噬甘膳不知其毒寵之甚易遠之甚難是以古者宦寺不使典兵干政所以防患於未萌也涓涓弗塞將爲江河此輩宜一切疎遠勿使用事漢唐已事彰彰可監當成祖時宦官稍稍用事宣宗寤以親幸澤於十事中此爲尤切帝雖嘉歎不能用也其後設內書堂而中人多

通書曉文義宦寺之盛自宣宗始宣德三年擢浙江布政使復上言平陽麗水等七縣銀冶宜罷并請盡罷諸坑冶語甚切帝歎息曰民困若此朕何由知遣官驗視酌議以聞澤在官有政績然多暴怒鹽運使丁繼不避道撻之爲所奏巡按御史馬謹亦劾澤九載秩滿自出行縣斂白金三千兩償官物且越境過家遂逮下獄正統六年黜爲民初澤奏金華台州戶口較洪武時耗減而歲造弓箭如舊乞減免下部議得允而澤已罷官踰月矣孔友諒長洲人永樂十六年進士改庶吉士出知雙流縣宣宗初上言六事一曰守令親民之官古者不拘資格必得其人不限歲月使盡其力今居職者多不知撫字之方而廉幹得民心者又遷調不常差遣不一或因小事連累朝夕營治往來道路日不暇給乞敕吏部擇才望素優及久歷京官者任之諭戒上司毋擅差遣假以歲月責成治効至遠缺佐貳多經裁減獨員居職或遇事赴京多委雜職署事因循苟且政令無常民不知畏今後路遠之缺常留一正員任事不得擅離庶法有常守二曰科舉所以求賢必名實相副非徒誇多而已今秋闈取士動一二百人弊旣多端僥倖過半會試下第十常八九其登第者實行或乖請於開科之歲詳核諸生行履孝弟忠信學業優贍者乃許入試庶浮薄不致濫收而國家得真才之用三曰祿以養廉祿入過薄則生事不給國朝制祿之典視前代爲薄今京官及方面官稍增俸祿其餘大小官自折鈔外月不過米二石不足食數人仰事俯育與道路往來

費安所取資貪者放利行私廉者終寔莫訴請敕戶部勘實天下糧儲以歲支之餘量增官俸仍令內外風憲官採訪廉潔之吏重加旌賞則廉者知勸貪者知戒四曰古者賦役量土宜驗丁口不責所無不盡所有今自常賦外復有和買採辦諸事自朝廷視之不過令有司支官錢平買而無賴之輩關通吏胥壟斷貨物巧立辨驗折耗之名科取數倍姦弊百端乞盡停採買減諸不急務則國賦有常民無科擾其二事言汰冗員任風憲言者多及之不具載宣德八年命吏部擇外官有文學者六十八人試之得友諒及進士胡端祺等七人悉令辦事六科居二年皆授給事中惟友諒未授官而卒

范濟元進士洪武中以文學舉爲廣信知府坐累謫戍興州宣宗卽位濟年八十餘矣詣闕言八事其一曰楮幣之法昉於漢唐元造元統交鈔後又造中統鈔久而物重鈔輕公私俱敝乃迨至元鈔與中統鈔兼行子母相權新陳通用又令民間以昏鈔赴平準庫中統鈔五貫得換至元鈔一貫又其法日造萬錠共計官吏俸稍內府供用若干天下正稅雜課若干斂發有方周流不滯以故久而通行太祖皇帝造大明寶鈔以鈔一貫當白金一兩民歡趨之迄今五十餘年其法稍弊亦由物重鈔輕所致願陛下因時變通重造寶鈔一準洪武初制使新舊兼行取元時所造之數而增損之審國家度支之數而權衡之俾鈔少而物多鈔重而物輕嚴僞造之條開倒換之法推陳出新無耗無阻則鈔法流通永永無弊其二曰備

邊之道守險爲要若朔州大同開平宣府大寧乃京師之藩垣邊徼之門戶土可耕城可守宜盛兵防禦廣開屯田修治城堡謹烽火明斥堠毋貪小利毋輕遠求堅壁清野使無所得俟其憊而擊之得利則止毋窮追深入此守邊大要也其三曰兵不在多在於堪戰比者多發爲事官吏人民充軍塞上非白面書生則老弱病廢遇有征行有力者得免貧弱者備數器械不完糗糧不具望風股栗安能效死今宜選其壯勇勤加訓練餘但令乘城擊柝趨走牙門庶幾各得其用其四曰民病莫甚於勾軍衛所差官至六七員百戶差軍旗亦二三人皆有力交結及畏避征調之徒重賄得遣既至州縣擅作威福迫脅里甲恣爲姦私無丁之家誅求不已有丁之戶詐稱死亡託故留滯久而不還及還則以所得財物徧賄官吏朦朧具覆究其所取之丁十不得一欲軍無缺伍難矣自今軍士有故令各衛報都督府及兵部府部牒布政按察司令府州縣準籍貫姓名勾取送衛則差人騷擾之弊自絕其五曰洪武中令軍士七分屯田三分守城最爲善策比者調度日繁興造日廣虛有屯種之名田多荒蕪兼養馬採草伐薪燒炭雜役旁午兵力焉得不疲農業焉得不廢願敕邊將課卒墾荒限以頃畝官給牛種稽其勤惰明賞罰以示勸懲則塞下田可盡墾轉餉益紓諸邊富實計無便於此者其六曰學校者風化之源人材所自出貴明體適用非徒較文藝而已也洪武中妙選師儒教養甚備人材彬彬可觀邇來士習萎靡立志不弘執節不固平居

無剛方正大之氣安望其立朝爲名公卿哉宜選良士爲郡縣學官擇民間子弟性行端謹者爲生徒訓以經史勉以節行俟其有成貢於國學磨礪砥礪使其氣充志定卓然成材然後舉而用之以任天下國家事無難矣其七曰兵者凶器聖人不得已而用之漢高祖解平城之圍未聞蕭曹勸以復歸唐太宗禦突厥於便橋未聞房杜勸以報怨古英君良相不欲疲民力以誇武功計慮遠矣洪武初年嘗赫然命將欲清沙漠旣以餽運不繼旋卽班師遂撤東勝衛於大同塞山西陽武谷口選將練兵扼險以待內修政教外嚴邊備廣屯田興學校罪貪吏徙頑民不數年間朶兒只巴獻女伯顏帖木兒乃兒不花等相繼擒獲納哈出亦降此專務內治不勤遠略之明效也伏望遠鑒漢唐近法太祖毋以窮兵黷武爲快毋以犁庭掃穴爲功棄捐不毛之地休養冠帶之民俾竭力於田桑盡心於庠序邊塞絕傷痍之苦閭里絕呻吟之聲將無倖功士無天闕遠人自服荒外自歸國祚靈長於萬年矣其八曰官不在衆在乎得人國家承大亂後因時損益以府爲州以州爲縣繼又裁併小縣之糧不及倖者量民數以設官民多者縣設丞簿少者知縣典史而已其時官無廢事民不愁勞今藩臬二司及府州縣官視洪武中再倍政愈不理民愈不寧姦弊叢生詐僞滋起甚有官不能聽斷吏不諳文移乃容留書寫之人在官影射賄賂公行獄訟淹滯皆官冗吏濫所致也望斷自宸衷凡內外官吏竝依洪武中員額冗濫者悉汰則天工無曠庶績咸熙

而天下大治矣奏上命廷臣議之尙書呂震以爲文辭冗長且事多已行不足采帝曰所言甚有學識多
契朕心當察其素履以聞震乃言濟故元進士曾守郡坐事戍邊帝曰惜哉斯人令久淹行伍今猶足用
震曰年老矣帝曰國家用人正須老成但不宜任以繁劇乃以濟爲儒學訓導

聊讓蘭州人肅府儀衛司餘丁也好學有志尙明習時務景帝嗣位愷王振蒙蔽大闢言路吏民皆得上
書言事景泰元年六月讓詣闕陳數事其略曰邇歲土木繁興異端盛起番僧絡驛汚吏縱橫相臣不正
其非御史不劾其罪上下蒙蔽民生凋瘵狡寇犯邊上皇播越陛下枕戈嘗膽之秋可不拔賢舉能一新
政治乎昔宗岳爲將敵國不敢呼名韓范鎮邊西賊聞之破膽司馬光居相位強鄰戒勿犯邊今文武大
臣之有威名德望者宜使典樞要且延訪智術才能之士布滿朝廷則也先必畏服而上皇可指日還矣
大臣陽也宦寺陰也君子陽也小人陰也近日食地震陰盛陽微謫見天地望陛下總攬乾綱抑宦寺使
不得預政遏小人俾不得居位則陰陽順而天變弭矣天下治亂在君心邪正田獵是娛宮室是侈宦寺
是狎三者有一足蠱君心願陛下涵養克治多接賢士大夫少親宦官宮妾自能革奢靡戒遊佚而心無
不正矣堯立謗木恐人不言所以聖秦除諛法恐人議己所以亡陛下廣從諫之量旌直言之臣則國家
利弊閭閻休戚臣下無所顧忌而言無不盡矣蘇子曰平居無犯顏敢諫之臣則臨難必無仗節死義之

士願陛下恆念是言而審察之書奏帝頗嘉納之後四年讓登進士官知縣卒景泰二年監生郭佑亦上書言兵事略曰逆寇犯順上皇蒙塵此千古非常之變百世必報之讎也今使臣之來動以數千務驕蹇責望於我而我乃隱忍姑息致賊勢日張我氣日索求和與和求戰與戰是和戰之權不在我而在賊也願陛下結人心親賢良以固國本廣儲蓄練將士以壯國氣正分定名裁之以義如桀鷦侵軼則提兵問罪使大漠之南不敢有匹馬闌入乃可保百年無虞不然西北力罷東南財竭不能一日安枕矣昨以國用耗乏謀國大臣欲紓一時之急令民納粟者賜冠帶今軍旅稍寧行之如故農工商販之徒不較賢愚惟財是授驕親戚誇鄉里長非分之邪心賊污吏罷退爲民欲掩閭黨之恥納粟納草冠帶而歸前以賈貨去職今以輸貨得官何以禁貪殘重名爵況天下統一藏富在民未至大不得已而舉措如此是以空乏敗寇心也章下廷議格不行又有胡仲倫者雲南鹽課提舉司吏目也緣事入都會上皇北狩也先欲妻以妹上皇因遣廣寧伯劉安入言於帝仲倫上疏爭之言今日事不可屈者有七降萬乘之尊與諧婚媾一也敵假和議使我無備二也必欲爲姻驕尊自大三也索金帛使我坐困四也以送駕爲名乘機入犯五也逼上皇手詔誘取邊城六也欲求山後之地七也稍從其一大事去矣曩上皇在位王振專權忠諫者死鯁直者戍君子見斥小人驟遷章奏多決中旨黑白混淆邪正倒置閩浙之寇方殷瓦剌之聲大

作陛下宜親賢遠姦信賞必罰通上情達下志賣國之姦無所投隙倉卒之變未由發機朝廷自此尊天下自此安矣帝嘉納焉又有華敏者南京錦衣衛軍餘也意氣慷慨讀書通大義憤王振亂國與儕輩言輒裂眦怒詈景泰三年九月上書曰近年以來內官袁琦唐受喜寧王振專權害政致國事傾危望陛下防微杜漸總攬權綱爲子孫萬世法不然恐禍稔蕭牆曹節侯覽之害復見於今日臣雖賤陋不勝痛哭流涕謹以虐軍害民十事爲陛下痛切言之內官家積金銀珠玉累室兼竊從何而至非內盜府藏則外賧民膏害一也怙勢矜寵占公侯邸舍興作工役勞擾軍民害二也家人外親皆市井無籍之子縱橫豪悍任意作奸納粟補官貴賤淆雜害三也建造佛寺耗費不貲營一己之私破萬家之產害四也廣置田莊不入賦稅寄戶郡縣不受征徭阡陌連亘而民無立錫害五也家人中鹽虛占引數轉而售人倍支鉅萬壞國家法豪奪商利害六也奏求塌房邀接商旅倚勢賒買恃強不償行賈坐敝莫敢誰何害七也賣放軍匠名爲伴當俾辦月錢致內府監局營作乏人工役煩重并力不足害八也家人買置物料所司畏懼以一科十虧官損民害九也監作所至非法酷刑軍匠塗炭不勝怨酷害十也章下禮部寢不行又有賈斌者商河人山西都司令史也亦疏言宦官之害引漢桓帝唐文宗宋徽欽爲戒且獻所輯忠義集四卷採史傳所記直諫盡忠守節之士而宦官恃寵蠹政可爲鑒戒者附焉乞命工刊布禮部以其言當乞

垂鑒納不必刊行帝報聞

左鼎字周器永新人正統七年進士明年都御史王文以御史多闕請會吏部於進士選補帝從之尙書王直考鼎及白圭等十餘人曉諳刑名皆授御史而鼎得南京尋改北巡按山西時英宗北狩兵荒潦臻請蠲太原諸府稅糧停大同轉餉夫以蘇其困也先請和抗言不可尋以山東河南饑遣鼎巡視民賴以安律官吏故勘平人致死者抵罪時以給事中于泰言悉得寬貰鼎言小民無知情貸可也官吏深文巧誣與故殺何異法者天下之公不可意爲輕重自是論如律景泰四年疏言瓦剌變作將士無用由軍政不立謂必痛懲前弊乃今又五年矣貂蟬盈座悉屬公侯鞍馬塞途莫非將帥民財歲耗國帑日虛以天下之大土地兵甲之衆曾不能振揚威武則軍政仍未立也昔太祖定律令至太宗暫許有罪者贖蓋權宜也乃法吏拘牽沿爲成例官吏受枉法財悉得減贖散散如此復何顧憚哉國初建官有常近始因事增設主事每司二人今有增至十人者矣御史六十人今則百餘人矣甚至一部有兩尙書侍郎亦倍常額都御史以數十計此京官之冗也外則增設撫民管屯官如河南參議益二而爲四僉事益三而爲七此外官之冗也天下布按二司各十餘人乃歲遣御史巡視復遣大臣巡撫鎮守夫今之巡撫鎮守卽曩之方面御史也爲方面御史則合衆人之長而不足爲巡撫鎮守則任一人之智而有餘有是理邪至御

史遷轉太驟當以六年爲率令其通達政事然後可以治人巡按所係尤重毋使初任之員漫然嘗試其餘百執事皆當慎擇而久任之帝頗嘉納未幾復言國家承平數十年公私之積未充一遇軍興抑配橫徵鬻官市爵率行衰世苟且之政此司邦計者過也臣請痛抑末技嚴禁遊惰斥異端使歸南畝裁冗員以省虛糜開屯田而實邊料士伍而紓饑寺觀營造供佛飯僧以及不急之工無益之費悉行停罷專以務農重粟爲本而躬行節儉以先之然後可阜民而裕國也倘忽不加務任掎克聚斂之臣行朝三暮四之術民力已盡而征發無已民財已竭而賦斂日增苟紆目前之急不恤意外之虞臣竊懼焉章下戶部尙書金濂請解職帝不許鼎言亦不盡行踰月以災異偕同官陳救弊恤民七事未言大臣不乏奸回宜黜罷其尤用清政本帝善其言下詔甄別而大臣辭職並慰留給事中林聰請明諭鼎等指實劾奏鼎聰等乃共論吏部尙書何文淵刑部尙書俞士悅工部侍郎張敏通政使李錫不職狀錫罷文淵致仕鼎居官清勤卓有聲譽御史練綱以敢言名而鼎尤善爲章奏京師語曰左鼎手練綱口自公卿以下咸憚之鼎出爲廣東右參政會英宗復位以郭登言召爲左僉都御史踰年卒練綱字從道長洲人祖則成洪武時御史綱舉鄉試入國子監歷事都察院廊王監國上中興八策也先將入犯復言和議不可就南遷不可從有持此議者宜立誅安危所倚惟于謙石亨當主中軍而分遣大臣守九門擇親王忠孝著聞者令

同守臣勤王檄陝西守將調番兵入衛帝悉從之綱有才辨急功名都御史陳銘尙書俞士悅皆綱同里念綱數陳時政有聲且畏其口遂薦之授御史景泰改元上時政五事巡視兩淮鹽政駙馬都尉趙輝侵利劾奏之三年冬偕同官應詔陳八事並允行亡何復偕同官上言吏部推選不公任情高下請置尙書何文淵右侍郎項文曜於理尙書王直左侍郎俞山素行本端爲文曜等所罔均宜按問帝雖不罪終以綱等爲直明年命出贊延綏軍務自陳名輕責重乞授尙都御史帝曰遷官可自求耶遂寢其命初京師戒嚴募四方民壯分營訓練歲久多逃或赴操不如期廷議編之尺籍綱等言召募之初激以忠義許事定罷遣令展轉輪操已孤所望況其逃亡實迫寒餒豈可遽著軍籍邊方多故倘更召募誰復應之詔卽除前令五年巡按福建與按察使楊珏互許俱下吏謫珏黃州知府綱邠州判官久之卒

曹凱字宗元益都人正統十年進士授刑科給事中磊落多壯節英宗北征諫甚力且曰今日之勢大異澶淵彼文武忠勇士馬勁悍今中貴竊權人心玩愒此輩不惟以陛下爲孤注卽懷慙微欽亦何暇恤帝不從乘輿果陷凱痛哭竟日聲徹禁庭與王竑共擊馬順至死景泰中遷左給事中林聰劾何文淵周旋詔宥之凱上殿力諍二人遂下吏時令輸豆得補官凱爭曰近例輸豆四千石以上授指揮彼受祿十餘年費已償矣乃令之世襲是以生民膏血養無功子孫而彼取息長無窮也有功者必相謂曰吾以捐軀

獲此彼以輸豆亦獲此是朝廷以我軀命等於荏菽其誰不解體乞自今惟令帶俸不得任事傳襲文職則止原籍帶俸帝以爲然命已授者如故未授者悉如凱議福建巡按許仕達與侍郎薛希璉相許命凱往勘用薦擢浙江右參政時諸衛武職役軍辦納月錢至四千五百餘人以凱言禁止鎮守都督李信擅募民爲軍糜餉萬餘石凱劾奏之信雖獲宥諸助信募軍者咸獲罪在浙數年聲甚著初凱爲給事常劾武清侯石亨亨得志修前憾謫凱衛經歷卒許仕達歛人正統十年進士擢御史景泰元年四月上疏言災沴數見請帝痛自修省帝深納之未幾復請於經筵之餘日延儒臣講論經史帝亦優詔褒答巡按福建劾鎮守中官廖秀下之獄秀許仕達下鎮守侍郎薛希璉等廉問會仕達亦劾希璉貪縱乃命凱及御史王豪往勘還奏兩人互有虛實而耆老數千人乞留仕達給事中林聰聞人也亦爲仕達言乃命留任且敕希璉勿搆卻仕達厲風紀執漳州知府馬嗣宗送京師大理寺劾其擅執帝以執職吏不問期滿當代耆老詣闕請留不許未幾卽以爲福建左參政天順中歷山東貴州左右布政使

劉煒字有融慈谿人正統四年進士授南京刑科給事中副都御史周銓以私憾撻御史諸御史范霖楊承與尙褫等十人共劾銓煒與同官盧祥等復劾之銓下詔獄亦許霖承及煒祥等王振素惡言官盡逮下詔獄霖承坐絞後減死他御史或戍或謫煒祥事白留任而銓已先瘐死煒累進都給事中景泰四年

戶部以邊儲不足奏令罷退官非贓罪者輸米二十石給之誥敕煒等言者退之官多有罷軟酷虐荒瀾酒色廉恥不立者非止贓罪已也賜之誥敕以何爲辭若但覈其納米則是朝廷誥敕止直米二十石何以示天下後世此由尙書金濂不識大體有此謬舉帝立爲已之山東歲歉戶部以尙書沈翼習其地民瘼請令往振及往初無方略煒因劾翼且言其地已有尙書薛希璉少卿張固鎮撫又有侍郎鄒幹都御史王政振濟而復益之以翼所謂十羊九牧乞還翼南京戶部而專以命希璉等從之平江侯陳瓊鎮臨清事多違制煒劾之豫被責讓明年都督黃珌以易儲議得帝眷奏求霸州武清縣地煒等抗章言珌本蠻獠遽蒙重任怙寵妄干乞地六七十里豈盡無主者請正其罪帝宥珌遣戶部主事黃岡謝景往勘還奏果民產戶部再請罪珌帝宥焉景官至貴州巡撫以清慎稱煒天順初出爲雲南參政改廣東分守惠潮二府潮有巨寇招之不服會兵進剿誅其魁改涖南韶會大軍征兩廣以勞瘁卒官尙褫字景福羅山人正統四年進士除行人上書請毋囚繫大臣擢南御史以劾周銓下獄與他御史皆謫驛丞得雲南虛仁驛景泰五年冬因災異上書陳數事申言忠直之士冒死陳言執政者格以條例輕則報罷重則中傷是言路雖開猶未開也釋教盛行誘煽輿俗由掌邦禮者畏王振勢度僧多至此宜盡勒歸農章下禮部尙書胡濙惡其刺己悉格不行量移豐城知縣爲邑豪誣構繫獄尋得釋成化初大臣會薦擢湖廣僉

事初有詔荆襄流民許所在附籍都御史項忠復遣還鄉督甚急多道死襁褓之陳牒巡撫吳琛請進止琛以報忠忠怒劾襁中朝知其意在卹民卒申令流民聽附籍不願乃遣還鄉襁爲愈事十年所司上其治行賜誥旌異致仕卒

單字字時泰臨川人正統四年進士除岷縣知縣馭吏嚴吏欲誣奏字字以聞坐不井上吏奏逮下獄事白調諸暨遭喪服除待銓京師適英宗北狩字憤中官監軍諸將不得專進止致喪師疏請盡罷之以重將權景帝不納初王振佞佛請帝歲一度僧其所修大興隆寺日役萬人糜帑數十萬閎麗冠京都英宗爲賜號第一叢林命僧大作佛事躬自臨幸以故釋教益熾至是字上書言前代人君尊奉佛氏卒致禍亂近男女出家累百千萬不耕不織蠶食民間營構寺宇徧滿京邑所費不可勝紀請撤木石以建軍營銷銅鐵以鑄兵仗罷遣僧尼歸之民俗庶皇風清穆異教不行疏入爲廷議所格復知侯官而咸陽姚顯以鄉舉入國學亦上言曩者修治大興隆寺窮極壯麗又奉僧楊某爲上師儀從侔王者食膏粱被組繡貌萬乘若弟子今上皇被留賊庭乞令前赴瓦剌化諭也先誠能奉駕南還庶見護國之力不然佛不足信彰彰矣當景泰時廷臣諫事佛者甚衆帝卒不能從而中官興安最用事佞佛甚於振請帝建大隆福寺殿壯與興隆並四年三月寺成帝尅期臨幸河東鹽運判官濟寧楊浩切諫乃止字好學有文名三爲

縣咸以慈惠聞居侯官久之卒顯後爲齊東知縣移武城公廉剛正用巡撫翁世資薦擢太僕丞浩初以鄉舉入國學除官未行遂抗疏聲譽籍甚累官右副都御史巡撫延綏

張昭不知何許人天順初爲忠義前衛吏英宗復辟甫數月欲遣都指揮馬雲等使西洋廷臣莫敢諫昭聞之上疏曰安內救民國家之急務慕外勤遠朝廷之末策漢光武閉關謝西域唐太宗不受康國內附皆深知本計者也今畿輔山東仍歲災歉小民絕食逃竄妻子衣不蔽體被薦裹薦鬻子女無售者家室不相完轉死溝壑未及埋瘞已成市櫛此可爲痛哭者也望陛下用和番之費益以府庫之財急遣使振卹庶饑民可救奏下公卿博議言雲等已罷遣宜籍記所市物俟命帝命姑已之天順三年秋建安老人賀煬亦上書論時事言今銓授縣令多年老監生逮滿九載年幾七十苟且貪污宜擇年富有才能者其下僚及山林抱德士亦當推舉景泰朝錄先賢顏孟程朱子孫授以翰林博士俾之奉祀然有官無祿宜班給以昭崇儒之意黃幹劉燾蔡沈真德秀配祠朱子亦景泰間從僉事呂昌之請然未入祝辭宜增補預備義倉本以振貧民乃豪猾多冒支不償致廩庾空虛乞令出粟義民各疏里內饑民同有司散放未幾又言朝廷建學立師將以陶鎔土類而師儒鮮積學草野小夫貪緣津要初解兔園之冊已廁鸚鵡之羣及受職泮林猥瑣貪饕要求百故而授業解惑莫措一詞生徒亦往往玩愒歲月遙城闕待次循資

濫升太學侵尋老盡倖博一官但塵身家之謀無復功名之念及今不嚴甄選人材日陋士習日非矣帝善其言下所司行之

高瑤字庭堅閬縣人由鄉舉爲荊門州學訓導成化三年五月抗疏陳十事其一言正統己巳之變先帝北狩陛下在東宮宗社危如一髮使非郕王繼統國有長君則禍亂何由平鑿輿何由返六七年間海宇寧謐元元樂業厥功不細迨先帝復辟貪天功者遂加厚誣使不得正其終節惠濟祀未稱典禮望特赦禮官集議追加廟號盡親親之恩章下廷議久不決至十二月始奏追崇廟號非臣下敢擅議惟陛下裁決而左庶子黎澹力爭謂不當復且言瑤此言有死罪一一誣先帝爲不明一陷陛下於不孝臣以謂瑤此舉非欲尊郕王特爲羣邪進用階必有小人主之者帝曰景泰往過朕未嘗介意豈臣子所當言澹爲此奏欲獻諂希恩耶議遂寢然帝終感瑤言久之竟復郕王帝號瑤後知番禺縣多異政發中官韋眷通番事沒其貲鉅萬於官眷憾甚誣奏於朝瑤及布政使陳選俱被逮士民泣送者塞道瑤竟謫戍永州釋還卒黎澹華容人天順元年進士第一官至南京禮部尙書頗有名譽其與瑤爭郕王廟號也專欲阿憲宗意至以昌邑更始比景帝爲士論所薄當成化時言路大阻給事御史多獲譴惟瑤以卑官建危議卒無罪時皆稱帝盛德云又有虎臣者麟遊人成化中貢入太學上言天下士大夫過先聖廟宜下輿馬

從之省親歸會陝西大饑巡撫鄒時將請振臣齎奏行陳饑狀詞激切大獲振貸已上言臣鄉比歲災傷人相食由長吏貪殘賦役失均請敕有司審民戶編三等以定科徭從之孝宗踐阼將建椽棚萬歲山備登眺臣抗疏切諫祭酒費閭懼禍及銀鐙爇臣堂樹下俄官校宣臣至左順門傳旨慰諭曰若言是椽棚已毀矣聞大慚臣名遂聞都下頃之命授七品官乃以爲雲南碣嘉知縣卒官

贊曰明白太祖開基廣闢言路中外臣寮建言不拘所職草野微賤奏章咸得上聞沿及宣英流風未替雖升平日久堂室深蔽而逢掖布衣刀筆掾史抱關之冗吏荷戈之戍卒朝陳封事夕達帝闕採納者榮顯其身報罷者亦不之罪若仁宗之復弋謙朝參引咎自責卽懸軹設鐸復何以加以此爲招宜乎忼慨發憤之徒扼腕而談世務也英景之際實錄所載不可勝書今撮其著者列於篇迨憲宗季年闕尹擅朝事勢屢變別自爲卷得有考焉

明史卷一百六十四終

總裁官總理事務 經筵講官 保兼太子太保保和殿大學士兼管吏部戶部尚書事加六級張廷玉等奉 敕修

陶成子魯

陳敏

丁瑄

王得仁子一夔

葉禎

伍驥

毛吉

林錦

郭緒

姜昂子龍

陶成字孔思鬱林人永樂中舉於鄉除交趾鳳山典史尚書黃福知其賢命署諒江府教授交人化之秩

滿遷山東按察司檢校用薦擢大理評事正統中以劉中敷薦超擢浙江僉事成有智略遇事敢任僞犯

桃渚成密布釘板海沙中倭至熾舟躍上釘洞足背倭畏之遠去秩滿進副使處州賊葉宗留陳鑑胡陶

得二等寇蘭谿成擊斬數百人進屯武義立木城以守誘賊黨為內應前後斬首數百生擒百餘人又自

抵賊巢諭降者三千餘人賊勢漸衰惟得二尙在久之勢復熾擁眾來犯先遣其黨十餘輩偽為鄉民避

賊者以徹縕裹薪闌入城及成出戰賊持薪縱火焚木城官軍驚潰成與都指揮僉事崔源戰死時景泰

元年五月也事聞贈成左參政錄其子魯為八品官魯字自强膺授新會丞當是時廣西猺流劫高廉惠

肇諸府破城殺吏無虛月香山順德間土寇蜂起新會無賴子羣聚應之魯召父老語曰賊氣吞吾城不

早備且陷若輩能率子弟捍禦乎皆曰諾乃築堡繕甲兵練技勇以孤城捍賊衝建郭掘濠布鐵蒺藜刺竹于外城守大固賊來犯輒擊破之天順七年秩滿巡撫葉盛上其績就遷知縣尋以破賊功進廣州同知仍知縣事成化二年從總督韓雍征大藤峽雍在軍嚴重獨於魯未嘗不虛己用其策輒有功雍請擢魯爲僉事專治新會陽江陽春瀧水新興諸縣兵其冬會參將王瑛破劇賊廖婆保等於欽化二州大獲璽書嘉勞明年賊首黃公漢等猖獗偕參將夏鑑等連破之思恩潯州未幾賊陷石康執知縣羅紳復偕鑑追擊至六菊山敗之兩廣自韓雍去罷總督不設帥臣觀望相推諉寇盜滋蔓魯奏請重臣仍開府梧州遂爲永制秩滿課最進副使兵部尙書余子俊奏其撫輯勞賚銀幣魯治兵久賊剽兩粵大者會剿小者專征所向奏捷賊讐之次骨刮其鬱林故居焚誥命發先塋戕其族黨魯聞大慟詔徙籍廣東補給封誥慰勞有加益奮志討賊二十年以征荔浦徭功增俸一級又九載課最進湖廣按察使治兵兩廣如故鬱林陸川賊黃公定胡公明等爲亂與參將歐磐分五路進討大破之毀賊巢一百三十弘治四年總督秦紘遣平德慶徭進湖廣右布政使魯言身居兩廣而官以湖廣爲名於事體非便乃改湖廣左布政使兼廣東按察副使領嶺西道事人稱之爲三廣公十一年總督鄧廷瓚請官其子俾統魯所募健卒備征討乃授其子荆民錦衣百戶是年魯卒荆民復陳父功遂進副千戶世襲魯善撫士多智計謀定後戰

鑿池公署後爲亭其中不置橋夜則召部下計事以版度一人語畢令退如是凡數人乃擇其長而參伍用之故常得勝算而機不洩羽書狎至戎裝宿戒聲色不動審賊可乘潛師出城中夜合圍曉輒奏凱賊善偵終不能得要領歷官四十五年始終不離兵事大小數十戰凡斬馘二萬一千四百有奇奪還被掠及撫安復業者十三萬七千有奇兩廣人倚之如長城然魯將兵不專尙武嘗言治寇賊化之爲先不得已始殺之耳每平賊卒置縣建學以興教化魯初爲丞年纔弱冠知縣王重勉之學重故老儒魯遂請執弟子禮每晨授經史講解而後視事後重卒官魯執喪如父禮且資其二子又敬事名儒陳獻章獻章亦重之宋陸秀夫張世傑盡節崖山未有廟祀特爲建祠請祠額賜名大忠嘉靖初魯歿三十載矣新會人思其德頌於朝賜祠祀之

陳敏陝西華亭人宣德時爲四川茂州知州遭喪去官所部諸長官司及番民百八十人詣闕奏言州僻處邊徼萬山中與松潘疊溪諸番鄰歲被其患自敏涖州撫馭有方民得安業今以憂去職軍民失所依乞矜念遠方遣此良牧帝立報可正統中九載滿軍民復請留進成都府同知視茂州事都司徐甫言敏及指揮孫敬在職公勤羣番信服章下都御史王翱等覈實進敏右參議仍視州事以監司秩涖州前此未有也黑虎寨番掠近境爲官軍所獲敏從其俗與誓而遣之既復出掠爲巡按御史陳員韜所劾竊賈

之提督都御史寇深器其才言敏往來撫卹番人贊理軍政乞別除知州俾敏專戎務吏部以敏泄茂久別除恐未悉番情粹難馴服宜增設同知一人佐之報可敏既以參議治州其體儷監司遂劾按察使陳泰無故杖死番人泰亦許敏帝不問而泰下獄論罪景泰改元參議滿九載進右參政視州事如前洺州二十餘年威信大行番民胥悅秩漸高諸監司郡守反位其下同事多忌之者爲按察使張淑所劾罷去丁瑄不知何許人正統間爲御史初福建多礦盜命御史柳華捕之華令村聚皆置樓編民爲甲擇其豪爲長得自置兵仗督民巡徼沙縣佃人鄧茂七素無賴旣爲甲長益以氣役屬鄉民其俗佃人輸租外例餽田主茂七倡其黨令毋餽而田主自往受粟田主訴於縣縣逮茂七不赴下巡檢追攝茂七殺弓兵數人上官聞遣軍三百捕之被殺傷幾盡巡檢及知縣並遇害茂七遂大剽略僞稱剽平王設官屬黨數萬人陷二十餘縣都指揮范真指揮彭璽等先後被殺時福建參政交趾人宋新賄王振得遷左布政使侵漁貪惡民不能堪益相率從亂東南騷動十三年四月茂七圍延平刷卷御史張海登城撫諭賊訴乞寬死免三年徭役卽解散爲良民海以聞命瑄往招討以都督劉聚僉都御史張楷大軍繼其後瑄旣至先令人齋敕往撫茂七不肯降瑄馳赴沙縣圖之賊首林宗政等萬餘人攻後坪欲立砦瑄令通判倪冕等率衆先據要害而身與都指揮雍堃等邀其歸路斬賊二百餘級獲其渠陳阿巖明年二月瑄誘賊復

攻延平督衆軍分道衝擊賊大敗遁走指揮劉福追之遂斬茂七招脅從復業未幾復爲其黨林子得等
尤溪賊首鄭永祖率四千人攻延平瑄偕瑩等邀擊禽之斬首五百有奇餘黨潰散楷之監大軍討賊也
至建寧頓不進日置酒賦詩爲樂聞瑄破賊則馳至延平攘其功瑄被脅依違具奏福不能平愬之詔責
瑄具狀楷等皆獲罪瑄有功不問功亦竟不錄茂七雖死其從子伯孫等復熾朝廷更遣陳懋等以大軍
討瑄乃還朝景泰初出爲廣東副使卒當是時浙閩盜所在剽掠爲民患將帥率玩寇而文吏勵民兵拒
賊往往多斬獲閩則有張瑛王得仁之屬浙江則金華知府石瑁禽遂昌賊蘇才於蘭谿處州知府張佑
擊敗賊衆禽斬千餘人於是帝降敕數詰讓諸將帥都指揮鄧安等因歸咎於前御史柳華時王振方欲
殺朝士威衆命逮華華已出爲山東副使聞命仰藥死詔籍其家男戍邊婦女沒入浣衣局而御史汪澄
柴文顯亦以是得罪初澄按福建以茂七亂檄浙江江西會討尋以賊方議降止兵毋進旣知賊無降意
復趣進兵而賊已不可制浙江巡按御史黃英恐得罪具白澄止兵狀兵部因劾澄失機福建三司亦言
賊初起按臣柴文顯匿不奏釀成今患遂俱下吏獄成詔磔文顯籍其家澄棄市而宋新及按察使方冊
等十人俱坐斬遇赦謫驛丞天順初復官論者謂華所建置未爲過澄文顯罪不至死武將不能滅賊反
罪文吏華文顯至與叛逆同科失刑實由王振云華吳縣人文顯浙江建德人澄仁和人

王得仁名仁以字行新建人本謝姓父避讐外家因冒王氏得仁五歲喪母哀號如成人初爲衛吏以才薦授汀州府經歷廉能勤敏上下愛之秩滿當遷軍民數千人乞留詔增秩再任居三年推官缺英宗從軍民請就令遷擢數辯寃獄却饋遺抑鎮守內臣苛索政績益著沙縣賊陳政景故鄧茂七黨也糾清流賊藍得隆等攻城得仁與守將及知府劉能擊敗之禽政景等八十四人餘賊驚潰諸將議窮搜得仁恐濫及百姓下令招撫辨釋難民三百人都指揮馬雄得通賊者姓名將按籍行戮得仁力請焚其籍賊復寇靈化率兵往援斬首甚衆民多自拔歸賊勢益衰賊退屯將樂得仁將追滅之俄遭疾衆欲輿歸就醫得仁不可曰吾一動賊必長驅乃起坐帳中諭將吏戮力平賊遂卒時正統十四年夏也軍民哀慟喪還哭奠者道路相屬多繪像祀之天順末吏民乞建祠有司爲請詔如廣東楊信民故事春秋致祭子一夔天順四年舉進士第一授修撰進左諭德成化七年彗星見應詔陳五事請正宮闈親大臣開言路慎刑獄戒妄費語極剴摯被旨切責累遷工部尙書卒贈太子少保正德中諡文莊

葉禎字夢吉高要人舉於鄉授潯州府同知補鳳翔調慶遠兩廣徭賊蠱起列郡咸被害將吏率縮胸觀望禎誓不與賊俱生募健兒日訓練嗣曾章父強數敗官軍禎生繫之其黨忿悉衆攻城旗山守將擁兵不救禎率健兒出戰賊却去旋驢禎戰相當禎子公榮殲焉頃之賊圍雞刺諸村禎率三百人趨赴道遇

賊人頭山下鏖戰禎被數鎗手刃賊一人與從子官慶及三百人皆死時天順三年正月晦也嶺南素無雪是夜大雷電雪深尺許賊釋圍去諸村獲全事聞贈朝列大夫廣西參議守臣爲立廟祀之

伍驥字德良安福人景泰五年進士授御史莊重寡言笑見義敢爲天順七年巡按福建先是上杭賊起都指揮僉事丁泉汶上人善捍禦賊屢攻城皆爲所却已而賊轉熾驥聞立馳入汀州調援兵四集驥單騎詣賊壘賊不意御史猝至皆擐甲露刃驥從容立馬諭以禍福賊見其至誠感悟泣下歸附者千七百餘戶給以牛種俾復故業惟賊首李宗政負固不服遂與泉深入破之泉力戰爲賊所害驥弔死恤傷激以忠義復與賊戰連破十八砦俘斬八百餘人四境悉平而驥冒瘴癘成疾班師至上杭卒軍民哀之如父母旦夕臨者數千人爭出財立祠成化中以知縣蕭宏請詔與泉並祀賜祠名寔忠

毛吉字宗吉餘姚人景泰五年進士除刑部廣東司主事司轄錦衣衛衛卒伺百官陰事以片紙入奏卽獲罪公卿大夫莫不懼恐公行請屬狎侮官司卽以罪下刑部者亦莫敢撻撻吉獨執法不撓有犯必重懲之其長門達怙寵肆虐百官道遇率避馬吉獨舉鞭拱手過達怒甚吉以疾失朝下錦衣獄達大喜簡健卒用巨梃榜之肉潰見骨不死天順五年擢廣東僉事分巡惠潮二府痛抑豪右民大悅及期當代相率籲留之程鄉賊楊輝者故劇賊羅劉盜黨也已撫復叛與其黨曾玉謝瑩分據寶龍石坑諸洞攻陷江

西安遠剽閩廣間已欲攻程鄉吉先其未至募壯士合官軍得七百人抵賊巢先破石坑斬五次擊鑿賊之復生擒輝諸洞悉破凡俘斬千四百人捷聞憲宗進吉副使璽書嘉勞移巡高雷廉三府時民遭賊躡數百里無人烟諸將悉閉城自守或以賊告反被撻有自賊中逸歸者輒誣以通賊撲殺之吉不勝憤以平賊爲己任按部雷州海康知縣王騏雲南太和人也以義激其民賊至輒奮擊吉壯其勇節獎勵之適報賊掠鄉聚吉與騏各率所部擊敗之薦騏遷雷州通判未聞命戰死贈同知廕其子爲國子生成化元年二月新會告急吉率指揮閩華掌縣事同知陶魯合軍萬人至大磴破賊乘勝追至雲岫山去賊營十餘里時已乙夜召諸將分三哨黎明進兵會陰晦衆失期及進戰賊棄營走上山吉命潘百戶者據其營衆競取財物賊馳下殺百戶華亦馬蹶爲賊所殺諸軍遂潰吉勒馬大呼止軍吏勸吉避吉曰衆多殺傷我獨生可乎言未已賊持鎗趨吉吉且罵且戰手劍一人斷其臂力絀遂被害是日雷雨大作山谷皆震動又八日始得屍貌如生事聞贈按察使錄其子科入國子監尋登進士終雲南副使方吉出軍時賫千金犒委驛丞余文司出入已用十之三吉旣死文憫其家貧以所餘金授吉僕使持歸治喪是夜僕婦忽坐中堂作吉語顧左右曰請夏憲長來舉家大驚走告按察使夏墟墟至起揖曰吉受國恩不幸死於賊今余文以所遺官銀付吉家雖無文簿可考吉負垢地下矣願亟還官毋污我言畢仆地頃之始甦於

是歸金於官吉死時年四十後賜諡忠襄

林錦字彥章連江人景泰初由鄉貢授合浦訓導猺寇充斥內外無備錦條具方略悉中機宜巡撫葉盛異之檄署靈山縣事城毀於賊錦因形便爲柵以守廣設戰具賊不敢逼滿秩去官民曰公去賊復至誰禦者悉逃入山盛以狀聞詔卽以錦爲知縣馳驛之官民復來歸適歲饑諸猺益剽掠無虛日錦單騎詣壘曉以禍福猺感悟附縣二十五部咸聽命其不服者則討之天順六年破賊羅禾水再破之黃姜嶺又大破之新莊先後斬獲千餘級還所掠人口賊悉平乃去柵築土城盛及監司屢薦其才成化改元會連州爲賊所陷乃以錦爲試知府歲復大饑賊四出劫掠錦諭散千餘人誅梗化者而綏輯其流移境內悉平四年上官交薦請改授憲職令專備欽廉羣盜乃以爲按察使僉事益勤於政十年賜敕旌異久之進副使錦以所部屢有盜警思爲經久計乃設團河營於西設新寮營於南而別設洪崖營以杜諸寇出沒路易靈山土城更築高墉互五百丈卒爲巖邑十四年兵部上其撫輯功被賚錦在兵間以教化爲務靈山尙鬼則禁淫祠修學校勸農桑其治廉欽皆飭學宮振起文教爲人誠實洞見肺腑猺蠻莫不愛信其行軍與士卒同甘苦有功輒推以與人以故士多效死所在祠祀

郭緒字繼業太康人成化十七年進士使楚府却其饋授戶部主事督餉二十萬於陝西給軍主者以羨

告悉還之歷遷雲南參議初孟密宣撫司之設也實割木邦宣慰司地既而孟密思揲復於界外侵木邦地二十七所屢諭之還不聽乃調孟養宣撫思祿兵脅之思揲始還所侵地然多殺孟養兵思祿嘗之發兵越金沙江奪木邦故割孟密地十有三所兩酋構怨不已巡撫陳金承詔遣緒與副使曹玉往諭之旬餘抵金齒參將盧和先統軍距所據地二程而舍遣官馳驛往諭皆留不報和懼還軍至千崖遇緒語故戒勿進緒不可玉以疾辭緒遂單騎從數人行旬日至南甸峻險不可騎乃斬棘徒步引繩以登又旬日至一大澤土官以象輿來緒乘之往行毒霧中泥沙蹶蹕又旬日至孟賴去金沙江僅二舍手自爲檄使持過江諭以朝廷招徠意蠻人相顧驚曰中國使竟至此乎發兵率象馬數萬夜渡江持長槳勁弩環之數重從行者懼請勿進緒拔刀叱曰明日必渡江敢阻者斬思祿旣得檄見臂曉禍福甚備又聞至者纔數人乃遣酋長來聽令且致饋緒却之出敕諭宣示思祿亦繼至緒先敘其勞次白其寃狀然後責其叛諸酋聞咸俛伏呼萬歲請歸侵地緒詰前所留使人乃盡出而歸之和及玉聞報馳至則已歸地納款矣時弘治十四年五月也越三年擢緒四川督儲參政武宗卽位始以雲南功加俸一級明年致仕歸

姜昂字恒頰太倉人成化八年進士除棗強知縣授御史偕同官劾方士李孜省杖午門外以母老乞改南尋出爲河南知府吏白事畢退閤門讀書鞭箠懸不用藩府人有犯立決遣之改知寧波擢福建參政

請終養歸服闋而卒昂在官日市少肉供母而自食菜茹子弟學書不聽用官紙筆家居室不蔽風雨子龍字夢賓正德三年進士歷禮部郎中武宗南巡率同官諫罰跪五日杖幾死出爲建寧同知尋遷雲南副使備兵瀾滄姚安滇故盜藪龍讓土酋曰爾世官縱盜寧非賄乎酋懼撫諭羣盜悉聽命巨盜方定者旣降而貧爲妻妾所誑卒不忍負龍竟仰藥死南安大盜千人御史欲徵兵龍檄三日散盡四川鹽井刺馬仁雲南曬江和歌仲讐殺數十年龍撫諭遂解大候州土官猛國恃險肆暴龍擒之在滇四年番漢大治鄧川州立三正人祠祀袁州郭紳莆田林俊及龍

贊曰陶成陳敏諸人以監司守令著征剿功而成及毛吉葉禎身死王事勞烈顯著亦可以愧戎帥之畏懦賊踰者矣林錦威能臨制材足綏懷邊疆皆得斯人何憂不治郭緒單騎入險諭服兩酋令當洪永間亦何至尙淹常調哉平世秉國者多抑邊功謂恐生事然大帥倚內援敘錄又多踰等適足以長武夫玩寇之心而無以獎勞臣致死之節國家以賞罰馭世曷可不公平乎

明史卷一百六十五終

明史卷一百六十六

列傳第五十四

總裁官總理事務經筵講官少保兼太子太保保和殿大學士兼管吏部戶部尚書事加六級張廷玉等奉
敕修

韓觀

山雲

蕭授

吳亮

方瑛

陳友

李震

王信

都勝
郭鐘

彭倫

歐鑾

張祐

韓觀字彥賓虹人高陽忠壯侯成子也以舍人宿衛忠謹為太祖所知授桂林右衛指揮叟事洪武十九

年討平柳州融縣諸蠻累遷廣西都指揮使二十二年平富川蠻設靈亭千戶所二十五年平賓州上林

蠻二十七年會湖廣兵討全州灌陽諸徭斬千四百餘人明年捕禽宜山諸縣蠻斬其偽王及萬戶以下

二千八百餘人以征南左副將軍從都督楊文討龍州土官趙宗壽宗壽伏罪移兵征南丹奏議及都康

向武高勞上林思恩都亮諸蠻先後斬獲萬餘級觀生長兵間有勇略性鷙悍誅罰無所假下令如山人

莫敢犯初羣蠻所在蜂起剽郡縣殺守吏勢甚熾將士畏觀法爭死鬪觀得賊必處以極刑間縱一二使

歸告諸蠻諸蠻膽落由是境內得安二十九年召還進都督同知明年復從楊文討平吉州及五開叛苗

與顧成討平水西諸蠻堡還理左府事建文元年練兵德州禦燕師無功成祖即位委任如故命往江西

練軍城守兼節制廣東福建湖廣三都司廬陵民嘯聚山澤帝不欲用兵遣行人許子謨齋敕招諭命觀
臨撫之觀至衆皆復業賜璽書褒勞命佩征南將軍印鎮廣西節制兩廣官軍帝知觀嗜殺賜璽書戒之
曰蠻民易叛難服殺愈多愈不治卿往鎮務綏懷之毋專殺僇會羣蠻復叛帝遣員外郎李宗輔齋敕招
之觀大陳兵示將發狀而遣使與宗輔俱桂林蠻復業者六千家惟思恩蠻未附而慶遠柳潯諸蠻方殺
掠吏民乃上章請討永樂元年與指揮葛森等擊斬理定諸縣山賊千一百八十有奇擒其酋五十餘人
斬以徇還所掠男女於民而撫輯其逃散者明年遣都指揮朱輝諭降宜山忻城諸山寨荔波猺震恐乞
爲編戶帝屬觀撫之八十餘洞皆歸附明年潯桂柳三府蠻作亂已撫復叛遣朱輝以偏師破之蠻大懼
會朝廷遣郎中徐子良至遂來降歸所掠人畜器械四年大發兵討安南詔觀畫方略轉粟二十萬石餉
軍已復命偕大理卿陳洽選土兵三萬會太平仍令觀偵安南賊中動靜尋從大兵發憑祥抵坡壘關以
所部營關下伐木治橋梁給軍食安南平命措置交趾緣途諸堡而柳潯諸蠻乘觀出復叛五年觀旋師
抵柳州賊望風遁匿觀請俟秋涼深入且請濟師帝使使發湖廣廣東貴州三都司兵又敕新城侯張輔
遣都督朱廣方政以征交趾兵協討十月諸軍皆集分道進剿觀自以貴州兩廣兵由柳州攻馬平來賓
遷江賓州上林羅城融縣皆破之會兵象州復進武宣東鄉桂林貴平永福斬首萬餘級禽萬三千餘人

羣蠻復定捷聞帝嘉勞之九年拜征夷副將軍仍佩故印總兵鎮交趾明年復命轉粟給張輔軍輔再出師定交趾觀皆主饋運不爲將故功不著觀在廣西久威震南中蠻人惴惴奉命繼之者自山雲外皆不能及十二年九月卒無子宣德二年保定伯梁銘奏求觀南京故宅帝許之既聞觀妻居其中曰觀功臣也雖歿豈可奪之遂不許令有司以他宅賜銘

山雲徐人父青以百戶從成祖起兵積功至都督僉事雲貌魁梧多智略初襲金吾左衛指揮使數從出塞有功時幼軍二十五所隸府軍前衛掌衛者不任事更命雲及李玉等五人撫戢之仁宗立擢行在中軍都督僉事宣德元年改北京行都督府命偕都御史王彰自山海抵居庸巡視關隘以便宜行事帝征樂安召輔鄭王襄王居守明年柳慶蠻韋朝烈等掠臨桂諸縣時鎮遠侯顧興以不救邱溫被逮公侯大臣舉雲帝亦自知之三年正月命佩征蠻將軍印充總兵官往鎮雲至討朝烈破之賊保山巔山峻險掛木於藤壘石其上官軍至輒斷藤下木石無敢近者雲夜半束火牛羊角以金鼓隨其後驅向賊賊謂官軍至亟斷藤比明木石且盡衆譟而登遂盡破之南安廣源諸蠻悉下是夏忻城蠻譚團作亂雲討禽之四年春討平柳濬諸蠻其秋維容蠻出掠遣指揮王綸破之雲上綸功並劾其殺良民罪帝宥綸而心重雲廣西自韓觀卒後諸蠻漸橫雲以廣西兵少留貴州兵爲用先後討平濬柳平樂桂林宜山思恩諸蠻

九年又以慶遠鬱林苗獠非大創不服請濟師詔發廣東兵千五百人益雲雲分道剿捕禽斬甚衆復遣指揮田真攻大藤峽賊破之雲在鎮先後大戰十餘斬首萬二千二百六十降賊酋三百七十奪還男女二千五百八十築城堡十三鋪舍五百陶磚鑿石增高益厚自是獠獞屏跡居民安堵論功進都督同知璽書襲勞雲謀勇深沉而端潔不苟取公賞罰嚴號令與士卒同甘苦臨機應變戰無不捷廣西鎮帥初至士官饋獻爲故事帥受之卽爲所持雲始至聞府吏鄭牢剛直召問曰饋可受乎牢曰潔衣被體一污不可滿將軍新潔衣也雲曰不受彼且生疑奈何牢曰黷貨法當死將軍不畏天子法乃畏土夷乎雲曰善盡却饋獻嚴馭之由是士官畏服調發無敢後者雲所至詢問里老撫善良察誣枉土人皆愛之英宗卽位雲墜馬傷股帝遣醫馳視以病請代優詔不許進右都督正統二年上言潯州與大藤峽諸山相錯搖寇出沒占耕旁近田左右兩江士官所屬人多田少其狼兵素勇爲賊所畏若量撥田州土兵於近山屯種分界耕守斷賊出入不過數年賊必坐困報可嗣後東南有急輒調用狼兵自此始也明年冬卒於鎮贈懷遠伯諡忠毅長子俊襲府軍前衛指揮使廣西人思雲不置立祠肖像祀焉初韓觀鎮廣西專殺戮慶遠諸生來迓觀曰此皆賊覘我也悉斬之雲平恕參佐有罪輒上請不妄殺人人亦不敢犯鄭牢嘗慮事觀觀醉輒殺人牢輒留之醒乃以白牢爲士大夫所重然竟以隸終

蕭授華容人由千戶從成祖起兵至都指揮同知永樂十六年擢右軍都督僉事充總兵官鎮湖廣貴州宣德元年鎮遠邛水蠻銀總作亂指揮祝貴往撫被殺授遣都指揮張名破斬之貴州宣慰所轄乖西巴香諸峒寨山箐深險諸蠻錯居攻剽他部傷官軍發民塚而昆阻比諸寨亦恃險不輸賦二年授遣都指揮蘇保會宣慰宋斌攻破昆阻比寨窮追斬僞王以下數百人乖西諸蠻皆震懾歸命水西蠻阿閉妨宜作亂授結旁寨會以計誅之而西堡蠻阿骨等與寨底豐寧清平平越普安諸苗復相聚爲寇四川筠連諸蠻應之授且捕且撫諸蠻先後聽命承制赦之以豐寧會稔惡械送京師伏誅七年諭降安隆會岑俊已討辰州蠻禽其酋八十斬馘無算移兵擊江華苗討富川山賊先後破禽之先是貴州治古答意二長官司苗數出掠授築二十四堡環其地分兵以戍賊不得逞久之其酋吳不爾覘官軍少復掠清浪殺官吏授遣張名擊破之賊走湖廣境結生苗勢復張授乃發黔楚蜀軍分道捕討進軍草子坪誅不爾斬首五百九十餘級賊悉平九年都勻蠻爲亂引廣西賊入掠授遣指揮陳原顧勇分道邀擊獲賊首韋萬良等降下合江蔡郎等五十餘寨英宗卽位命佩征蠻副將軍印鎮守如故念授年老以都督僉事吳亮副之正統元年曹定蠻阿遲等叛僭稱王四出攻掠授遣顧勇等擣其巢破之而廣西蒙顧十六洞與湖廣逃民相聚蜂起授督兵圍之再戰悉禽斬其酋餘黨就誅捷聞進右都督上言靖州與廣西接壤時苦苗

患永樂宣德間嘗儲糧數萬石備軍興比年儲糧少有警發人徒轉輸賊輒先覺以故不能得賊乞於清浪靖州二衛各增儲五萬石庶緩急可藉報可四年貴州計沙賊苗金蟲苗總牌糾紅江生苗作亂僞立統千侯統萬侯號授督兵抵計沙分遣都指揮鄭通攻三羊洞馬驢攻黃柏山大破之吳亮窮追至蒲頭紅江斬總牌千戶尹勝誘斬金蟲於是生苗盡降授沉毅多計算裨校皆盡其材而馭軍嚴整自鎮遠侯顧成歿羣蠻所在屯結官軍討之皆無功授在鎮二十餘年規畫多本於成久益明練威信大行寇起輒滅前後諸帥莫及也論功進左都督是年六月召還以老致仕尋起視事右府十年卒贈臨武伯諡靖襄吳亮來安人永樂初爲旗手衛指揮僉事宣德中署湖廣都指揮僉事尋以右副總兵與王瑜督漕運英宗初討新淦賊有功累進都督僉事副授鎮湖廣貴州破普定蠻進都督同知平計沙苗進右都督方政歿於麓川召亮還京命爲副總兵將兵五萬往討至雲南賊益熾坐金齒參將張榮敗不救逮下獄左遷都督僉事仍佩征南副將軍印鎮湖廣貴州討平四川都掌蠻尋召還視右府事正統十一年卒亮姿貌魁梧性寬簡不喜殺僇所至蠻人懷附好讀書至老手不釋卷

方瑛都督政之子正統初以舍人從父征麓川父戰死瑛發憤矢報父讐初襲指揮使已論政死事功遷都指揮同知六年從王驥征麓川帥兵六千突賊壘賊渠衣黃衣帳中瑛直前左右擊斬數百人矚死者

無算遂平其地進都指揮使尋復從驥破貢章沙壩阿嶺諸蠻進都督僉事池後府事充右參將協守雲南十三年復從驥征麓川破鬼山大寨留鎮雲南景泰元年廷議以瑛有將略命都督毛福壽代還進都督同知甫抵京而貴州羣苗叛道梗驥請瑛還討其年四月拜右副總兵與保定伯梁瑄侍郎侯璉次第破走之進右都督復破賞改諸砦爲苗王王阿同等璉卒都御史王來代督軍務分道擊賊香爐山瑛入自龍場大破平之三年秋來劾瑛違法事置不問來召還命瑛鎮守貴州其冬討白石崖賊俘斬二千五百人招降四百六十砦進左都督五年四川草塘苗黃龍韋保作亂自稱平天大王剽播州西坪黃灘瑛與巡撫蔣琳會川兵進剿賊魁皆就縛因分兵克中潮山及三百灘乖西谷種乖立諸砦執僞王谷蟻丁等斬首七千餘詔封南和伯瑛爲將嚴紀律信賞罰臨陳勇敢善撫士士皆樂爲用以故數有功廷巨言宜委以禁旅乃召還同石亨督京營軍務明年琳奏瑛前守貴州邊境寧苗蠻畏服乞遣還帝不許未幾湖廣苗叛拜瑛平蠻將軍率京軍討之而使御史張鵬偵其後還奏瑛所過秋毫無犯帝大喜七年賊渠蒙能攻平溪衛都指揮鄭泰等擊却之能中火槍死瑛遂進沅州連破鬼板等一百六十餘砦與尙書石璞移兵天柱率陳友等分擊天堂諸砦復大破之克砦二百七十禽僞侯伯以下一百二人時英宗已復位捷聞璞召還瑛留鎮貴州湖廣瑛討蒙能餘黨克銅鼓藕洞一百九十五砦覃洞上隆諸苗各斬其

渠納款帝嘉瑛功進侯天順二年東苗干把豬等僭偽號攻都勻諸衛命瑛與巡撫白圭合川湖雲貴軍討之克六百餘砦邊方悉定瑛前後克砦幾二千俘斬四萬餘平苗之功前此無與比者尋卒於鎮年四十五帝震悼賜諡忠襄瑛天姿英邁曉古兵法嘗上練兵法及陳圖老將多稱之爲人廉謙和不伐所至鎮以安靜民思之久而不忘子毅嗣伯爵誘祖母誣從父瑞不孝坐奪爵閒住卒子壽祥嗣正德中歷鎮貴州湖廣傳爵至明亡乃絕陳友其先西域人家全椒正統初官千戶累遷都指揮僉事頻年使瓦剌有勞尋復進都指揮使九年充寧夏游擊將軍與總兵官黃真擊兀良哈多獲進都督僉事未幾出塞招答哈卜等四百人來歸景帝卽位進都督同知征湖廣貴州苗尋充左參將守備靖州景泰二年偕王來等擊賊香爐山自萬潮山入大破之留鎮湖廣論功進右都督四年春奏斬苗五百餘級五年又奏斬苗三百餘而都指揮戚安等八人戰死兵部疑首功不實指揮蔡昇亦奏友欺妄命總督石璞廉之斬獲僅三四十人陷將士千四百人宜罪詔令殺賊自効天順元年隨瑛征天堂諸苗大獲命充左副總兵仍鎮湖廣已又偕瑛破蒙能餘黨召封武平伯予世券孛來犯邊充游擊將軍從安遠侯柳溥等往禦率都指揮趙瑛等與戰敵敗遁再犯鎮番復擊却之俘百六十人尋佩將軍印充總兵官討寧夏寇先是寇大入甘涼溥及總兵衛穎等不能禦惟友稍獲至是巡撫芮釗列諸將失事狀兵部請免友罪詔並宥溥等召還

進侯卒傳子至孫綱弘治中請友贈諡詔贈沔國公諡武僖綱傳子勳及熹嘉靖中吏部以友征苗功多冒濫請停襲帝不從熹子大策復得嗣至明亡乃絕

李震南陽人父謙都督僉事震襲指揮使正統九年從征兀良哈有功進都指揮僉事已從王驥平麓川進同知景帝卽位充貴州右參將擊苗於偏橋敗之景泰二年從王來征韋同烈破鎖兒流源諸砦俘斬千六百人共克香爐山獲同烈進都指揮使守靖州尋坐罪徵還方瑛討苗乞震隨軍詔許立功贖己從瑛大破天堂諸苗仍充左參將瑛平銅鼓諸賊震亦進武崗克牛欄等五十四砦斬獲多進都督僉事天順中復從瑛平貴東苗干把豬瑛卒卽以震充總兵官代鎮貴州湖廣初麻城人李添保以逋賦逃入苗中僞稱唐太宗後衆萬餘僭王建元武烈剽掠遠近震進擊大破之添保遁入貴州鬼池諸苗中復誘羣苗出掠震禽之送京師尋破西堡苗五年春剿城步徭獍攻橫水城溪莫宜中平諸砦皆破之長驅至廣西西延會總兵官過興軍克十八團諸徭前後俘斬數千人其冬命震專鎮湖廣以李安充總兵守貴州明年夏率師由錦田江華抵雲川貴嶺橫江諸砦破徭俘斬二千八百餘人七年冬苗據赤谿浦洞長官司震與安分道進斬賊渠飛天侯等破砦二百遂復長官司進都督同知明年冬廣西徭侵湖南夜入桂陽州大掠震遣兵分道追擊連敗之俘斬千餘人成化改元守備靖州都指揮同知莊榮奏貴州黎平諸

府密邇湖廣五開諸衛非大將總領不可乃復命震兼鎮貴州未幾獲賊首苗蟲蝦荆襄賊劉千斤石和尙爲亂震進討賊屢敗乘勝追及於梅溪賊巢官軍不利都指揮以下死者三十八人有詔切責白圭等大軍至震自南漳進兵合擊大破之賊遂平論功進右都督時武崗沅靖銅鼓五開苗復蜂起而貴州亦告警震言貴州終難遙制請專鎮湖廣許之乃遣兵由銅鼓天柱分四道進連破賊直抵清水江因苗爲導深入賊境兩月間破巢八百焚廬舍萬三千斬獲三千三百而廣西徭劫桂陽者亦擊斬三千八百有奇當是時震威名著西南苗獠聞風畏懼呼爲金牌李七年與項忠討平流賊李原招撫流民九十萬人荆襄遂定語具忠傳十一年苗復犯武崗靖州湖湘大擾震與巡撫劉敷等分五道進破六百二十餘砦俘斬八千五百餘人獲賊孥萬計論功封興寧伯時武靖侯趙輔寧晉伯劉聚皆以功封論者多訾議之獨震功最高人無異言參將吳經者與震有隙弟千戶綬爲汪直腹心經屬綬譖之會直方傾項忠詞連震遂逮下獄奪爵降左都督南京閒住未幾直遣校尉緝事言震陰結守備太監覃包私通貨賂帝怒遣直赴南京數包等罪責降包孝陵司香勒震回京直敗震訴復爵尋卒震在湖湘久熟知苗情善用兵一時征苗功方瑛後震爲最然貪功好進事交結竟以是敗

王信字君實南鄭人生半歲父忠征北戰歿母岳氏苦節育之後俱獲旌正統中信襲寬河衛千戶成化

初積功至都指揮僉事守備荆襄劉千斤反信以房縣險進據之民兵不滿千人賊眾四千突至圍其城拒四十餘日選死士出城五六里舉礮賊疑援至驚走追敗之已白圭統大軍至以信爲右參將分道抵後巖山賊遂滅論功進都指揮同知賊黨石龍復陷巫山信與諸將共平之而流民仍嘯荆襄南陽間信以爲憂言於朝卽命信兼督南陽軍務賊首李原等果亂信復與項忠討平之擢署都督僉事鎮守臨清十三年以本官佩平蠻將軍印移鎮湖廣永順保靖二宣慰世相讐殺信諭以禍福兵卽解靖州及武崗蠻久不戢守臣議剿之信親詣犒以牛酒責其無狀衆稽顙服罪十七年疏言湖廣諸蠻雖腹心蠹實無能爲久不靖者由我將士利其竊發以邀功也選精銳慎隄防其患自息荆襄流逋本避徭役濫誅恐傷天和南畝之氓咸無蓄積收穫未竟餓糧已空機杼方停布縷何在乞選公正仁惠守令加意撫綏濫授冗員無慮千百無一矢勞冒崇階之賞乞察勘削奪部指揮劉斌張全智勇力薦於朝且云英雄之士處心剛正安肯俯首求媚若不加意延訪則志士沉淪朝廷安得而用之二十一年巡撫馬馴等言副總兵周賢參將彭倫官皆都督僉事而信反止署職宜量進一秩以重其權兵部言信無軍功帝特擢爲都督同知頃之改總督漕運帥府舊有湖擅爲利信開以泊漕艘勢要壅水一裁以法漕務修舉明年卒信沉毅簡重好觀書被服儒雅歷大鎮不營私產嘗曰儉足以久死後不累子孫所遺多矣故人婚喪傾資助

之子繼善從善皆舉進士繼信總漕運者寧津都勝合肥郭鉉勝襲職南京羽林左衛指揮僉事鉉襲彭城衛指揮使成化初勝擢署都指揮僉事而鉉亦以從征荔浦功進都指揮僉事中武舉遷同知勝備倭揚州擊敗鹽徒爲亂者尹旻等舉勝將才鉉亦爲張懋所舉乃命勝充參將協同漕運而鉉代之備倭陝西大饑勝奉詔輸米百萬石往振信卒遂遷署都指揮使充總兵官代之鉉代勝爲參將弘治中勝以都督僉事帶俸南京前府時鉉已鎮守廣西副總兵破府江獐賊遂以時望擢總漕運鉉沉毅有將略而勝無汗馬勳徒以居官廉靜故頗有任使歷任五十七年所處皆膏腴地而自奉簡淡日食止豆腐時因以爲號鉉累進都督同知凡軍民利病多陳於朝嘗濬通州河二十里置壩合淺船搬運歲省白金數萬當孝宗時朝政整肅文武大臣率得人鉉筦漕十三年不易正德初始召佐後府尋卒

彭倫初職爲湖廣永定衛指揮使累功至都指揮同知成化初從趙輔平大藤峽賊進都指揮使守備貴州清浪諸處討破茅坪銅鼓叛苗賊掠乾溪倫討之賊還所掠與盟而退倫以賊入時道邛水諸砦不卽邀遏乃下令賊入境能生致者予重賞縱者置諸法由是諸司各約所屬凡生苗軼入卽禽之送帳下者彙彙倫大會所部目把縛俘囚寘高竿集健卒亂射殺之復割裂肢體烹噉諸壯士罪輕者截耳鼻使去曰以此讖再犯不赦矣因令諸砦樹牌爲界羣苗股栗不敢犯明年充右參將仍鎮清浪益盡心邊計戎

事畢舉妖賊石全州潛入殺洞煽動古州苗洪江甘篆諸苗咸應之倫遣兵截禽並搜獲其妻子諸苗將攻鎮遠倫大敗之斬首及墮崖死者無算無何邛水十四砦苗糾洪江生苗爲逆倫分五哨往甫行雨如注倫曰賊不虞我急趨之可得志也競進夾攻斃其魁俘斬餘黨賊盡平靖州苗亂湖廣總兵官李震檄倫會討軍至邛水江諸熟苗驚欲竄倫與僉事李冕計曰苗竄必助賊乃急撫定之又緣道降天堂小坪諸苗既抵靖州倫將右哨出賊背布營賊走據高山倫軍仰攻之賊敗走遂渡江搗其巢大獲乘勝攻白崖塘崖高萬仞下臨深淵稱絕險倫會左哨同進得徑路夜登賊倉皇潰追斬二千餘級俘獲如之盡夷其砦初臻剖六洞苗侵熟苗田不輸賦又不供驛馬有司莫敢問倫遣人諭之頓首請如制錄功進都督僉事久之御史鄧庠員外郎費瑄勘事貴州總兵官吳經等皆被劾獨薦倫智謀老成弘治初經論罷卽以倫代倫用師先計後戰故多功四年以老致仕卒予卹如制

歐磐滁人襲世職指揮使成化中擢廣東都指揮僉事屢剿蠻寇有功用總督朱英薦充廣西右參將分守柳州慶遠與左參將馬義討融縣八砦搖克之師旋餘賊復出掠被劾帝絀磐等功但卹死事家搖賊方公強亂兵部劾總鎮中官顧恆並及磐當謫戍督撫奏磐所守乃搖種出沒地磐募死士夜入賊巢斬其渠胡公返威震羣蠻論功可贖罪帝乃宥之還故任二十三年鬱林陸川賊黃公定胡公明等亂磐偕

按察使陶魯等分五道攻破之進都指揮同知弘治初謝病解職總督奏紘言磐多歷戰陳有才守乞起用詔還任八年府江永安諸獠亂總督閔珪調兵六萬分四哨往討磐自象州修仁直搗陸峒所向摧破已僭諸軍連破山砦百八十斬首六千有奇進都指揮使遷廣西副總兵思恩土官岑濬築石城於丹夏莊截江括商利帥府令毀之不聽磐自田州還督兵將毀城濬率衆拒擊敗之卒夷其城都御史鄧廷瓚等以磐功多言於朝進都督僉事十五年命佩平蠻將軍印鎮守湖廣磐爲將廉能得士久鎮南邦蠻人畏服十八年請老又二年卒祭葬如制

張祐字天祐廣州人幼好學能文弘治中襲世職爲廣州右衛指揮使年十九從總督潘蕃征南海寇禡元祖先登有功正德二年擢署都指揮僉事守備德慶瀘水獠獠負險者聞其威信稍稍遁去總督林廷選引爲中軍事無大小咨焉守備惠潮擣盜魁劉文安李通寶穴平之遷廣西右參將分守柳慶總督陳金討府江賊命祐進沈沙口大破之增俸一等擢副總兵鎮守廣西尋進署都督僉事古田諸獠獠亂祐嘗先年征討率倚兩江土兵賞不酬勞今調多失期乞定議優資從之督都指揮沈希儀等討臨桂灌陽諸獠斬首五百餘級璽書獎勞又連破古田賊俘斬四千七百進署都督同知已復討平洛容肇慶平樂諸蠻增俸一等蔭子世百戶嘉靖改元母喪哀毀骨立尋以疾乞休還衛初上思州土目黃鏐作亂祐購

其黨黃廷寶縛獻之總督張嶺惡祐不自已至劾祐懷奸避難速繫德慶獄數上書訟冤釋令聞住處蘇王受亂田州總督姚鎮召至軍中待以賓禮多所裨贊後王守仁代鎮詢撫剿之宜祐曰以夷治夷可不煩兵而下守仁納之蘇受果效順因命祐部分其衆事寧守仁言思田初定宜設一副總兵鎮之請卽以命祐報可破封川賊盤古子又剿廣東會寧劇賊邱區長等斬首一千二百勒銘大隆山十一年楊春賊趙林花陷高州總督陶諧檄祐討深入多所斬獲忽中危疾卒軍中爲哀慟祐身長八尺智識絕人取軍有節制與下同甘苦不營私產性好書每載以自隨軍暇卽延儒生講論嘗過烏巒灘謁馬伏波祠太息曰歿不俎豆其間非夫也題詩而去後田州人立祠橫山祀之

贊曰苗蠻阻險自固易動難服自其性然而草薶禽獮濫殺邀功貪貨賄興事端控取乖方綏懷無策則鎮將之過也韓觀諸人雖功最焯著而皆以威信震懾蠻荒若山雲王信張祐之廉儉有守士君子何以過故尤足尙云

明史卷一百六十六終

總裁官總理事務 經筵講官少保兼太子太保保和殿大學士兼管吏部戶部尚書事加六級張廷玉等奉

敕修

曹鼎

張益

鄭埜

王

佐丁鈺等孫

祥

謝澤

袁彬

哈銘

敏袁

曹鼎字萬鍾寧晉人少伉爽有大志事繼母以孝聞宣德初由鄉舉授代州訓導願授別職改太和縣典

史七年督工匠至京師疏乞入試復中順天鄉試明年舉進士一甲第一賜宴禮部進士宴禮部自鼎始

入翰林為修撰正統元年充經筵講官宣宗實錄成進侍講錫三品章服五年以楊榮楊士奇薦入直文

淵閣參預機務鼎為人內剛外和通達政體榮既歿士奇常病不視事閣務多決於鼎帝以為賢進翰林

學士十年進吏部左侍郎兼學士十四年七月也先入寇中官王振挾帝親征朝臣交章諫不聽鼎與張

益以閣臣扈從未至大同士卒已乏糧宋瑛朱冕全軍沒諸臣請班師振不許趣諸軍進大將朱勇膝行

聽命尚書鄭埜王佐跪草中至暮不得請欽天監正彭德清言天象示警若前恐危乘輿振言曰爾何知

若有此亦天命也鼎曰臣子固不足惜主上繫天下安危豈可輕進振終不從前驅敗報踵至始懼欲還

定襄侯郭登言於鼎益曰自此趨紫荆四十餘里駕宜從紫荆入振欲邀帝至蔚州幸其第不聽復折

而東趨居庸八月辛酉次土木地高掘地二丈不及水瓦刺大至據南河明日佯却且遣使通和帝召龔
草詔答之振遽令移營就水行亂寇騎蹂陣入帝突圍不得出擁以去龔益等俱及於難景帝立贈龔少
傅吏部尚書文淵閣大學士諡文襄官其子恩大理評事英宗復位加贈太傅改諡文忠復官其孫榮錦
衣百戶龔弟鼎進士歷吏科都給事中張益字士謙江寧人永樂十三年進士由庶吉士授中書舍人改
大理評事與修宣宗實錄成改修撰博學強記詩文操筆立就三楊雅重之尋進侍讀學士正統十四年
入文淵閣未三月遽蒙難以歿景帝立贈學士諡文僖曾孫琮進士嘉靖初歷官南京右都御史

鄭埜字孟質宜章人永樂九年進士授監察御史成祖在北京或奏南京鈔法爲豪民沮壞帝遣埜廉視
衆謂將起大獄埜執一二市豪歸奏曰市人聞令震懼鈔法通矣事遂已倭犯遼東戍守失律者百餘人
皆應死命埜按問具言可矜狀帝爲宥之營造北京執役者鉅萬命埜稽省病者多不死十六年有言秦
民羣聚謀不軌者擢埜陝西按察副使敕以便宜調兵剿捕埜白其誣詔誅妄言者宣德四年振關中饑
在陝久刑政清簡父憂服除擢應天府尹蠲苛急政市征田稅皆酌其平正統元年進兵部右侍郎明年
尚書王驥出督軍埜獨任部事時邊陲多警將帥乏人埜請令中外博舉謀略材武士以備任使六年山
東災埜請寬民間孳牧馬賠償之令以甦其力十年進尚書舊例諸衛自百戶以下當代者必就試京師

道遠無資者終身不得代。桎請就令各都司試之人以爲便。瓦刺也先勢盛，桎請爲備。又與廷臣議上方略，請增大同兵，擇智謀大臣巡視西北邊務。尋又請罷京營兵修城之役，令休息以備緩急。時不能用也。先入寇，王振主親征，不與外廷議。可否詔下。桎上疏言也。先入犯一邊，將足制之。陛下爲宗廟社稷，主奈何不自重不聽。既扈駕出關，力請回鑾。振怒，令與戶部尙書王佐皆隨大營。桎墜馬幾殆，或勸留懷來城，就醫。桎曰：至尊在行，敢託疾自便乎？車駕次宣府，朱勇敗沒。桎請疾驅入關，嚴兵爲殿，不報。又詣行在，申請振怒曰：腐儒安知兵事？再言者死。桎曰：我爲社稷生靈言，何懼？振叱左右扶出。桎與佐對泣帳中。明日師覆桎死。年六十五。桎爲人勤廉端謹，性至孝。父子輔爲句容教官，教桎甚嚴。桎在陝久思一見父，乃謀聘父爲鄉試考官。父怒曰：子居憲司而父爲考官，何以防閑？馳書責之。桎又嘗寄父褐，復貽書責曰：汝掌刑名，當洗冤釋滯，以無忝任。使何從得此褐？乃以汚我封還之。桎奉書跪誦泣受。教景泰初，贈桎少保官。其子儀爲主事，成化初諡忠肅。

王佐，海豐人。永樂中舉於鄉，卒業太學，以學行聞。擢吏科給事中，器宇凝重，奏對詳雅。爲宣宗所簡注。宣德二年，超拜戶部右侍郎。以太倉臨清德州淮徐諸倉多積弊，敕佐巡視平江。伯陳瑄言漕卒十二萬人歲漕艱苦，乞僉南方民如軍數，更番轉運。詔佐就瑄及黃福議之。佐還奏東南民力已困，議遂寢。受命治

通州至直沽河道已赴宣府議屯田事宜英宗初立出鎮河南奏言軍衛收納稅糧奸弊百出請變其制
廷議自邊衛外皆改隸有司尋召還命督理甘肅軍餉正統元年理長蘆鹽課三年提督京師及通州倉
場所至事無不辦六年尙書劉中敷得罪召理部事尋進尙書十一年承詔訊安鄉伯張安兄弟爭祿事
坐與法司相譏被劾下吏獲釋時軍旅四出耗費動以鉅萬府庫空虛佐從容調劑節縮有方在戶部久
不爲赫赫名而寬厚有度政務糾紛未嘗廢學人稱其君子土木之變與鄭瑄丁鉉王永和鄧棨同死難
贈少保官其子道戶部主事成化初諡忠簡丁鉉字用濟豐城人永樂中進士授太常博士歷工刑吏三
部員外郎進刑部郎中正統三年超拜刑部侍郎九年出理四川茶課奏減其常數以俟豐歲振饑江淮
及山東河南民咸賴之平居恂恂若無能臨事悉治辦從征歿贈刑部尙書官其子琥大理評事後諡襄
愍王永和字以正崑山人少至孝父病伏枕十八年侍湯藥無少懈永樂中舉於鄉歷嚴州饒州訓導以
寔議薦爲兵科給事中嘗劾都督王或鎮薊州縱寇及錦衣馬順不法事持節冊韓世子妃札中官寔劾
罪以勁直聞正統六年進都給事中八年擢工部右侍郎從征歿贈工部尙書官其子汝賢大理評事後
諡襄敏鄧棨字孟擴南城人永樂末年進士授監察御史奉敕巡按蘇松諸府期滿將代去父老赴闕乞
留得請旋以憂去宣德十年陝西關按察使詔廷臣舉清慎有威望者楊士奇薦棨遂以命之正統十年

入爲右副都御史北征扈從師出居庸關疏請回鑾以兵事專屬大將至宣府大同復再上章皆不報及
遇變同行者語曰吾輩可自脫去槩曰鑾輿失所我尙何歸主辱臣死分也遂死贈右都御史官其子端
大理評事後諡襄敏英宗之出也備文武百官以行六師覆於土木將相大臣及從官死者不可勝數英
國公張輔及諸侯伯自有傳其餘姓氏可考者卿寺則龔全安黃養正戴慶祖王一居劉容凌壽給事御
史則包良佐姚銑鮑輝張洪黃裳魏貞夏誠申祐尹竑童存德孫慶林祥鳳庶寮則齊汪馮學明王健程
思溫程式遠端俞鑑張璿鄭瑄俞拱潘澄錢昂馬預尹昌羅如塘劉信李恭石玉景帝立旣贈卹諸大臣
自給事御史以下皆降敕褒美錄其子爲國子生一時卹典甚備云龔全安蘭谿人進士授工科給事中
累遷左通政歿贈通政使黃養正名蒙以字行瑞安人以善書授中書舍人累官太常少卿歿贈太常卿
戴慶祖溧陽人王一居上元人俱樂舞生累官太常少卿歿俱贈太常卿包良字佐克忠慈谿人進士授
吏科給事中鮑輝字淑大浙江平陽人進士授工科給事中數有建白張洪安福人黃裳字元吉曲江人
俱進士授御史裳嘗言盜紹台三府疫死三萬人死者宜蠲租存者宜振恤巡視兩浙鹽政請卹水災報
可魏貞懷遠人進士官御史申祐字天錫貴州婺川人父爲虎齧祐持梃奮擊之得免舉於鄉入國學帥
諸生教祭酒李時勉旋登進士拜四川道御史以謇諤聞尹竑字太和巴人童存德字居敬蘭谿人俱進

士官御史林祥鳳字鳴皋莆田人由鄉舉授訓導擢御史齊汪字源澄天台人以進士歷兵部車駕司郎中程思溫婺源人程式常熟人遂端仁和人俱進士官員外郎俞鑑字元吉桐廬人以進士授兵部職方司主事駕北征郎中胡寧當從以病求代鑑慷慨許諾或曰家遠子幼奈何鑑曰爲國臣子敢計身家尙書鄭楚知其賢數與計事鑑曰惟力勸班師耳時不能用張瑋字廷玉慈谿人進士授刑部主事尹昌吉水人進士官行人司正羅如塘字本崇廬陵人進士授行人從北征瀕行訣妻子誓以死報國屬翰林劉儼銘其墓儼驚拒之如塘笑曰行當驗耳後數日果死劉容太僕少卿凌壽尙寶少卿夏誠孫慶皆御史馮學明郎中王健員外郎俞拱潘澄錢昂皆中書舍人馬預大理寺副劉信夏官正李蒸石玉序班里居

悉無考

孫祥大同人正統十年進士授兵科給事中擢右副都御史守備紫荆關也先逼關都指揮韓青戰死祥堅守四日也先由間道入夾攻之關破祥督兵巷戰兵潰被殺言官誤劾祥棄城遁寇退有司修關得其屍戰地焚而瘞之不以聞祥弟祺詣闕言寃詔卹其家成化改元錄其子紳爲大理寺右評事又謝澤者上虞人永樂十六年進士由南京刑部主事出爲廣西參政正統末擢通政使守備白羊口王師敗於土木守邊者無固志澤與其子儼訣而行受事未數日也先兵大入守將呂鐸遁澤督兵扼山口大風揚沙

不辨人馬或請移他關避敵澤不可寇至衆潰澤按劍厲聲叱賊遂被殺事聞遣官葬祭錄儼爲大理評事

袁彬字文質江西新昌人正統末以錦衣校尉扈帝北征土木之變也先擁帝北去從官悉散獨彬隨侍不離左右也先之犯大同宣府逼京師皆奉帝以行上下山坂涉溪澗冒危險彬擁護不少懈帝駐蹕土城欲奉書皇太后貽景帝及諭羣臣以彬知書令代草帝旣入沙漠所居止毳帳敝幃旁列一車一馬以備轉徙而已彬周旋患難未嘗違忤夜則與帝同寢天寒甚恆以脅温帝足有哈銘者蒙古人幼從其父爲通事至是亦侍帝帝宣諭也先及其部下嘗使銘也先輩有所陳請亦銘爲轉達帝獨居甍廬南望悵鬱二人時進諧語慰帝帝亦爲解顏中官喜寧爲也先腹心也先嘗謂帝曰中朝若遣使來皇帝歸矣帝曰汝自送我則可欲中朝遣使徒費往返爾寧聞怒曰欲急歸者彬也必殺之寧勸也先西犯寧夏掠其馬直趨江表居帝南京彬銘謂帝曰天寒道遠陛下又不能騎空取凍飢且至彼而諸將不納奈何帝止寧計寧又欲殺二人皆帝力解而止也先將獻妹於帝彬請駕旋而後聘帝竟辭之也先惡彬銘二人欲殺者屢矣一日縛彬至曠塹將支解之帝聞如失左右手急趨救乃免彬嘗中寒帝憂甚以身壓其背汗浹而愈帝居漠北期年視彬猶骨肉也及帝還京景帝僅授彬錦衣試百戶天順復辟擢指揮領事尋

進同知帝眷彬甚奏請無不從內閣商輅既罷彬乞得其居第既又以湫隘乞官爲別建帝亦報從彬娶妻命外戚孫顯宗主之賜予優渥時召入曲宴敘患難時事歡洽如故時其年十二月進指揮使與都指揮僉事王喜同掌衛事二人嘗受中官夏時囑私遣百戶季福偵事江西福者帝乳媪夫也詔問誰所遣二人請罪帝曰此必有主使者遂下福吏得二人受囑狀所司請治時及二人罪帝宥時二人贖徒還職而詔自今受囑遣官者必殺無赦已而坐失囚喜解職彬遂掌衛事五年秋以平曹欽功進都指揮僉事時門達恃帝寵勢傾朝野廷臣多下之彬獨不爲屈達誣以罪請逮治帝欲法行語之曰任汝往治但以活袁彬還我達遂鍛鍊成獄賴漆工楊塤訟寃獄得解然猶調南京錦衣衛帶俸閒住語詳達傳越二月英宗崩達得罪貶官都勻召彬復原職仍掌衛事未幾達徵下獄充軍南丹彬餞之於郊餽以臚成化初進都指揮同知之進都指揮使先是掌錦衣衛者率張權勢罔財賄彬任職久行事安靜十三年擢都督僉事洩前軍都督府卒於官世襲錦衣僉事哈銘從帝還賜姓名楊銘歷官錦衣指揮使數奉使外蕃爲通事孝宗嗣位汰傳奉官銘以塞外侍衛功獨如故以壽卒於官袁敏者金齒衛知事也英宗北征應募從至大同及駕還駐萬全左衛敏見敵騎逼請留精兵三四萬人扼其衝而車駕疾驅入關王振不納六師遂覆敏跳遁上書景帝曰上皇曩居九重所服者袞纁所食者珍羞所居者瓊宮瑤室今駕陷沙漠

服有裘繡乎食有珍羞乎屬有宮室乎臣聞之主辱臣死上皇辱至此臣子何以爲心臣不惜碎首刳心乞遣官一人或就令臣齋書及服御物問安塞外以盡臣子之義臣雖萬死心實甘之命禮部議竟報寢贊曰異哉土木之敗也寇非深入之師國非積弱之勢徒以官豎竊柄狎寇弄兵逆衆心而驅之死地遂致六師撓敗乘輿播遷大臣百官身膏草野夫始之不能制其不出不能使之早旋枕藉疆場無益於敗然值倉皇奔潰之時主辱臣死志異偷生亦可無譏於傷勇矣

明史卷一百六十七終

總裁官總理事務經筵講官少保兼太子太保保和殿大學士兼管吏部戶部尚書事加六級張廷玉等奉
敕修

陳循蕭鐵 王文 江淵 許彬 陳文 萬安彭華

劉珥子鈞 劉吉 尹直

陳循字德遵泰和人永樂十三年進士第一授翰林修撰習朝廷典故帝幸北京命取祕閣書詣行在遂
留侍焉洪熙元年進侍講宣德初受命直南宮日承顧問賜第玉河橋西巡幸未嘗不從進侍講學士正
統元年兼經筵官久之進翰林院學士九年入文淵閣典機務初廷議天下吏民建言章奏皆三楊主之
至是榮士奇已卒循及曹鼐馬愉在內閣禮部援故事請帝以楊溥老宜優閒令循等預議明年進戶部
右侍郎兼學士土木之變人心洶懼循居中所言多採納進戶部尚書兼職如故也先犯京師請敕各邊
精騎入衛馳檄回番以疑敵帝皆從其計景泰二年以葬妻與鄉人爭墓地為前後巡按御史所不直循
輒訐奏給事中林聰等極論循罪帝是聰言而置循不問循本以才望顯及是素譽墮焉二年十二月進
少保兼文淵閣大學士帝欲易太子內畏諸閣臣先期賜循及高穀白金百兩江淵王一盃蕭鐵半之比

下詔議循等遂不敢靜加兼太子太傅尋以太子令旨賜百官銀帛踰月帝復賜循等大人黃金五十兩進華蓋殿大學士兼文淵閣如故循子英及王文子倫應順天鄉試被黜相與搆考官劉儼黃諫爲給事中張寧等所劾帝亦不罪英宗復位于謙王文死杖循百戍鐵嶺衛循在宣德時御史張楷獻詩忤旨循曰彼亦忠愛也遂得釋御史陳祚上疏觸帝怒循婉爲解得不死景帝朝嘗集古帝王行事名勤政要典上之河南江北大雪麥苗死請發帑市麥種給貧民因事進言多足採者然久居政地刻躁爲士論所薄其嚴譴則石亨輩爲之非帝意也亨等旣敗循自貶所上書自訟言天位陛下所固有當天與人歸之時羣臣備法駕大樂恭詣南內奏請臨朝非特宮禁不驚抑亦可示天下萬世而亨等傲倖一時計不出此卒皆自取禍敗臣服事累葉曾著微勞實爲所擠惟陛下憐察詔釋爲民一年卒成化中于謙事雪循子引例請卹乃復官賜祭同呂蕭鑑字孟勤宣德二年進士需次於家八年帝命楊溥合選三科進士拔二十八人爲庶吉士鑑爲首英宗卽位授編修正統三年進侍讀久之代李時勉爲國子監祭酒景泰元年以老疾辭旣得允監丞鮑相率六館生連章乞留帝可其奏明年以本官兼翰林學士與侍郎王一寧並入直文淵閣又明年進戶部右侍郎兼官如故易儲議起鑑曰無易樹子霸者所禁矧天朝乎不聽加太子少師寶宇通志成進戶部尙書帝不豫諸臣議復憲宗東宮李賢私問鑑鑑曰旣退不可再也英宗復

位遂削籍天順八年卒成化中復官賜祭鐵學問該博文章爾雅然性猜忌遇事多退避云

王文字干之初名強東鹿人永樂十九年進士授監察御史持廉奉法爲都御史顧佐所稱宣德末奉命治彰德妖賊張普祥獄還奏稱旨賜今名英宗卽位遷陝西按察使遭父憂命奔喪起視事正統三年正月擢右副都御史巡撫寧夏五年召爲大理寺卿明年與刑部侍郎何文淵錄在京刑獄尋遷右都御史九年出視延綏寧夏邊務劾治定邊營失律都督僉事王禎都督同知黃真等罪邊徼爲蕭明年代陳鎰鎮守陝西平涼臨洮鞏昌饑奏免其租尋進左都御史在陝五年鎮靜不擾景泰改元召掌院事文爲人深刻有城府面目嚴冷與陳鎰同官一揖外未嘗接談諸御史畏之若神廷臣無敢干以私者然中實柔媚初按大理少卿薛瑄獄希王振指欲坐瑄死至是治中官金英縱家奴不法事但抵奴罪給事中林聰等劾文鎰畏勢長奸下詔獄二人俱伏乃宥之二年六月學士江淵上言法司斷獄多枉文及刑部尙書俞士悅求罷且言淵營私以事不聽故見誣帝兩置之三年春加太子太保時陳鎰鎮陝西將還文當代諸御史交章留之乃改命侍郎耿九疇南京地震江淮北大水命巡視偕南九卿議上軍民便宜九事又言徐淮間饑甚而南京儲蓄有餘請盡發徐淮倉粟振貸而以應輸南京者輸徐淮補其缺皆報可是時陳循最任好剛自用高穀與循不相能以文彊悍思引與共政以敵之乃疏請增闈員循舉其鄉人蕭維

禎穀遂舉文而文得中官王誠助於是詔用文尋自江淮還朝改吏部尙書兼翰林院學士直文淵閣二品大臣入閣自文始尋遭母喪奪哀如前文雖爲穀所引而穀遲重循性明決文反與循合而不附穀其後以子倫故欲傾考官又用穀言而罷由是兩人卒不相得五年三月江淮大水復命巡視先是蘇松常鎮四府糧四石折白銀一兩民以爲便後戶部復徵米令輸徐淮凡一百十餘萬石率三石而致一石有破家者文用便宜停之又發廩振饑民三百六十餘萬時年饑多盜文捕長洲盜許道師等二百人欲張其功坐以謀逆大理卿薛瑄辨其誣給事中王鎮乞會廷臣勘實得爲盜者十六人置之法而餘得釋還進少保兼東閣大學士再進謹身殿大學士仍兼東閣初英宗之還也廷臣議奉迎禮文時爲都御史厲聲曰公等謂上皇果還耶也先不索土地金帛而遽送駕來耶衆素畏文皆愕然不決而罷及易儲議起文率先承命景帝不豫羣臣欲乞還沂王東宮文曰安知上意誰屬乃疏請早選元良以是中外誼傳文與中官王誠等謀召取襄世子英宗復位卽日與于謙執於班內言官劾文與謙等謀立外藩命鞠於廷文力辯曰召親王須用金牌信符遣人必有馬牌內府兵部可驗也辭氣激壯逮車駕主事沈敬按問無迹廷臣遂坐謙文召敬謀未定與謙同斬於市諸子悉戍邊敬亦坐知謀反故縱滅死戍鐵嶺文之死人皆知其誣以素刻伎且迎駕復儲之議不愜輿論故寃死而民不思成化初赦其子還尋復官贈太保謚

毅愍倫改名宗彞成化初進士歷戶部郎中出理遼東餉中官汪直東征言宗彞督餉勞擢太僕少卿弘治中累官南京禮部尙書卒諡安簡

江淵字世用江津人宣德五年庶吉士授編修正統十二年詔與杜璽裴綸劉儼商輅陳文俊王玉共十人肄業東閣曹鼐等爲之師郟王監國徐有貞倡議南遷太監金英叱出之跟淵適入迎問之有貞曰以吾議南遷不合也於是淵入極陳固守之策遂見知於王由侍講侍郎也先薄京師命淵參都督孫鏗軍事景泰元年出視紫荆倒馬白羊諸關隘與都指揮修雁門關其秋遂以本官兼翰林學士入閣預機務尋改戶部侍郎兼職如故明年六月以事一厚結朶顏赤斤諸衛爲東西藩籬一免京軍餘丁以資生業一禁訐告王振餘黨以免之又明年二月改吏部仍兼學士是春京師久雨雪淵上言漢劉向曰凡雨陰也雪又雨之陰也仲春少陽用事而寒氣脅之占法謂人君刑法暴濫之象陛下恩威溥洽未嘗不赦過宥罪竊恐有冤抑或有未伸且向者下明詔免景泰二年田租之三今復移檄追徵則是朝廷自失大信於民怨氣鬱結良由此也帝乃令法司申冤濫詣戶部違詔下尙書金濂於獄卒免稅如詔東宮既易加太子少師四川巡撫僉都御史李匡不職以淵言罷之母憂起復初侍講學士倪謙遭喪淵薦謙爲講官謙遂奪哀至

是御史周文淵引謙正自爲今日地帝以事既處分不問而今自今羣臣遭喪無濫保五年春山東河南江北饑命同平江侯陳璘往撫淵前後條上軍民便宜十數事并請築淮安月城以護常盈倉廣徐州東城以護廣運倉悉議行時江北洊饑淮安糧運在塗者淵悉追還備振漕卒乘機侵耗事聞遣御史按實淵被劾當削籍廷臣以淵守便宜不當罪帝宥之閣臣既不相協而陳循王文尤刻私淵好議論每爲同官所抑意忽忽不樂會兵部尙書于謙以病在告詔推一人協理部事淵心欲得之循等佯推淵而密令商輅草奏示以石兵江工四字淵在旁不知也比詔下調工部尙書石璞於兵部而以淵代璞淵大失望英宗復位與陳循等俱謫戍遼東未幾卒初黃珌之奏易儲也或疑淵主之邱濬曰此易辨也廣西紙與京師紙異索奏視之果廣西紙其誣乃白成化初復官

許彬字道中寧陽人永樂十三年進士改庶吉士授檢討正統末累遷太常少卿兼翰林待詔提督四夷館上皇將還遣彬至宣府奉迎上皇命書罪己詔及諭羣臣敕遣祭土木陣亡官軍以此受

知上皇還擇

本寺卿石亨等謀復上皇以其謀告彬彬進徐有貞語具有貞傳英宗復位進禮部左侍郎兼翰林院學

士入直文淵閣未幾爲石亨所忌出爲南京禮部右侍郎甫行貶陝西參政至則乞休去憲宗立命以侍

郎致仕尋卒彬性坦率好交游不能擇人一時浮蕩士多出其門晚參大政方欲杜門謝客而客惡其變

應競相騰謗竟不安其位

陳文字安簡廬陵人鄉試第一正統元年進士及第授編修十二年命進學東閣秩滿遷侍講景泰二年閣臣高穀薦文才遂擢雲南右布政使貴州比歲用兵資餉雲南民困轉輸文令商賈代輸而民倍償其費皆稱便稅課額鈔七十餘萬吏俸所取給典者侵蝕吏或累歲不得俸文悉按治課日羨溢雲南產銀民間用銀貿易視內地三倍隸在官者免役納銀亦三之納者不爲病文曰雖如是得無傷廉乎損之復令減隸額三之一名譽日起遷廣東左布政使母憂未赴英宗既復位一日謂左右曰向侍朕編修哲而長者安在左右以文對卽召爲詹事乞終制不允入侍東宮講讀學士呂原卒帝問李賢誰可代者曰柯潛可出告王翱翱曰陳文以次當及奈何抑之明日賢入見如翱言七年二月進禮部右侍郎兼學士入內閣文旣入數撓賢以自異曰吾非若所薦也侍讀學士錢溥與文比舍居交甚歡溥嘗授內侍書其徒多貴幸來謁必邀文共飲英宗大漸東宮內侍王綸私詣溥計事不召文文密覘之綸言帝不豫東宮納妃如何溥謂當奉遺詔行事已而英宗崩賢當草詔文起奪其筆曰無庸已有草者因言綸溥定計欲逐賢以溥代之而以兵部侍郎韓雍代尙書馬昂賢怒發其事是時憲宗初立綸自謂當得司禮氣張甚英宗大殮綸衰服襲貂裘見而惡之太監牛玉恐其軋己因數綸罪逐之去溥謫知順德縣雍浙江參政詞

所連順天府尹王福通政參議趙昂南寧伯毛榮都督馬良馮宗劉聚錦衣都指揮僉事門達等皆坐謫
雍亦文素所不悅者也改吏部左侍郎同知經筵事成化元年進禮部尚書羅倫論賢奪情文內媿陰助
賢逐倫益爲時論所鄙三年春帝命戶部尚書馬昂副都御史林聰及給事中潘禮陳越清理京營文奏
必得內臣共事始可剷除宿弊因薦太監懷恩帝從之英宗實錄成加太子少保兼文淵閣大學士四年
卒贈少傅諡莊靖文素以才自許在外頗著績效士大夫多冀其進用及居宮端行事鄙猥既參大政無
所建明朝退則引賓客故人置酒爲曲宴專務請屬性卞急遇睚眦怨必報及賢卒文益愆意行名節大
喪歿後禮部主事陸淵之御史謝文祥皆疏論文不當得美諡帝以事已施行不許

萬安字循吉眉州人長身魁鬚眉目如刻畫外寬而深中正統十三年進士改庶吉士授編修成化初屢
遷禮部左侍郎五年命兼翰林學士入內閣參機務同年生詹事李泰中官永昌養子也齒少於安安兄
事之得其驩自爲同官每當遷必推安出己上至是議簡閣臣泰復推安曰子先之我不患不至故安得
入閣而泰忽暴病死安無學術旣柄用惟日事請託結諸閣爲內援時萬貴妃寵冠後宮安因內侍致殷
勤自稱子姪行妃嘗自媿無門閥聞則大喜妃弟錦衣指揮通遂以族屬數過安家其妻王氏有母至自
博興王謂母曰嚮家貧時以妹爲人娣今安在母曰第憶爲四川萬編修者通心疑是安訪之則安小婦

由是兩家婦日往來通妻著籍禁內恣出入安得備知宮中動靜益自固侍郎邢讓祭酒陳鑑與安同年不相能安搆獄除兩人名七年冬彗見天田犯太微廷臣多言君臣否隔宜時召大臣議政大學士彭時商輅力請司禮中官乃約以御殿日召對且曰初見情未洽勿多言姑俟他日將入復約如初比見時言天變可畏帝曰已知卿等宜盡心時又言昨御史有疏請減京官俸薪武臣不免缺望乞如舊便帝可之安遂頓首呼萬歲欲出時輅不得已皆叩頭退中官戲朝士曰若輩嘗言不召見及見止知呼萬歲耳一時傳笑謂之萬歲閣老帝自是不復召見大臣矣其後尹直入閣欲請見帝計事安止之曰往彭公請召對一語不合輒叩頭呼萬歲以此貽笑今吾輩每事盡言太監擇而聞之上無不允者勝面對多矣其容悅不識大體且善歸過於人如此九年進禮部尙書久之改戶部十三年加太子少保俄改文淵閣大學士孝宗出閣進吏部尙書謹身殿大學士尋加太子太保時彭時已歿商輅以忤汪直去在內閣者劉珣劉吉而安爲首輔與南人相黨附珣與尙書尹旻王越又以北人爲黨互相傾軋然珣疏淺而安深鷲故珣卒不能勝安十八年汪直寵衰言官請罷西廠帝不許安具疏再言之報可中外頗以是稱安文華大訓成進太子太傅華蓋殿大學士復進少傅太子太師再進少師當是時朝多秕政四方災傷日告帝崇信道教封金闕玉闕真君爲上帝遣安祭於靈濟宮而李汝省鄧常恩方進用安因彭華潛與結藉以排

異己於是珣及王恕馬文升秦紘耿裕諸大臣相繼被逐而華遂由詹事遷吏部侍郎入內閣朝臣無敢與安抵牾者華安福人大學士時之族弟舉景泰五年會試第一深刻多計數善陰伺人短與安戎省比嘗嫉蕭彥莊攻李秉又逐尹旻羅璟人皆惡而畏之踰年得風疾去孝宗嗣位安草登極詔書禁言官假風聞挾私中外譁然御史楊鼐詣閣安從容言曰此裏面意也鼐卽以其語奏聞謂安抑塞言路歸過於君無人臣禮於是庶吉士鄒智御史文貴姜洪等交章列其罪狀先是歛人倪進賢者粗知書無行諂事安日與講房中術安暱之因令就試得進士授爲庶吉士除御史帝一日於宮中得疏一小篋則皆論房中術者未署曰臣安進帝命太監懷恩持至閣曰此大臣所爲耶安媿汗伏地不能出聲及諸臣彈章入復令恩就安讀之安數跪起求哀無去意恩直前摘其牙牌曰可出矣始惶遽索馬歸第乞休去時年已七十餘尙於道上望三台星冀復用居一年卒贈太師諡文康初孝穆皇太后之薨內庭籍籍指萬貫妃孝宗立魚臺縣丞徐頊上書發其事廷臣議逮鞫萬氏戚屬曾出入宮掖者安驚懼不知所爲曰我久不與萬氏往來矣而劉吉先與萬氏姻亦自危其黨尹直尙在閣共擬旨寢之孝宗仁厚亦置不問安吉得無事安在政府二十年每遇試必令其門生爲考官子孫甥壻多登第者子翼南京禮部侍郎孫弘璧翰林編修安死無幾翼弘璧相繼死安竟無後

劉珣字叔溫壽光人正統十三年進士改庶吉士授編修天順中歷右中允侍講東宮憲宗卽位以舊宮僚屢遷太常卿兼侍讀學士直經筵日講成化十年進吏部左侍郎充講官如故珣每進講反覆開導詞氣侃侃聞者爲悚學士劉定之稱爲講官第一憲宗亦愛重之明平詔以本官兼翰林學士入閣預機務帝每呼東劉先生賜印章一文曰嘉猷贊珣尋進吏部尙書再加太子少保文淵閣大學士文華大訓成加太子太保進謹身殿大學士珣性疎直自以宮寮舊臣遇事無所回護員外郎林俊以劾梁芳繼曉下獄珣於帝前解之李孜省輩左道亂政欲動搖東宮珣密疏諫謀少阻素薄萬安嘗斥安負國無恥安積忿日夜思中珣初商輅之劾汪直也珣與萬安劉吉助之爭得罷西廠他日珣又折王越於朝越慚而退已而西廠復設珣不能有所諍至十八年安見直寵衰揣知西廠當罷邀珣同奏珣辭不與安遂獨奏疏上帝頗訝無珣名安陰使人訐珣與直有連會珣子鐵邀妓狎飲里人趙賓戲爲劉公子曲或增飾穢語雜教坊院本奏之帝大怒決意去珣遣中官覃昌召安吉赴西角門出帝手封書一函示之安等佯驚救次日珣具疏乞休令馳驛賜月廩歲隸白金楮幣甚厚其實排珣使去者安吉兩人謀也時內閣三人安貪狡吉陰刻珣稍優顧喜譚論人目爲狂躁珣旣倉卒引退而彭華尹直相繼入內閣安吉之黨乃益固珣初遭母憂廬墓三年比歸侍父盡孝父歿復廬於墓弘治三年卒諡文和嘉靖初以言官請賜祠額曰

昭賢仍遣官祭之子鈞字汝中八歲時憲宗召見愛其聰敏且拜起如禮卽命爲中書舍人宮殿門闕高同官楊一清常提之出入帝慮牙牌易損命易以銀厯官五十餘年嘉靖中至太常卿兼五經博士仍供事內閣誥敕房博學有行誼與長洲劉棨並淹貫故實時稱二劉

劉吉字祐之博野人正統十三年進士改庶吉士授編修充經筵官實字通志成進修撰天順四年侍講讀於東宮以憂歸憲宗卽位召纂英宗實錄至京上疏乞終制不允進侍讀實錄成遷侍讀學士直經筵累遷禮部左侍郎成化十一年與劉珣同受命兼翰林學士入閣預機務尋進禮部尙書孝宗出閣加太子少保兼文淵閣大學士十八年遭父喪詔起復吉三疏懇辭而陰屬貴戚萬喜爲之地得不允文華大訓成加太子太保進武英殿大學士久之進戶部尙書謹身殿大學士尋加少保兼太子太傅孝宗卽位庶吉士鄒智御史姜洪力誡萬安尹直及吉皆小人當斥吉深銜之安直皆去吉獨留委寄愈專慮言者攻不已乃建議超遷科道官處以不次之位詔起廢滯給事中賀欽御史強珍輩十人已次第擬擢吉復上疏薦之部曹預薦者惟林俊一人冀以此籠絡言路而言者猶未息庶子張昇御史曹璘歐陽旦南京給事中方尙御史陳嵩等相繼劾吉吉憤甚中昇逐之數興大獄智向囚繫遠貶洪亦謫官復與中官蔣琮比逐南御史姜綰等臺署爲空中外側目言者亦少衰初吉與萬安劉珣在成化時帝失德無所規正

時有紙糊三闖老泥塑六尙書之謠至是見孝宗仁明同列徐溥劉健皆正人而吉於閣臣居首兩人有論建吉亦署名復時時爲正論竊美名以自蓋弘治二年二月旱帝令儒臣撰文禱雨吉等言邇者奸徒襲李孜省鄧常恩故術見月宿在畢天將陰雨遂奏請祈禱覘一驗以希進用倖門一開爭言祈禱要寵召禍寶基於此祝文不敢奉詔帝意悟遂已之五月以災異請帝修德防微慎終始八月又以災異陳七事代王獻海青吉等言登極詔書已却四方貢獻乞勿受明年三月偕同列上言陛下聖質清羸與先帝不同凡宴樂游觀一切嗜好之事宜悉減省左右近臣有請如先帝故事者當以太祖太宗典故斥退之祖宗令節宴游皆有時陛下法祖宗可也土魯番使者貢獅子還帝令內閣草敕遣中官送之吉等言不宜優寵太過使番戎輕中國事遂寢既又言獅子諸獸日飼二羊歲當用七百二十又守視校尉日五十人皆繁費宜絕諸獸食聽自斃帝不能用十二月星變又言邇者妖星出天津歷杵臼迫營室其占爲兵爲饑爲水旱今兩畿河南山西陝西旱蝗四川湖廣歲不登倘明年復然恐盜賊竊發禍亂將作願陛下節服度罷宴游屏讒言斥異教留懷經史講求治道沙河修橋江西造瓷器南海子繕垣牆俱非急務宜悉停止帝嘉納之帝惑近習言頗崇祈禱事發經牌令閣臣作贊又令擬神將封號吉等極言邪說當斥吉自帝初卽位進少傅兼太子太師吏部尙書及憲宗實錄成又進少師華蓋殿大學士吉柄政久權

勢烜赫帝初傾心聽信後眷頗衰而吉終無去志五年帝欲封后弟伯爵命吉撰誥券吉言必盡封二太后家子弟方可帝不悅遣中官至其家諷令致仕始上章引退詔賜敕馳驛如故事吉多智數善附會自緣節銳於營私時爲言路所攻居內閣十八年人目之爲劉繇花以其耐彈也吉疑其言出下第舉子因請舉人三試不第者不復會試時適會試期舉子已羣集都下禮部爲請詔姑許入試後如今已而吉罷令亦不行吉歸踰年卒贈太師諡文穆

尹直字正言泰和人景泰五年進士改庶吉士授編修成化初充經筵講官與修英宗實錄總裁欲革去景泰帝號引漢昌邑更始爲比直辨曰實錄中有初爲大臣後爲軍民者方居官時則稱某官某既罷去而後改稱如漢府以謀逆降庶人其未反時書王書叔如故也豈有逆計其反而卽降從庶人之號者哉且昌邑旋立旋廢景泰帝則爲宗廟社稷主七年更始無所受命景泰帝則策命於母后當時定傾危難之中微帝則京師非國家有雖易儲失德然能不感於盧忠徐振之言卒全兩宮以至今日其功過足相準不宜去帝號時不能難旣成進侍讀歷侍讀學士六月上疏乞纂修大明通典并續成宋元綱目章下所司十一年遷禮部右侍郎辭不許丁父憂服除起南京吏部右侍郎就改禮部左侍郎二十二年春召佐兵部占城王古來爲安南所逼棄國來求援議者欲送之還直曰彼窮來歸我若驅使還國是殺之也

宜遣大臣卽詢量宜處置詔從之命都御史屠滂往貴州鎮巡官奏苗反請發兵廷議將從之直言起覺
邀功不可信命官往勘果無警是年九月改戶部兼翰林學士入內閣踰月進兵部尙書加太子太保直
明敏博學練習朝章而躁於進取性矜忌不自檢飭與吏部尙書尹旻相惡直初謁禮部侍郎而旻薦他
人直以中旨得之次日遇旻於朝舉笏謝旻曰公所謂簡在帝心者自是怨益深後在南部八年鬱鬱不
得志屬其黨萬安彭華謀內召旻輒持不可諸朝臣亦皆畏直幸其在南及推兵部左右侍郎吏部列何
琮等八人詔用琮而直以安華及李孜省力中旨召還至是修怨與孜省等比陷旻父子得罪又構罷江
西巡撫閔珪物論喧然不平刑部郎袁清者安私人又幸於內侍郭閏勘事浙江較轢諸大吏吏部尙書
李裕惡之比還卽除紹興知府清懼累章求改裕極論其罪下詔獄安閏以屬直爲言於孜省取中旨赦
之改知鄖陽孝宗立進士李文祥御史湯鼐姜洪繆樛庶吉士鄒智等連章劾直給事中宋琮及御史許
斌言直自初爲侍郎以至入閣夤緣攀附皆取中旨帝於是薄其爲人令致仕弘治九年表賀萬壽并以
太子年當出閣上承華箴引先朝少保黃淮事冀召對帝却之正德中卒諡文和

贊曰易稱內君子外小人爲泰外君子內小人爲否況端揆之寄百寮具瞻者乎陳循以下諸人雖不爲
大奸慝而居心刻伎務逞己私同己者比異己者忌比則相援忌則相軋至萬安劉吉要結近侍蒙恥固

位猶幸同列多賢相與彌縫匡救而穢跡昭彰小人之歸何可掩哉

明史卷一百六十九

列傳第五十七

總裁官總理事務經筵講官保兼太子太保保和殿大學士兼管吏部戶部尚書事加六級張廷玉等奉
敕修

高穀 胡澗 王直

高穀字世用揚州興化人永樂十三年進士選庶吉士授中書舍人仁宗卽位改春坊司直郎尋遷翰林
侍講英宗卽位開經筵楊士奇薦穀及苗衷馬愉曹鼐四人侍講讀正統十年由侍講學士進工部右侍
郎入內閣典機務景泰初進尚書兼翰林學士掌閣務如故英宗將還奉迎禮薄千戶龔遂榮投書於穀
具言禮宜從厚援唐肅宗迎上皇故事穀袖之入朝徧示廷臣曰武夫尙知禮況儒臣乎衆善其言胡澗
王直欲以聞穀曰迎復議上上意久不決若進此書使上知朝野同心亦一助也都御史王文不可已而
言官奏之請所從得穀對曰自臣所因抗章懇請如遂榮言帝雖不從亦不之罪二年進少保東閣大學
士易儲加太子太傅給二俸應天鳳陽災命祀三陵振貧民七年進謹身殿大學士仍兼東閣內閣七人
言論多齟齬穀清直持議正文由穀薦數擠穀穀屢請解機務不許都給事中林聰忤權要論死穀力
救得薄譴陳循及文構考官劉儼黃諫帝命禮部會穀覆閱試卷穀力言儼等無私且曰貴冑與寒士競

進已不可況不安義命欲因此構考官乎帝乃賜循文子中式惟黜林挺一人事得已英宗復位循文等皆誅竄穀謝病英宗謂穀長者語廷臣曰穀在內閣議迎駕及南內事嘗左右朕其賜金帛襲衣給驛舟以歸尋復賜敕獎諭穀既去位杜門絕賓客有問景泰天順間事輒不應天順四年正月卒年七十穀美丰儀樂儉素位至台司敝廬瘠田而已成化初贈太保諡文義

胡濙字源潔武進人生而髮白彌月乃黑建文二年舉進士授兵科給事中永樂元年遷戶科都給事中惠帝之崩於火或言遞去諸舊臣多從者帝疑之五年遣濙頒御製諸書并訪仙人張籙遍行天下州郡鄉邑隱察建文帝安在濙以故在外最久至十四年乃還所至亦間以民隱聞母喪乞歸不許擢禮部左侍郎十七年復出巡江浙湖湘諸府二十一年還朝馳謁帝於宣府帝已就寢聞濙至急起召入濙悉以所聞對漏下四鼓乃出先濙未至傳言建文帝蹈海去帝分遣內臣鄭和數輩浮海下西洋至是疑始釋皇太子監國南京漢王爲飛語謗太子帝改濙官南京因命廉之濙至密疏馳上監國七事言誠敬孝謹無他帝悅仁宗卽位召爲行在禮部侍郎濙陳十事力言建都北京非便請還南都省南北轉運供億之煩帝皆嘉納既聞其嘗有密疏疑之不果召轉太子賓客兼南京國子祭酒宣宗卽位仍遷禮部左侍郎明年來朝乃留行在禮部尋進尙書漢王反與楊榮等贊親征事平賚予甚厚明年賜第長安右門外

給闈者二人賜銀章四生辰賜宴其第四年命兼理詹事府事六年張本卒又兼領行在戶部時國用漸廣濼慮度支不足蠲租詔下輒沮格帝嘗切戒之然眷遇不少替嘗曲宴濼及楊士奇夏原吉蹇義曰海內無虞卿等四人力也英宗卽位詔節冗費濼因奏減上供物及汰法王以下番僧四五百人浮費大省正統五年山西災詔行寬卹既而有採買物料之命濼上疏言詔旨宜信又言軍旗營求差遣因而擾民宜罷之皆報可行在禮部印失詔弗問命改鑄已又失被劾下獄未幾印獲復職九年年七十乞致仕不許英宗北狩羣臣聚哭於朝有議南遷者濼曰文皇定陵寢於此示子孫以不拔之計也與侍郎于謙合中外始有固志景帝卽位進太子太傅楊善使也先濼言上皇蒙塵久宜附進服食不報上皇將還命禮部具奉迎儀濼等議遣禮部迎於龍虎臺錦衣具法駕迎居庸關百司迎土城外諸將迎教場門上皇自安定門入進東安門於東上北門南面坐皇帝謁見畢百官朝見上皇入南城大內議上傳旨以一轎二馬迎於居庸關至安定門易法駕餘如奏給事中劉福等言禮太薄帝報曰朕尊大兄爲太上皇帝尊禮無加矣福等顧云太薄其意何居禮部其會官詳察之濼等言諸臣意無他欲陛下篤親親耳帝曰昨得太上皇書具言迎駕之禮宜從簡損朕豈得違之羣臣乃不敢言會千戶龔遂榮爲書投大學士高穀言奉迎宜厚具言唐肅宗迎上皇故事穀袖之以朝與王直等共觀之直與濼欲聞之帝爲都御史王文所

阻而給事中葉盛竟以聞盛同官林聰復劾直濼毅等皆股肱大臣有聞必告不宜偶語竊議有詔索書
濼等因以書進且言肅宗迎上皇典禮今日正可做行陛下宜躬迎安定門外分遣大臣迎龍虎臺帝不
悅曰第從朕命無事紛更上皇至居南城宮濼請帝明年正旦率羣臣朝廷安門不許上皇萬壽節請令
百官拜賀延安門亦不許三年正月與王直並進少傅易太子加兼太子太師王文惡林聰文致其罪欲
殺之濼不肯署遂稱疾數日不朝帝使興安問疾對曰老臣本無疾聞欲殺林聰殊驚悸耳聰由是得釋
英宗復位力疾入朝遂求去賜璽書白金楮幣襲衣給驛官其一子錦衣世鎮撫濼歷事六朝垂六十年
中外稱耆德及歸有三弟年皆七十餘鬚眉皓白燕聚一堂因名之曰壽愷又七年始卒年八十九贈太
保諡忠安濼節儉寬厚喜怒不形於色能以身下人在禮部久表賀祥瑞以官當首署名人因謂其性善
承迎南城人龔謙多妖術濼薦爲天文生又薦道士仰彌高曉陰陽兵法使守邊時頗譏之

王直字行儉泰和人父伯貞洪武十五年以明經聘至京時應詔者五百餘人伯貞對第一授試僉事分
巡廣東雷州復呂塘廢渠清鹽法會罷分巡官召還爲戶部主事以父喪服闋不時起謫居安慶建文初
復以薦知瓊州崖州黎相仇殺以反聞且用兵伯貞捕其首惡兵遂罷瓊田歲常三穫以賦軍軍不時受
俸民乏乃急斂以要利伯貞爲立期三輸之弊始絕居數年大治流民占籍者萬餘憂歸卒於家直幼而

端重家貧力學舉永樂二年進士改庶吉士與曾榮王英等二十八人同讀書文淵閣帝善其文召入內閣俾屬草尋授修撰歷事仁宗宣宗累遷少詹事兼侍讀學士正統三年宣宗實錄成進禮部侍郎學士如故五年出涖部事尚書胡濙悉以部政付之直處之若素習者八年正月代郭璉爲吏部尚書十一年戶部侍郎奈亨附王振構郎中趙敏詞連直及侍郎曹義趙新並下獄三法司廷鞫論亨斬直等贖徒帝宥直義奪亨新俸帝將親征也先直率廷臣力諫曰國家備邊最爲謹嚴謀臣猛將堅甲利兵隨處充滿且耕且守是以久安今敵肆猖獗違天悖理陛下但宜固封疆申號令堅壁清野蓄銳以待之可圖必勝不必親御六師遠臨塞下況秋暑未退旱氣未回青草不豐水泉猶塞士馬之用未充兵凶戰危臣等以爲不可帝不從命直留守王師覆於土木大臣羣請太后立皇子爲皇太子命郕王攝政已勸王卽位以安反側時變起倉卒朝臣議屢上皆直爲首而直自以不如于謙每事推下之雍容鎮率而已加太子太保景泰元年也先使使議和且請還上皇下禮部議未決直率羣臣上言曰太上皇感細人言輕身一出至於蒙塵陛下宵衣旰食徵天下兵與羣臣兆姓同心僇力期滅此朝食以雪不共戴天之恥迺者天誘其衷也先有悔心之萌而來求成於我請還乘輿此轉禍爲福之機也望陛下俯從其請遣使往報因察其誠僞而撫納之奉太上皇以歸少慰祖宗之心陛下天位已定太上皇還不復涖天下事陛下第崇奉

之則天倫厚而天眷益隆誠古今盛事也帝曰卿等言良然但前後使者五輩往終不得要領今復遣使設彼假送駕爲名來犯京師豈不爲蒼生患賊詐難信其更議之已而瓦剌別部阿剌使復至胡濙等復以爲言於是帝御文華殿門召諸大臣及言官諭以宜絕狀直對曰必遣使毋貽後悔帝不悅于謙前爲解帝意釋羣臣既退太監興安匍匐出呼曰若等固欲遣使有文天祥富弼其人乎直大言曰廷臣惟天子使既食其祿敢辭難乎言之再聲色愈厲安語塞乃議遣使命李寶羅綺往旣行而瓦剌可汗脫脫不花及也先使先後至將遣歸使者謂館伴曰中國關外十四城皆爲我有前阿剌知院使來尙遣人偕往今亦必得大臣同行庶有濟胡濙以聞下廷議直等固請乃遣楊善等報之比寶還又以也先使至具言也先欲和狀直與靈陽侯陳懋等上疏請更遣使齎禮幣往迎上皇不許復上疏曰臣等與李寶語具得彼中情事其所需衣物資斧者上皇言也而奉迎車駕也先意也昨者脫脫不花及阿剌知院使來皆有報使今也先使以迎請爲辭乃不遣使與偕是疑敵而召兵也又不許已而寶自言於帝帝第報也先書就令楊善迎歸而已直等復上言今北使已發願本上皇之心順臣民之願因彼悔心遣使往報以圖迎復此不待計而決者也不然衆志難犯違天不祥彼將執爲兵端邊事益棘京師亦不得高枕臥矣帝乃命羣臣擇使直與陳懋等請仍遣寶報曰候善歸議之御史畢鑾等復上疏力言就令彼以詐來我以誠

往萬一不測則我之兵力固在帝終不聽已而善竟奉上皇還二年也先遣使入貢且請答使直屢疏言邊備未修芻糧未積瘡痍未復宜如其請遣使往以觀虛實開導其善不許無何也先遣騎入塞以報使爲辭直與羣臣復請之卒不許直等乃上疏言陛下銳意治兵爲戰守計真大有爲之主然使命不通難保其不爲寇宜敕沿邊守臣發兵遊徼有警則入保無事則力耕陛下於機務之暇時召京營總督總兵詢以方略誠接而禮貌之信賞罰以持其後斯戰守可言也帝曰善明年正月進少傅帝欲易太子未發會思明土知府黃珙以爲請帝喜下禮部議胡濙唯唯文武諸臣議者九十一人當署名直有難色陳循濡筆強之乃署竟易皇太子直進兼太子太師賜金幣加等頓足歎曰此何等大事乃爲一蠻酋所壞吾輩愧死矣景帝疾亟直濙等會諸大臣臺諫請復立沂王爲皇太子推大學士商輅草疏未上而石亨徐有貞等奪門迎上皇復位殺王文等疏草留姚夔所嘗出以示郎中陸昶歎曰是疏不及進天也直遂乞休賜璽書金綺楮幣給驛歸直爲人方面修髯儀觀甚偉性嚴重不苟言笑及與人交恂恂如也在翰林二十餘年稽古代言編纂紀注之事多出其手與金谿王英齊名人稱二王以居地目直曰東王英曰西王直以次當入閣楊士奇不欲也及長吏部益廉慎時初罷廷臣薦舉方面大吏專屬吏部直委任曹郎嚴抑奔競凡御史巡方歸者必令具所屬賢否以備選擇稱得人其子穰爲南國子博士考績至部文選

郎欲留侍直直不可曰是亂法自我始也朝廷以直老命何文淵爲尙書佐之文淵去又命王翱部遂有二尙書直爲尙書十四年年益高名德日益重帝優禮之免其常朝比家居嘗從諸佃僕耕時擊鼓歌唱諸子孫更迭舉觴上壽直歎曰囊者西楊抑我今不得共事然使我在閣今上復辟當不免遼陽之行安得與汝曹爲樂哉天順六年卒年八十四贈太保諡文端積仕至翰林檢討亦以學行稱曾孫思自有傳贊曰高穀之清直胡濙之寬厚王直之端重蓋皆有大臣之度焉當英景之間國勢初更人心觀望執政任事之臣多阿意取容而穀濙惓惓於迎駕之儀直侃侃於遣使之請皆力持正議不隨衆俛仰故能身碩望始終一節可謂老成人矣

明史卷一百七十

列傳第五十八

總裁官總理事務 經筵講官少保兼太子太保保和殿大學士兼管吏部戶部尙書專加六級張廷玉等奉
敕修

于

謙子冕吳寧王瑋

于謙字益錢塘人生七歲有僧奇之曰他日救時宰相也舉永樂十九年進士宣德初授御史奏對音吐鴻暢帝爲傾聽顧佐爲都御史待寮屬甚嚴獨下謙以爲才勝己也扈蹕樂安高煦出降帝命謙口數其罪謙正詞斬斬聲色震厲高煦伏地戰慄稱萬死帝大悅師還賞賚與諸大臣等出按江西雪冤囚數百疏奏陝西諸處官校爲民害詔遣御史捕之帝知謙可大任會增設各部右侍郎爲直省巡撫乃手書謙名授吏部超遷兵部右侍郎巡撫河南山西謙至官輕騎徧歷所部延訪父老察時事所宜興革卽具疏言之一歲凡數上小有水旱輒上聞正統六年疏言今河南山西積穀各數百萬請以每歲三月令府州縣報缺食下戶隨分支給先菽秫次黍麥次稻俟秋成償官而免其老疾及貧不能償者州縣吏秩滿當遷預備糧有未足不聽離任仍令風憲官以時稽察詔行之河南近河處時有衝決謙令厚築隄障計里置亭亭有長責以督率修繕並令種樹鑿井榆柳夾路道無渴者大同孤懸塞外按山西者不及至奏

別設御史治之盡奪鎮將私墾田爲官屯以資邊用威惠流行太行伏盜皆避匿在官九年遷左侍郎食
二品俸初三楊在政府雅重謙謙所奏朝上夕報可皆三楊主持而謙每議事京師空橐以入諸權貴人
不能無望及是三楊已前卒太監王振方用事適有御史姓名類謙者嘗忤振謙入朝薦參政王來孫原
貞自代通政使李錫阿振指劾謙以久不遷怨望擅舉人自代下法司論死繫獄三月已至振知其誤得
釋左遷大理寺少卿山西河南吏民伏闕上書請留謙者以千數周晉諸王亦言之乃復命謙巡撫時山
東陝西流民就食河南者二十餘萬謙請發河南懷慶二府積粟以振又奏令布政使年富安集其衆授
田給牛種使里老司察之前後在任十九年丁內外艱皆令歸治喪旋起復十三年以兵部左侍郎召明
年秋也先大入寇王振挾帝親征謙與尙書鄜瑩極諫不聽瑩從治兵留謙理部事及駕陷土木京師大
震衆莫知所爲鄜王監國命羣臣議戰守侍講徐瑄言星象有變當南遷謙厲聲曰言南遷者可斬也京
師天下根本一動則大事去矣獨不見宋南渡事乎王是其言守議乃定時京師勁甲精騎皆陷沒所餘
疲卒不及十萬人心震恐上下無固志謙請王檄取兩京河南備操軍山東及南京沿海備倭軍江北及
北京諸府運糧軍亟赴京師以次經畫部署人心稍安卽遷本部尙書鄜王方攝朝廷臣請族誅王振而
振黨馬順者輒叱言官於是給事中王竑廷擊順衆隨之朝班大亂衛卒聲洶洶王懼欲起謙排衆直前

掖王止且啟王宣諭曰順等罪當死勿論眾乃定謙袍袖爲之盡裂退出左掖門吏部尙書王直執膝手歎曰國家正賴公耳今日雖百王直何能爲當是時上下皆倚重謙謙亦毅然以社稷安危爲己任初大臣憂國無主太子方幼寇且至請皇太后立郕王王驚謝至再謙颺言曰臣等誠憂國家非爲私計王乃受命九月景帝立謙入對慷慨泣奏曰寇得志要留大駕勢必輕中國長驅而南請飭諸邊守臣協力防遏京營兵械且盡宜亟分道募民兵令工部繕器甲遣都督孫鏗衛穎張軌張儀雷通分兵守九門要地列營郭外都御史楊善給事中王竑參之徙附郭居民入城通州積糧令官軍自詣關支以贏米爲之直毋棄以資敵文臣如軒輓者宜用爲巡撫武臣如石亨楊洪柳溥者宜用爲將帥至軍旅之事臣身當之不効則治臣罪帝深納之十月敕謙提督各營軍馬而也先挾上皇破紫荆關直入窺京師石亨議斂兵堅壁老之謙不可曰奈何示弱使敵益輕我亟分遣諸將率師二十二萬列陣九門外都督陶瑾安定門廣靈伯劉安東直門武進伯朱瑛朝陽門都督劉聚西直門鎮遠侯顧興祖阜成門都指揮李端正陽門都督劉得新崇文門都指揮湯節宣武門而謙自與石亨率副總兵范廣武興陳德勝門外當也先以部事付侍郎吳寧悉閉諸城門身自督戰下令臨陣將不顧軍先退者斬其將軍不顧將先退者後隊斬前隊於是將士知必死皆用命副總兵高禮毛福壽却敵彰義門北禽其長一人帝喜令謙選精兵屯教場

以便調用復命太監興安李永昌同謙理軍務初也先深入視京城可旦夕下及見官軍嚴陣待意稍沮
叛闖喜寧噉使邀大臣迎駕索金帛以萬萬計復邀謙及王直胡濙等出議帝不許也先氣益沮庚申寇
窺德勝門謙令亨設伏空舍遣數騎誘敵敵以萬騎來薄副總兵范廣發火器伏起齊擊之也先弟孛羅
平章卯那孩中礮死寇轉至西直門都督孫鏜禦之亨亦分兵至寇引退副總兵武興擊寇彰義門與都
督王敬挫其前鋒寇且却而內官數百騎欲爭功躍馬競前陣亂輿被流矢死寇逐至土城居民升屋號
呼投磚石擊寇譁聲動天王竑及福壽援至寇乃却相持五日也先邀請既不應戰又不利知終弗可得
志又聞勤王師且至恐斷其歸路遂擁上皇由良鄉西去謙調諸將追擊至關而還論功加謙少保總督
軍務謙曰四劫多壘卿大夫之恥也敢邀功賞哉固辭不允乃益兵守真保涿易諸府州請以大臣鎮山
西防寇南侵景泰元年三月總兵朱謙奏敵二萬攻圍萬全敕范廣充總兵官禦之已而寇退謙請卽駐
兵居庸寇來則出關剿殺退則就糧京師大同參將許貴奏迤北有三人至鎮欲朝廷遣使講和謙曰前
遣指揮季鐸岳謙往而也先隨入寇繼遣通政王復少卿趙榮不見上皇而還和不足恃明矣況我與彼
不共戴天理固不可和萬一和而彼肆無厭之求從之則坐敝不從則生變勢亦不得和貴爲介冑臣而
恒怯如此何以敵懷法當誅移檄切責自是邊將人人主戰守無敢言講和者初也先多所要挾皆以喜

靈爲謀主謙密令大同鎮將禽靈戮之又計授王偉誘誅間者小田兒且因讒用間請特釋忠勇伯把台家許以封爵使陰圖之也先始有歸上皇意遣使通款京師稍解嚴讒上言南京重地撫輯須人中原多流民設遇歲荒嘯聚可虞乞敕內外守備及各巡撫加意整飭防患未然召還所遣召募文武官及鎮守中官在內地者於時八月上皇北狩且一年矣也先見中國無釁滋欲乞和使者頻至請歸上皇大臣王直等議遣使奉迎帝不悅曰朕本不欲登大位當時見推實出卿等謙從容曰天位已定靈復有他顧理當速奉迎耳萬一彼果懷詐我有辭矣帝顧而改容曰從汝從汝先後遣李實楊善往卒奉上皇以歸謙力也上皇既歸瓦剌復請朝貢先是貢使不過百人正統十三年至三千餘賞賚不饜遂入寇及是又遣使三千來朝謙請列兵屠庸關備不虞京師盛陳兵宴之因言和議難恃條上安邊三策請敕大同宣府永平山海遼東各路總兵官增修備禦京兵分隸五軍神機三千諸營雖各有總兵不相統一請擇精銳十五萬分十營團操團營之制自此始具兵志中瓦剌入貢每攜故所掠人口至謙必奏酬其使前後贖還累數百人初永樂中降人安置近畿者甚衆也先入寇多爲內應謙謀散遣之因西南用兵每有征行輒選其精騎厚資以往已更遣其妻子內患以息楊洪自獨石入衛八城悉以委寇謙使都督孫安以輕騎出龍門關據之募民屯田且戰且守八城遂復貴州苗未平何文淵議罷二司專設都司以大將鎮之

謙曰不設二司是棄之也議乃寢謙以上皇雖還國恥未雪會也先與脫脫不花構請乘間大發兵身往討之以復前仇除邊患帝不許謙之爲兵部也先勢方張而福建鄧茂七浙江葉宗留廣東黃蕭養各擁衆僭號湖廣貴州廣西徭獠苗獠所至蜂起前後征調皆謙獨運營軍馬倥偬變在俄頃謙目視指屈口具章奏悉合機宜僚吏受成相顧駭服號令明審雖勳臣宿將小不中律卽請旨切責片紙行萬里外靡不惕息其才略開敏精神周至一時無與比至性過人愛國忘身上皇雖歸口不言功東宮旣易命兼宮僚者支二俸諸臣皆辭謙獨辭至再自奉儉約所居僅蔽風雨帝賜第西華門辭曰國家多難臣子何敢自安固辭不允乃取前後所賜璽書袍錠之屬悉加封識歲時一省視而已帝知謙深所論奏無不從者嘗遣使往真定河間采野菜直沽造乾魚謙一言卽止用一人必密訪謙謙具實對無所隱不避嫌怨由是諸不任職者皆怨而用弗如謙者亦往往嫉之比寇初退都御史羅通卽劾謙上功簿不實御史顧瞻言謙太專請六部大事同內閣奏行謙據祖制折之戶部尙書金濂亦疏爭而言者摺摭不已諸御史以深文彈劾者屢矣賴景帝破衆議用之得以盡所設施謙性故剛遇事有不如意輒拊膺歎曰此一腔熱血竟灑何地視諸選吏大臣勳舊貴戚意頗輕之憤者益衆又始終不主和議雖上皇實以是得還不快也徐瑤以議南遷爲謙所斥至是改名有貞稍稍進用嘗切齒謙石亨本以失律削職謙請宥而用之

總兵十營畏謙不得逞亦不樂謙德勝之捷亨功不加謙而得世侯內媿乃疏薦謙子冕詔赴京師辭不允謙言國家多事臣子義不得顧私恩且亨位大將不開舉一幽隱拔一行伍微賤以裨軍國而獨薦臣子於公議得乎臣於軍功力杜僥倖決不敢以子濫功亨復大志都督張軌以征苗失律爲謙所劾與內侍曹吉祥等皆素憾謙景泰八年正月壬午亨與吉祥有貞等既迎上皇復位宣諭朝臣畢卽執謙與大學士王文下獄誣謙等與黃玠構邪議更立東宮又與太監王誠舒良張永王勤等謀迎立襄王子亨等主其議嗾言官上之都御史蕭惟禎定讞坐以謀逆處極刑文不勝誣辯之疾謙笑曰亨等意耳辯何益奏上英宗尙猶豫曰于謙實有功有貞進曰不殺于謙此舉爲無名帝意遂決丙戌改元天順丁亥棄謙市籍其家戍邊遂溪教諭吾豫言謙罪當族謙所薦舉諸文武大臣並應誅部議持之而止千戶白琦又請榜其罪鏤板示天下一時希旨取寵者率以謙爲口實謙自值也先之變誓不與賊俱生嘗留宿直廬不還私第素病痰疾作景帝遣興安舒良更番往視聞其服用過薄詔令上方製賜至醢菜畢備又親幸萬歲山伐竹取漚以賜或言寵謙太過興安等曰彼日夜分國憂不問家產卽彼去令朝廷何處更得此人及籍沒家無餘貲獨正室鏤鑰甚固啟視則上賜蟒衣劍器也死之日陰霾四合天下冤之指揮朶兒者本出曹吉祥部下以酒醑謙死所慟哭吉祥怒挾之明日復醑莫如故都督同知陳達感謙忠義收

遺骸殯之踰年歸葬杭州達六合人故舉將才出李時勉門下者也皇太后初不知謙死比聞嗟悼累日英宗亦悔之謙既死而亨黨陳汝言代爲兵部尙書未一年敗賊累巨萬帝召大臣入視愀然曰于謙被遇景泰朝死無餘貲汝言抑何多也亨俯首不能對俄有邊警帝憂形於色恭順侯吳瑾侍進曰使于謙在當不令寇至此帝爲默然是年有貞爲亨所中戍金齒又數年亨亦下獄死吉祥謀反族誅謙事白成化初冕赦歸上疏訟寃得復官賜祭誥曰當國家之多難保社稷以無虞惟公道之獨持爲權奸所並嫉在先帝已知其枉而朕心實憐其忠天下傳誦焉弘治二年用給事中孫需言贈特進光祿大夫柱國太傅諡肅愍賜祠於其墓曰旌功有司歲時致祭萬厯中改諡忠肅杭州河南山西皆世奉祀不絕冕字景瞻膺授副千戶坐戍龍門謙寃既雪并復冕官自陳不願武職改兵部員外郎居官有幹局累遷至應天府尹致仕卒無子以族子允忠爲後世襲杭州衛副千戶奉祠吳寧字永清歙人宣德五年進士除兵部主事正統中再遷職方郎中郟王監國謙薦擢本部右侍郎謙禦寇城外寧掌部事命赴軍中議方略比還城門弗敢寇騎充斥寧立雨中指揮兵士移時乃入寇既退畿民猶日數驚相率南徙或議仍召勤王兵寧曰是益之使驚也莫若告捷四方人心自定因具奏行之景泰改元以疾乞歸後不復出家居三十餘年卒寧方介有識鑑嘗爲謙擇婿得千戶朱驥謙疑之寧曰公他日當得其力謙被刑驥果歸其喪葬

之驥自有傳王偉字士英收人年十四隨父謫戍宣府宣宗巡邊獻安邊頌命補保安州學生舉正統元年進士改麻吉士授戶部主事英宗北狩命行監察御史事集民壯守廣平謙引爲職方司郎中軍書填委處分多中窾會遂薦擢兵部右侍郎出視邊叛人小田兒爲敵間謙屬偉圖之會田兒隨貢使入至陽和城壯士從道旁突出斷其頭去使者不敢詰偉喜任智數旣爲謙所引恐嫉謙者目己爲朋附嘗密奏謙冀自解帝以其奏授謙叩頭謝帝曰吾自知卿何謝爲謙出偉問上與公何言謙笑曰我有失望君面規我何至爾邪出奏示之偉大慙沮然竟坐謙黨罷歸成化三年復官請毀白琦所鏤板踰年告病歸卒

贊曰于謙爲巡撫時聲績表著卓然負經世之才及時遭艱虞繕兵固圉景帝旣推心置腹謙亦憂國忘家身繫安危志存宗社厥功偉矣變起奪門禍機猝發徐石之徒出力而擠之死當時莫不稱冤然有貞與亨吉祥相繼得禍皆不旋踵而謙忠心義烈與日月爭光卒得復官賜卹公論久而後定信夫

總裁官總理事務經筵講官少保兼太子太保和殿大學士兼管吏部戶部尚書事加六級張廷玉等奉

敕修

王

驥 孫瑾

徐有貞

楊

善 李實趙榮
霍瑄沈固

王越

王驥字尚德東鹿人長身偉幹便騎射剛毅有膽曉暢戎略中永樂四年進士為兵科給事中使山西奏

免鹽池逋課二十餘萬尋遷山西按察司副使洪熙元年入為順天府尹宣德初擢兵部右侍郎代顧佐

署都察院久之署兵部尚書九年命為真正統元年奉詔議邊事越五日未奏帝怒執驥與侍郎鄺埜下

之獄尋得釋阿台朶兒只伯數寇甘涼邊將屢失利侍郎柴車徐晞都御史曹翼相繼經理邊務未能制

二年五月命驥往許便宜行事驥疾驅至軍大會諸將問往時追敵魚兒海子先退敗軍者誰僉曰都指

揮安敬驥先承密旨戮敬遂縛敬斬轅門并宣敕責都督蔣貴諸將皆股慄驥乃大閱將士分兵畫地使

各自防禦邊境肅然閱軍甘涼汰三之一定更番法兵得休息而轉輸亦省俄阿台復入寇帝以任禮為

平羌將軍蔣貴趙安為副驥督軍三年春偕諸將出塞以貴為前鋒而自與任禮帥大軍後繼與貴約曰

不捷無相見也貴擊敵石城敵走兀魯乃貴帥輕騎二千五百人出鎮夷間道兼行三日夜及之禽左丞

脫羅斬首三百餘獲金銀印各一駝馬兵甲千計驥與禮自梧桐林至亦集乃窩樞密同知僉院十五人萬戶二人降其部落窮進至黑泉而趙安等出昌寧至刁力溝亦窩右丞達魯花赤三十人分道夾擊轉戰千餘里朶兒只伯遠遁論功貴禮皆封伯而驥兼大理卿支二俸尋召還理部事久之麓川之役起麓川宣慰使思任發叛數敗王師黔國公沐晟討之不利道卒以沐昂代昂條上攻取策徵兵十二萬人中官王振方用事喜功名以驥可屬思大舉驥亦欲自效六年正月遂拜蔣貴平蠻將軍李安劉聚爲副而驥總督軍務大發東南諸道兵十五萬討之刑部侍郎何文淵侍講劉球先後疏諫不納瀕行賜驥貴金兜牟細鎧蟒繡緋衣朱弓矢驥請得以便宜從事馳傳至雲南部署諸將遣參將冉保由東路趨孟定大軍由中路至騰衝分道夾擊是年十一月與貴以二萬人趨上江圍其寨五日不下會大風縱火焚柵拔之斬首五萬餘級進自夾象石渡下江通高黎貢山道閏月至騰衝長驅抵杉木籠山賊乘高據險築七壘相救驥遣參將宮聚副將劉聚分左右翼緣嶺上而自將中軍奮擊之賊大潰乘勝至馬鞍山踰月抵賊巢山陡絕深塹環之東南面江壁立不可上驥遣前軍覘賊敗其伏兵賊更自間道立柵馬鞍山出大軍後驥戒軍中無動而令都指揮方瑛以大千人突賊寨斬首數百復誘敗其象陣會東路軍冉保等已合木邦車里大候諸土軍破烏木弄戛邦諸寨遣別將守西義渡防賊軼刻期與大軍會驥乃督諸將環

攻其七門積薪縱火風大作賊焚死無算瀾江死者數萬人思任發攜二子走孟養獲其虎符金牌宣慰司印及所掠騰衝諸衛所印章三十有奇犁其巢穴留兵守之而還明年四月遣偏師討維摩土司韋郎羅郎羅走安南俘其妻子傳檄安南縛之以獻五月師還帝遣戶部侍郎王質齋羊酒迎勞賜宴奉天門封推誠宣力武臣特進榮祿大夫上柱國靖遠伯歲祿千二百石世襲指揮同知賜貂蟬冠玉帶貴進侯劉聚等遷賞有差從征少卿李贇郎中侯璉楊寧皆擢侍郎士卒賜予加等府庫爲竭思任發之竄緬甸也其子思機發復帥餘衆居者藍乞入朝謝罪廷議因而撫之王振不可是年八月復命驥總督雲南軍務帥參將冉保毛福壽以往未至而思機發遣弟招寨入貢緬甸亦奏獲思任發要麓川地朝廷不納其貢且敕驥圖緬甸驥因請濟師八年五月復命蔣貴爲平蠻將軍調土兵五萬往發卒轉餉五十萬人驥初檄緬甸送思任發緬人陽聽命持兩端是年冬大軍逼緬甸緬人以樓船載思任發覘官軍而潛以他舟載之歸驥知緬人資木邦水利爲唇齒且慮思機發將以獻其父故仇之故終不肯獻思任發驥乃趨者藍破思機發巢得其妻子部落而思機發獨脫去明年召還加祿三百石命與都御史陳鎰巡延綏寧夏甘肅諸邊初寧夏備邊軍半歲一更後邊事亟三年乃更軍士日久疲罷又益選軍餘防冬家有五六人在邊者軍用重困驥請歲一更當代者以十月至而代者留至來年正月乃遣歸邊備足而軍不勞帝

善其議行之諸邊當是時緬人已以思任發來獻而思機發竊駐孟養地屢遣使入貢謝罪中外咸願罷兵振意終未懈要思機發躬入朝謝沐斌帥師至金沙江招之不至諭孟養執之以獻亦不聽命於是振怒欲盡滅其種類十三年春復命驥總督軍務宮聚爲平蠻將軍帥師十五萬人往明年造舟浮金沙江蠻人柵西岸拒守官軍聯舟爲浮橋以濟拔其柵進破鬼哭山連下十餘寨墜溺死者無算而思機發終脫去不可得是時官軍踰孟養至孟邾海地在金沙江西去麓川千里自古兵力所不至諸蠻見大軍皆震怖而大軍遠涉驥慮餽餉不繼亟謀引還時思機發雖遁匿而思任發少子思陸復擁衆據孟養驥度賊終不可滅乃與思陸約立石表誓金沙江上曰石爛江枯爾乃得渡遂班師驥凡三征麓川卒不得思機發議者咎驥等老師費財以一隅騷動天下而會川衛訓導詹英抗疏劾之大略謂驥等多役民夫昇綵繒散諸土司以邀厚利擅用腐刑詭言進御實充私役師行無紀十五萬人一日起行互相蹂踐每軍負米六斗跋陟山谷自縊者多抵金沙江徬徨不敢渡既渡不敢攻攻而失都指揮路宣翟亨等俟賊解多捕魚戶爲俘以地分木邦緬甸掩敗爲功此何異李宓之敗而楊國忠以捷聞也奏下法司王振左右之得不問而命英從驥軍自效英知往且獲罪匿不去當是時湖廣貴州諸苗所在蜂起圍平越及諸城堡貴州東路閉驥至武昌詔還軍討苗會英宗北狩羣臣劾王振并及驥以驥方在軍且倚之平苗置弗

問命佩平蠻將軍印充總兵官侍郎侯璉總督軍務已而苗益熾衆至十餘萬平越被圍半歲巡按御史黃鍋死守糧盡掘草根食之而驥頓軍辰沅不進景泰元年鎬草疏置竹筒中募人自間道出聞於朝更命保定伯梁琦爲平蠻將軍益兵二萬人侯璉自雲南督之前疾戰大破賊盡解諸城圍而驥亦俘剽平王蟲富等以獻驥還命總督南京機務其冬乞世券與之南畿軍素偷惰驥至以所馭軍法教之于謙弗重也朝廷以其舊臣寵禮之三年四月賜敕解任奉朝請驥年七十餘躍馬食肉盛聲伎如故久之石亨徐有貞等奉英宗復辟驥與謀賞稍後上章自訟言臣子祥入南城爲諸將所擠墮地幾死今論功不及疑有蔽之者帝乃官祥指揮僉事而命驥仍兵部尙書理部事加號奉天翊衛推誠宣力守正文臣光祿大夫餘如故數月請老又三年乃卒年八十三贈靖遠侯諡忠毅傳子瑞及孫添添尙嘉善長公主再傳至孫瑾嘉靖初提督三千營協守南京還掌左府久之佩征蠻將軍印鎮兩廣廣東新寧新興思平間多高山叢箐亡命者輒入諸徭中吏不得問衆至萬餘人流劫高要陽江諸縣官軍討之輒失利三十五年春瑾與巡撫都御史談愷檄諸路土兵誅其魁陳以明悉平諸巢捷聞加太子太保而扶藜葵梅諸山峒馮天恩等據險爲寇者亦數十年瑾復督軍分道進剿破巢二百餘復以功廢一子錦衣百戶言官劾其暴橫召還爵傳至明亡乃絕

徐有貞字元玉初名程吳人宣德八年進士選庶吉士授編修爲人短小精悍多智數喜功名凡天官地理兵法水利陰陽方術之書無不諳究時承平既久邊備媮惰而西南用兵不息程以爲憂正統七年疏陳兵政五事帝善之而不能用十二年進侍講十四年秋熒惑入南斗程私語友人劉溥曰禍不遠矣亟命妻子南還及土木難作郕王召廷臣問計程大言曰驗之星象稽之麻數天命已去惟南遷可以紓難太監金英叱之胡濙陳循咸執不可兵部侍郎于謙曰言南遷者可斬也程大沮不敢復言景帝卽位遣科道官十五人募兵於外程行監察御史事往彰德寇退召還仍故官程急於進取自劾南遷議爲內廷訕笑久不得遷因遺陳循玉帶且用星術言公帶將玉矣無何循果加少保大喜因屢薦之而是時用人多決於少保于謙程屬謙門下士遊說求國子祭酒謙爲言於帝帝曰此議南遷徐程邪爲人傾危將壞諸生心術程不知謙之薦之也以爲沮已深怨謙循勸程改名因名有貞景泰三年遷右諭德河決沙灣七載前後治者皆無功廷臣共舉有貞乃擢左僉都御史治之至張秋相度水勢條上三策一置水門一開支河一濬運河議既定督漕都御史王竑以漕渠淤淺滯運艘請急塞決口帝敕有貞如竑議有貞守便宜言臨清河淺舊矣非因決口未塞也漕臣但知塞決口爲急不知秋冬雖塞來春必復決徒勞無益臣不敢邀近功詔從其言有貞於是大集民夫躬親督率治渠建閘起張秋以接河沁河流之旁出不順

者爲九堰障之更築大堰礎以水門闕五百五十五日而工成名其渠曰廣渠闕曰通源方工之未成也
帝以轉漕爲急工部尙書江淵等請遣中書偕文武大臣督京軍五萬人往助役期三月畢工有貞言京
軍一出日費不貲遇漲則束手坐視無所施力今泄口已合決堤已堅但用沿河民夫自足集事議遂寢
事竣召還佐院事帝厚勞之復出巡視漕河濟寧十三州縣河夫多負官馬及他雜辦所司趣之亟有貞
爲言免之七年秋山東大水河堤多壞惟有貞所築如故有貞乃修舊堤決口自臨清抵濟寧各置減水
閘水患悉平還朝帝召見獎勞有加進左副都御史八年正月景帝不豫石亨張軌等謀迎上皇以告太
常卿許彬彬曰此不世功也彬老矣無能爲徐元玉善奇策盍與圖之亨卽夜至有貞家聞之大喜曰須
令南城知此意軌曰陰達之矣令太監曹吉祥入白太后辛巳夜諸人復會有貞所有貞升屋覽乾象亟
下曰時至矣勿失時方有邊警有貞令軌詭言備非常勒兵入大內亨掌門鑰夜四鼓開長安門納之既
入復閉以遏外兵時天色晦冥亨軌皆惶惑謂有貞曰事當濟否有貞大言必濟趣之行既薄南城門錮
毀牆以入上皇燈下獨出問故有貞等俯伏請登位乃呼進舉兵士惶懼不能舉有貞率諸人助挽以行
星月忽開朗上皇各問諸人姓名至東華門門者拒弗內上皇曰朕太上皇帝也遂反走乃升奉天門有
貞等常服謁賀呼萬歲景帝明當視朝羣臣咸待漏闕下忽聞殿中呼噪聲方驚愕俄諸門畢啟有貞出

號於衆曰太上皇帝復位矣趣入賀卽日命有貞兼學士入內閣參預機務明日加兵部尙書有貞謂亨曰願得冠側注從兄後亨爲言於帝封武功伯兼華蓋殿大學士掌文淵閣事賜號奉天翊衛推誠宣力守正文臣祿千一百石世錦衣指揮使給誥券有貞遂誣少保于謙大學士王文殺之內閣諸臣斥逐略盡陳循素有德於有貞亦弗救也事權盡歸有貞中外咸側目而有貞愈益發舒進見無時帝亦傾心委任有貞既得志則思自異於曹石窺帝於二人不能無厭色乃稍稍裁之且微言其貪橫狀帝亦爲之動御史楊瑄奏劾亨吉祥侵占民田帝問有貞及李賢皆對如瑄奏有詔獎瑄亨吉祥大怨恨日夜謀搆有貞帝方眷有貞時屏人密語吉祥令小豎竊聽得之故洩之帝帝驚問曰安所受此語對曰受之有貞某日語某事外間無弗聞帝自是疏有貞會御史張鵬等欲糾亨他罪未上而給事中王鉉泄之亨吉祥二人乃泣訴於帝謂內閣實主之遂下諸御史獄併逮繫有貞及李賢忽雷雹交作大風折木帝感悟重違亨意乃釋有貞出爲廣東參政亨等憾未已必欲殺之令人投匿名書指斥乘輿云有貞怨望使其客馬士權者爲之遂追執有貞於德州并士權下詔獄榜治無驗會承天門災肆赦亨吉祥慮有貞見釋言於帝曰有貞自撰武功伯券辭云纘禹成功又自擇封邑武功禹受禪爲帝武功者曹操始封也有貞志圖非望帝出以示法司刑部侍郎劉廣衡等奏當棄市詔徙金齒爲民亨敗帝從容謂李賢王翱曰徐有貞

何大罪爲石亨輩所陷耳其釋歸田里成化初復冠帶閒住有貞旣釋歸猶冀帝復召時時仰觀天象謂將星在吳益自負常以鐵鞭自隨數起舞及聞韓雍征兩廣有功乃擲鞭太息曰孺子亦應天象邪遂放浪山水間十餘年乃卒有貞初出獄時拊士權背曰子義士也他日一女相託金齒歸士權時往候之絕不及婚事士權辭去終身不言其事人以是薄有貞而重士權

楊善字思敬大興人年十七爲諸生成祖起兵預城守有勞授典儀所引禮舍人永樂元年改鴻臚寺序班善偉風儀音吐洪亮工進止每朝謁引進奏時上目屬之累進右寺丞仁宗卽位擢本寺卿宣德六年被劾下獄褫冠帶踰月正統六年子容詐作中官書假金於尙書吳中事覺謫戍威遠衛置善不問久之擢禮部左侍郎仍視鴻臚事十四年八月扈駕北征及土木師潰善間行得脫也先將入寇改左副都御史與都督王通提督京城守備寇退進右都御史視鴻臚如故景泰元年廷臣朝正畢循故事相賀於朝房善獨流涕曰上皇在何所而我曹自相賀乎衆媿爲之止是年夏李實羅綺使瓦刺議罷兵未還而也先使至言朝廷遣使報阿刺知院而不遣大臣報可汗及太師事必不濟尙書王直等奏其言廷議簡四人爲正副使與偕行帝命俟李實還議之已而實將至乃命善及侍郎趙榮爲使齎金銀書幣往先是袁敏者請齎服御物問上皇安不納及是尙書吳濛等言上皇蒙塵久御用服食宜付善等隨行亦不報時

也先欲還上皇而敕書無奉迎語自齋賜也先外善等無他賜善乃出家財悉市彼中所需者攜以往既至其館伴與飲帳中詫善曰土木之役六師何怯也善曰彼時官軍壯者悉南征王司禮邀大駕幸其里不爲戰備故令汝得志耳今南征將士歸可二十萬又募中外材官技擊可三十萬悉教以神鎗火器藥弩百步外洞人馬腹立死又用策士言緣邊要害鐵椎三尺馬蹄踐輒穿又刺客林立夜度營幕若猿猱伴色動善曰惜哉今皆置無用矣問何故曰和議成歡好且若兄弟安用此因以所齋遺之其人喜悉以語也先明日謁也先亦大有所遺也先亦喜善因詰之曰太上皇帝朝太師遺貢使必三千人歲必再資金幣載途乃背盟見攻何也也先曰奈何削我馬價予帛多剪裂前後使人往多不歸又減歲賜善曰非削也太師馬歲增價難繼而不忍拒故微損之太師自度價比前孰多也帛剪裂者通事爲之事露誅矣卽太師買馬有劣弱貂或敝亦豈太師意耶且使者多至三四千人有爲盜或犯他法歸恐得罪故自亡耳留若奚爲貢使受宴賜上名或浮其人數朝廷核實而予之所減乃虛數有其人者固不減也也先屢稱善善復曰太師再攻我屠戮數十萬太師部曲死傷亦不少矣上天好生太師好殺故數有雷警今還上皇和好如故中國金幣日至兩國俱樂不亦美乎也先曰敕書何以無奉迎語善曰此欲成太師令名使自爲之若載之敕書是太師迫於朝命非太師誠心也也先大喜問上皇歸將復得爲天子乎善曰

天位已定難再移也先曰堯舜如何善曰堯讓舜今兄讓弟正相同也其平章昂克問善何不以重寶來購善曰若齋貨來人謂太師圖利今不爾乃見太師仁義爲好男子垂史策頌揚萬世也先笑稱善知院伯顏帖木耳勸也先留使臣而遣使要上皇復位也先懼失信不可竟許善奉上皇還時舉朝競奇善功而景帝以非初遣旨薄其賞遷左都御史仍蒞鴻臚事二年廷臣朝正旦畢修賀朝房善又曰上皇不受賀我曹何相賀也三年正月加太子太保六年以衰老乞致仕優詔不許善狀貌魁梧應對捷給然無學術滑稽對客鮮莊語家京師治第郭外園多善果歲時饋公卿戚里中貴無不得其歡心王振用事善媚事之至是又與石亨曹吉祥結天順元年正月亨吉祥奉上皇復辟善以預謀封奉天翊衛推誠宣力武臣特進光祿大夫柱國興濟伯歲祿千二百石賜世券掌左軍都督府事尙書吳濙頌善迎駕功命兼禮部尙書尋改守正文臣善使瓦剌攜子四人行至是並得官又爲從子養子乞恩得官者復十數人氣勢烜赫招權納賄亨輩嫉而間之以是漸疎外二年五月卒贈興濟侯諡忠敏善負才辨以巧取功名而檢校爲士論所棄其爲序班坐事與庶吉士章樸同繫獄久之相狎時方窮治方孝孺黨樸言家有孝孺集未及燬善從借觀密奏之樸以是誅死而善得復官于謙王文之戮陳循之竄善亦有力焉子宗襲爵後革奪門功降金吾指揮使孫增尙公主李實字孟誠合州人正統七年進士爲人恣肆無拘檢有口辨景

泰初爲禮科給事中也先令完者脫歡議和實請行擢禮部右侍郎以往少卿羅綺爲副至則見上皇頗得也先要領還言也先請和無他意及楊善往上皇果還是年十月進右都御史巡撫湖廣五年召還掌院事初實使謁上皇請還京引咎自責失上皇意後以居鄉暴橫斥爲民趙榮字孟仁其先西域人元時入中國家閩縣舅薩琦官翰林從入都以能書授中書舍人正統十四年十月也先擁上皇至大同知府霍瑄謁見慟哭而返也先遂犯京師奉上皇登土城邀大臣出迎榮慨然請行大學士高穀拊其背曰子忠義人也解所佩犀帶贈之卽擢大理右少卿充鴻臚卿偕右通政王復出城朝見進羊酒諸物也先以非大臣遣之還而邀于謙石亨王直吳濙出景帝不遣改榮太常少卿仍供事內閣景泰元年七月擢工部右侍郎偕楊善等往敕書無奉迎語善口辯榮左右之竟奉上皇歸進左侍郎行人王宴請開沁河通漕運再下廷議言不便遣榮往勘還亦言不便尋奉敕會山東河南三司相度河道衆以榮不由科目慢之榮怒多所撻辱又自攝衣探水深淺三司各上章言榮單馬馳走驚駭軍民杖傷縣官鬻廩米多取其直撫按薛希璉張琛亦以聞章下治河僉都御史徐有貞覈奏法司言榮雖失大體終爲急於國事鬻米從人所爲諸臣侮大臣抗敕旨宜逮治希璉琛亦宜罪帝令按臣責取諸臣供狀宥之天順元年進尙書曹欽反榮策馬大呼於市曰曹賊作逆壯士同我討罪果有至者卽率之往賊平英宗與李賢言歎榮忠

命兼大理寺卿食其俸七年以疾罷成化十一年卒賜恤如制霍瑄字廷璧鳳翔人由鄉舉入國學授大同通判正統十二年以武進伯朱冕薦就擢知府也先擁英宗至城下瑄與理餉侍郎沈固等出謁叩馬號泣衆露刃叱之不爲動上皇命括城內金帛瑄悉所有獻之上皇嘉歎寇數出沒大同渾源伺軍民樵採輒驅掠或幸脫歸率殘傷肢體遺民相率入城無所棲又乏食瑄俱爲奏之老弱聽暫徙發粟振而所留城守丁壯除賦役秩滿當遷鎮巡諸臣乞留詔加山西右參政仍治府事英宗復位徵拜瑄工部右侍郎而固亦以石亨薦起爲戶部尙書旣而巡撫上瑄治行賜誥旌異初瑄在大同巡撫年富被逮瑄資其家還里爲鎮守太監韋力轉所惡撻之十餘至是瑄以聞且言力轉每宴輒用妓樂服御僭侈如王者強取部民女爲妾力轉亦許瑄違法事帝兩釋焉其年轉左賜二品服成化初屢爲言官所劾命致仕卒於京師瑄初治郡有聲晚節不檢特以艱危時見知天子遂久列顯位沈固丹陽人永樂中起家鄉舉積官至尙書石亨敗乞休去

王越字世昌潯人長身多力善射涉書史有大略登景泰二年進士廷試日旋風起颺其卷去更給卷乃畢事授御史出按陝西聞父訃不俟代輒歸爲都御史所劾帝特原之天順初起掌諸道章奏超拜山東按察使七年大同巡撫都御史韓雍召還帝難其代喟然曰安得如雍者而任之李賢薦越召見越俸服

短袂進止便利帝喜擢右副都御史以行甫至遭母憂奪情視事越乃繕器甲簡卒伍修堡砦減課勸商爲經久計成化三年撫寧侯朱永征毛里孩以越贊理軍務其秋兼巡撫宣府五年冬寇入河套延綏巡撫王銳請濟師詔越帥師赴之河套者周朔方秦河南地土沃豐水草東距山西偏頭關西距寧夏可二千里三面阻河北拊榆林之背唐二受降城在河外故內地明初阻河爲守延綏亦無事自天順間毛里孩等三部始入爲寇然時出沒不敢久駐至是始屯牧其中屢爲邊患越至榆林遣遊擊將軍許寧出西路龍州鎮靖諸堡范瑾出東路神木鎮羌諸堡而自與中官秦剛按榆林城爲聲援寧戰黎家澗瑾戰崖窰川皆捷右參將神英又破敵於鎮羌寇乃退明年正月以捷聞越引還抵偏頭關延綏告警兵部劾越擅還詔弗罪而令越屯延綏近地爲援寇萬餘騎五路入掠越令寧等擊退之進右副都御史是年三月朝廷以阿羅出等擾邊不止拜撫寧侯朱永爲將軍與越共圖之破敵開荒川諸將追奔至牛家寨阿羅出中流矢走論功進右都御史又明年越以方西征辭大同巡撫詔聽之加總督軍務專辦西事然是時寇數萬而官軍堪戰者僅萬人又分散防守勢不敵永越乃條上戰守二策尙書白圭亦難之請敕諸將守其年寇復連入懷遠諸堡永越禦却之圭復請大舉搜套明年遣侍郎葉盛至軍議時永已詔還越以士卒衣裝盡壞馬死過半請且休兵與盛偕還而廷議以套不滅三邊終無寧歲先所調諸軍已踰八萬

將權不一迄無成功宜專遣大將調度乃拜武靖伯趙輔爲平虜將軍敕陝西寧夏延綏三鎮兵皆受節制越總督軍務比至寇方深入環慶固原飽掠軍竟無功越輔以滿都魯孛羅忽札加思蘭方強盛勢未可破乃奏言欲窮搜河套非調精兵十五萬不可今餽餉煩勞公私困竭重加科斂內釁可虞宜姑事退守散遣土馬量留精銳就糧廊延沿邊軍民悉令內徙其寇所出沒之所多置烽燧鑿塹築牆以爲保障奏上廷議不決越等又奏寇知我軍大集移營近河潛謀北渡殆不戰自屈但山陝荒旱芻糧缺供邊地早寒凍餒相繼以時度之攻取實難請從防守之策臣等亦暫還朝於是部科諸臣劾越輔欺謾會輔有疾召還以寧晉伯劉聚代明年越與聚敗寇漫天嶺進左都御史是時三遣大將皆以越總督軍務寇每入小擊輒去軍罷卽復來率一歲數入將士益玩寇而寇勢轉熾其年九月滿都魯及孛羅忽札加思蘭留妻子老弱於紅鹽池大舉深入直抵秦州安定諸州縣越策寇盡銳西不備東偏乃率延綏總兵官許寧遊擊將軍周玉各將五千騎爲左右哨出榆林踰紅兒山涉白鹽灘兩晝夜行八百里將至暴風起塵翳目一老卒前曰天贊我也去而風使敵不覺還軍遇歸寇處下風乘風擊之蔑不勝矣越遽下馬拜之擢爲千戶分兵千爲十覆而身率寧玉張兩翼薄其營大破之禽斬三百五十獲駝馬器械無算焚其廬帳而還及滿都魯等飽掠歸則妻子畜產已蕩盡相顧痛哭自是遠徙北去不敢復居河套西陲息肩者

數年初文臣視師者率從大軍後出號令行賞罰而已越始多選跳盪士爲腹心將親與寇搏又以間覘敵累重邀劫之或剪其零騎用是數有功十年春廷議設總制府於固原舉定西侯蔣琬爲總兵官越提督軍務控制延綏寧夏甘肅三邊總兵巡撫而下並聽節制詔罷琬卽以越任之三邊設總制自此始論功加太子少保增俸一級紀功郎中張謹兵科給事中郭鐘等論劉聚等濫殺冒功并劾越妄奏越方自以功大賞薄遂怏怏稱疾還朝明年與左都御史李賓同掌院事兼督十二團營越素以才自喜不修小節爲朝議所齟至是乃破名檢與羣小關通奸人韋英者以官奴從征延綏冒功得百戶汪直掌西廠用事英爲爪牙越因英自結於直內閣論罷西廠越遇大學士劉吉劉珣於朝顯謂之曰汪直行事亦甚公如黃賜專權納賂非直不能去商萬在事久是非多有所忌憚二公入閣幾日何亦爲此珣曰吾輩所言非爲身謀使直行事皆公朝廷置公卿大夫何爲越不能對兵部尙書項忠罷越當遷而朝命予陝西巡撫余子俊越彌不平請解營務優詔不許因自陳搗巢功爲故尙書白圭所抑從征將士多未錄乞移所加官酬之子俊亦言越賞不酬功乃進兵部尙書仍掌院事尋加太子太保越急功名汪直初東征越望督師爲陳鉞所沮鉞驟寵心益艷之十六年春延綏守臣奏寇潛渡河入靖虜越乃說直出師詔拜保國公朱永爲平虜將軍直監軍而越提督軍務越說直令永率大軍由南路已與直將輕騎循塞垣而西俱

會榆林越至大同聞敵帳在威寧海子則盡遣宣大兩鎮兵二萬出孤店潛行至貓兒莊分數道值大風雨雪晦冥進至威寧寇猶不覺掩擊大破之斬首四百三十餘級獲馬騾牛羊六千師不至榆林而還承所出道迂不見敵無功由是封越威寧伯世襲歲祿千二百石越受封不當復領都察院而越不欲就西班御史許進等頌其功引王驥楊善例請仍領院事提督團營從之明年復與直承帥師出大同適寇入掠追擊至黑石崖禽斬百二十餘人獲馬七百匹進太子太傅增歲祿四百石明制文臣不得封公侯越從勳臣例改掌前軍都督府總五軍營兵督團營如故自是真爲武人且望侯矣其年五月宣府告警命佩平胡將軍印充總兵官復以直監督軍務率京軍萬人赴之比至寇已去因留屯其地至冬而直爲其儕所間寵衰越等再請班師不許陳鉞居兵部亦代直請帝切責之兩人始懼已大同總兵官孫鉞卒卽命越代之而以直總鎮大同宣府悉召京營將士還明年寇犯延綏越等調兵援之頗有斬獲益祿五十石帝是時益知越直交結狀大學士萬安等以越有智計恐誘直復進乃請調越延綏以離之兩人勢益衰明年直得罪言官并劾越詔奪爵除名謫居安陸三子以功蔭得官者皆削籍且使使齎敕諭之越聞使至欲自裁見敕有從輕語乃稍自安越旣爲禮法士所疾自負豪傑驚然自如飲食供奉擬王者射獵擊樂自恣雖謫徙不少衰故其得罪時議頗謂太過而竟無白之者孝宗立赦還弘治七年越屢疏訟冤

詔復左都御史致仕越年七十耄矣復結中官李廣以中旨召掌都察院事給事中季源御史王一言等交章論乃寢十年冬寇犯甘肅廷議復設總制官先後會舉七人不稱旨吏部尙書屠濬以越名上乃詔起原官加太子太保總制甘涼邊務兼巡撫越言甘鎮兵弱非籍延寧兩鎮兵難以克敵請兼制兩鎮解巡撫事從之明年越以寇巢賀蘭山後數擾邊乃分兵三路進剿斬四十三級獲馬駝百餘加少保兼太子太傅遂條上制置哈密事宜會李廣得罪死言官連章劾廣黨皆及越越聞憂恨其冬卒於甘州贈太傅諡襄敏越姿表奇偉議論飄舉久歷邊陲身經十餘戰知敵情僞及將士勇怯出奇制勝動有成算獎拔士類籠罩豪俊用財若流水以故人樂爲用又嘗薦楊守隨倡鍾屠蒲輩皆有名於世睦族敦舊振窮卹貧如恐不及其膽智過絕於人嘗與朱永帥千人巡邊寇猝至永欲走越止之列陣自固寇疑未敢前薄暮令騎皆下馬銜枚魚貫行自率驍勇爲殿從山後行五十里抵城謂永曰我一動寇追擊無噍類矣示暇以惑之也下馬行無軍聲令寇不覺耳性故豪縱嘗西行謁秦王王開筵奏妓越語王下官爲王吠犬久矣盜無以相酌者因盡乞其妓女以歸一夕大雪方圍爐飲諸妓擁琵琶侍一小校調敵還陳敵情未竟越大喜酌金卮飲之命彈琵琶侑酒卽以金卮賜之語畢益喜指妓絕麗者目之曰若得此何如校皇恐謝越大笑立予之校所至爲盡死力越在時人多咎其貪功及死而將餒卒愴冒功糜餉滋甚邊臣

竟未有如越者

贊曰人非有才之難而善用其才之難王驥王越之將兵楊善之奉使徐有貞之治河其才皆有過人者假使隨流平進以幹略自奮不失爲名卿大夫而顧以躁於進取依附攀援雖剖符受封在文臣爲希世之遇而譽望因之墮損甚亦不免削奪名節所繫可不重哉

明史卷一百七十一終

總裁官總理事務經筵講官少保兼太子太保保和殿大學士兼管吏部戶部尚書事加六級張廷玉等奉
敕修

羅亨信 候璉 楊寧 王來 孫原貞孫需張憲 朱鑑

楊信民 張驥竺淵耿定王晟鄧順 馬謹 程信 白圭子鉞

張瓚謝士元 孔鏞李時敏 鄧廷瓚 王軾 劉丙

羅亨信字用實東莞人永樂二年進士改庶吉士授工科給事中出視浙江水災奏蠲三縣租進吏科右
給事中坐累謫交趾為吏居九年仁宗嗣位始召入為御史覈通州倉儲巡按畿內清軍山西皆有聲宣
德中有薦其堪方面者命食按察僉事俸待遷英宗即位之二三月擢右僉都御史練兵平涼西寧正統二
年蔣貴討阿台朶兒只伯亨信參其軍務至魚兒海貴等以芻餉不繼留十日引還亨信讓之曰公等受
國厚恩敢臨敵退縮耶死法孰與死敵貴不從亨信上章言貴逗遛狀帝以其章示監督尚書王驥等明
年進兵大破之亨信以參贊功進秩一等父喪歸葬還朝改命巡撫宣府大同參將石亨請簡大同民三
之一為軍亨信奏止之十年進右副都御史巡撫如故時遣官度二鎮軍田一軍八十畝外悉徵稅五升

亨信言文皇帝時詔邊軍盡力墾田毋徵稅陛下復申命之今奈何忽爲此舉塞上諸軍防邊勞苦無他生業惟事田作每歲自冬徂春迎送瓦刺使臣三月始得就田七月又復刈草八月以後修治關塞計一歲中曾無休暇況邊地磽瘠霜早收薄若更徵稅則民不復甯必致竄逸計臣但務積粟不知人心不固雖有粟將誰與守帝納其言而止初亨信嘗奏言也先專候釁端以圖入寇宜預於直北要害增置城衛爲備不然恐貽大患兵部議寢不行及土木之變人情洶懼有議棄宣府城者官吏軍民紛然爭出亨信仗劍坐城下令曰出城者斬又誓諸將爲朝廷死守人心始定也先挾上皇至城南傳命啟門亨信登城語曰奉命守城不敢擅啟也先邊巡引去赤城鵬鵬懷來永寧保安諸守將棄城遁並按其罪當是時車駕旣北寇騎日薄城下關門左右皆戰場亨信與總兵楊洪以孤城當其衝外禦強寇內屏京師洪旣入衛又與朱謙共守勞績甚著著兜鍪處顛髮盡禿景帝卽位進左副都御史明年年七十有四矣乞致仕許之歸八年卒於家

侯璉字廷玉澤州人少慷慨有志節登宣德二年進士授行人烏撒烏蒙土官以爭地相讎殺詔遣璉及同官章聰諭解之正其疆理而還副侍郎章敏使交趾關門卑前驅偃而入璉叱曰此狗竇耳奈何辱天使交人爲毀關乃入及歸餽遺無所受遷兵部主事正統初從尙書柴車等出鐵門關禦阿台有功進郎

中從王驥征麓川至金齒驥自統大軍擊思任發而遣璉援大侯州賊衆三萬至督都指揮馬讓盧鉞擊走之遂由高黎貢山兼程夜行會大軍壓其巢麓川平拜禮部右侍郎參贊雲南軍務詔與楊寧二年更代驥再征麓川璉以功遷左九年代還母憂起復尋調兵部十一年復代寧鎮雲南思機發竄孟養驥復南征璉與都督張軌分兵進抵金沙江破之鬼哭山璉書褒賚景泰初貴州苗韋同烈叛圍新添平越清平興隆諸衛命璉總督貴州軍務討之時副總兵田禮已解新添平越圍璉遂遣兵攻敗都盧水西諸賊貴州道始通又調雲南兵由烏撒會師開畢節諸路檄普安土兵援安南衛而自率師攻紫塘爾勒等十餘寨會賊復圍平越回師擊退之遂分哨七盤坡羊腸河楊老堡解清平圍東至重安江與驥兵會興隆抵鎮遠道皆通捷聞進兵部尙書進克賞改苗禽其渠王阿同等三十四人別賊阿趙僞稱趙王率衆掠清平璉復討禽之水西苗阿忽等大族皆自乞歸化詔璉隨方處置景泰元年八月以勞瘁卒於普定年五十三賜祭葬廕其子錦衣衛世襲千戶

楊寧字彥謐歙人宣德五年進士授刑部主事機警多才能負時譽正統初從尙書魏源巡視宣大四年與都督吳亮征麓川賊款軍門約降寧曰兵未加而先降誘我也宜嚴兵待之不聽令寧督運金齒已而賊果大至官兵敗績諸將獲罪寧擢郎中復從王驥至騰衝破賊寧與太僕少卿李贊督戰並有功師還

靈超拜刑部右侍郎遭母憂奪情九年代侯璉參贊雲南軍務時麓川甫平靈以騰衝地要害與都督沐昂築城置衛設戍兵控諸蠻邊方遂定居二年召還閩浙盜起命靈鎮江西賊至輒擊敗之暇則詢民疾苦境內嚮服景泰初召拜禮部尙書偕胡濙理部事迤北可汗遣使入貢靈言宜留使數日寔勞賜予視也先使倍厚彼性多猜二人必內搆邊患可緩帝務誠信不許其冬以足疾調南刑部七年爲御史莊昇所劾遣覈未報靈力詆言官都察院再劾靈奪制言路詔免其罪錄狀示之英宗復辟命致仕踰年卒靈有才而善交權貴嘗自敘前後戰功乞世廕子堦方一歲遂得新安衛副千戶

王來字原之慈谿人宣德二年以會試乙榜授新建教諭靈王府以諸生充樂舞來請易以道士諸王府設樂舞生始此六年以薦擢御史出按蘇松常鎮四府命偕巡撫周忱考察屬吏敕有請自上裁語來言賊民吏去之惟恐不速必請而後行民困多矣帝爲改敕賜之中官陳武以太后命使江南橫甚來數抑之武還懇於帝帝問都御史顧佐巡按誰也佐以來對帝歎息稱其賢曰識之及報命獎諭甚至英宗卽位以楊士奇薦擢山西左參政言流民所在成家及招還故土每以失產復逃去乞請隨之附籍便又言郡縣官不以農業爲務致民多游惰催徵輒致已命朝廷憫其失業下詔蠲除而田日荒閒租稅無出累及良民宜擇守長賢者以課農爲職其荒田令附近之家通力合作供租之外聽其均分原主復業則還

之靈桑可裨本業者聽其規畫仍令提學風憲官督之庶人知務本從之來居官廉練達政事侍郎于謙擢山西亟稱其才可置近侍而來執法嚴疾惡尤甚以公事杖死縣令不職者十人逮下獄當徒遇赦以原官調補廣東來自此始折節爲和平而政亦修舉正統十三年遷河南左布政使明年改左副都御史巡撫河南及湖廣襄陽諸府也先逼京師來督兵勤王渡河聞寇退乃引還景泰元年貴州苗叛總督湖廣貴州軍務侯璉卒於軍進來右都御史代之與保定伯梁瑤都督毛勝方瑛會兵進討至靖州賊掠長沙寶慶武岡來等分道邀擊俘斬三千餘人賊遁去已復出掠官軍連戰皆捷賊魁韋同烈據興隆劫平越清平諸衛來與方瑛擊敗之賊退保香爐山山陡絕勝瑛與都督陳友三道進來與瑛大軍繼之先後破三百餘寨會師香爐山下發礮轟崖石聲動地賊懼縛同烈并賊將五十八人降餘悉解散遂移軍清平且檄四川兵共剿都勻草塘諸賊賊望風具牛酒迎降賊平班師詔留來瑤鎮撫尋命來兼巡撫貴州奏言近因黔楚用兵暫行鬻爵之例今寇賊稍寧惟平越都勻等四衛乏餉宜召商中鹽罷納米例從之三年十月召還加兼大理寺卿瑤以來功大乞加旌異都給事中蘇霖駁之乃止來還在道以貴州苗復反救回師進討明年事平召爲南京工部尙書英宗復辟六尙書悉罷來歸成化六年卒於家孫原貞名瑀以字行德興人永樂十三年進士授禮部主事歷郎中英宗初用薦擢河南右參政居官清

慎有吏才正統八年大臣會薦遷浙江左布政使久之盜大起閩浙間赦而再叛景帝卽位發兵討之原
貞嘗策賊必叛上方略請爲備至是卽命原貞參議軍事深入禽其魁而温州餘賊猶未滅命都指揮李
信爲都督僉事調軍討之遂拜原貞兵部左侍郎參信軍務鎮守浙江丁母憂當去副都御史軒輓請留
之報可景泰元年原貞進兵搗賊巢俘斬賊首陶得二等招撫三千六百餘人追還被掠男女捷聞璽書
獎勵請奔喪踰月還鎮復分兵剿平餘寇奏析瑞安地增置泰順析麗水青田二縣地置雲和宣平景寧
四邑建官置戍盜患遂息論功進秩一等浙官田賦重右布政使楊瓚請均於民田輕額者詔原貞督之
田賦以平三年請褒贈禦賊死事武臣指揮同知脫綱王瑛都指揮僉事沈麟崔源皆得贈卹六月進兵
部尙書鎮守如故未幾命考察福建庶官因留鎮焉福州建寧二府舊有銀冶因寇亂罷朝議復開原貞
執不可乃寢五年冬疏言四方屯軍率以營繕轉輸諸役妨耕作宜簡精銳實伍餘悉歸之農苟增萬人
屯卽歲省支倉糧十二萬石且積餘糧六萬石兵食豈有不足哉今歲漕數百萬石道路費不貲如浙江
糧軍兌運米石加耗米七斗民自運米石加八斗其餘計水程遠近加耗是田不加多而賦斂實倍欲民
無困不可得也況今太倉無十數年之積脫遇水旱其何以濟宜量入爲出汰冗食浮費俟倉儲旣裕漸
減歲漕數而民困可蘇也臣昔官河南稽諸逃民籍凡二十餘萬戶悉轉徙南陽唐鄧襄樊間羣聚謀生

安保其不爲盜宜及今年豐遺近臣循行督有司籍爲編戶給田業課農桑立社學鄉約義倉使敦本務
業生計既定徐議賦役庶無他日患時不能盡用後劉千斤之亂果如原貞所料已復鎮浙江英宗復位
罷歸成化十年卒年八十七原貞所至有勞績在浙江尤著名孫需字孚吉成化八年進士爲常州府推
官疑獄立剖擢南京御史劾僧繼曉忤旨予杖出爲四川副使弘治中累官右副都御史巡撫河南歲凶
募民築汴河堤堤成而饑者亦濟縵守中官劉瑯貪橫奸民赴瑯訟者需以法論之遣戍瑯爲跪請執不
聽瑯恨次骨大臣子橫于鄉需抑之瑯與謀改需撫陝西尋故撫鄖陽安輯流民占籍者九萬餘戶正德
元年召爲南京兵部右侍郎四年就拜禮部尙書未兩月劉瑾惡之追論撫河南時事罰米輸邊廷推需
刑部尙書中旨令致仕瑾誅起南京工部尙書就改刑部再改吏部十三年乞休去嘉靖初卒諡清簡張
憲字廷式與需同里同舉進士相代爲尙書嘗爲浙江右布政使後以工部右侍郎督易州山廠公帑無
毫髮私歷南京禮部尙書劉瑾勒致仕瑾誅起工部卒

朱鑑字用明晉江人童時刲股療父疾舉鄉試授蒲圻教諭宣德二年與廬陵知縣孔文英等四十三人
以願佐薦召於各道觀政三月遂擢御史巡按湖廣諭降梅花峒賊蕭啟寧等請復舊制同副使僉事按
行所部問民疾苦湖湘俗男女婚嫁多踰三十鑑申明禮制其俗遂變三載代歸正統五年復按廣東奏

設欽州守備都指揮奉命錄囚多所平反招撫逋叛甚衆還朝請天下按察司增僉事一人專理屯田遂爲定制七年用薦擢山西左參政奏減平陽採薪供邊夫役景帝監國進布政使尋擢右副都御史巡撫其地上言也先奸詭百端殺掠無已復假和親遣使覘伺以送駕爲名覘得開關延接稍示抗拒彼卽有辭其謀既深我慮宜遠宜暫罷中貴監軍之制假總兵以生殺權使志無所撓計有所施整散兵募勇士重懸賞格鼓勵義旅徵勤王兵數道並進戮力復讎庶大駕可還敵兵自退曩者江南寇發皆以誅王振爲名夫事歸朝廷則治歸宦官則亂昔高皇帝與羣臣議事必屏去左右恐泄事機乞杜權倖之門凡軍國重事屬任大臣必當有濟景帝嘉納之時瓦刺窺塞下鑑日夜爲守禦計景泰元年敵數萬騎攻雁門都指揮李端擊却之尋犯河曲及義井堡殺二指揮圍忻代諸州石亨等不能禦長驅抵太原城北山西大震命鑑移鎮雁門而別遣都督僉事王良鎮太原援兵漸集敵亦饜乃引去時山西仍遺兵荒鑑外飭戎備內撫災民勞瘁備至二年十月鎮守山西都御史羅通召還命鑑兼領其事明年詔遣大臣行天下黜陟有司禮部侍郎鄒幹至山西多所論劾鑑請召幹還幹因極論鑑徇護帝是幹言其年十月召鑑佐院事至京致仕去初景帝易儲鑑貽大學士陳循書言不可且曰陛下於上皇當避位以全大義循大駭

英宗復位鑑詣闕上表賀帝曰鑑老疾何妄來其速令還家居二十餘年卒

楊信民名誠以字行浙江新昌人鄉舉入國學宣德時除工科給事中母憂歸營墓土石必躬舁數百步曰吾墓吾母而專役他人吾不安也服闋改刑科正統中清軍江西還奏民隱五事多議行尋以王直薦擢廣東左參議清操絕俗嘗行田野訪利弊爲更置性剛負氣按察使郭智不法信民劾之下獄黃翰代智信民復發其奸已又劾僉事章廣廣遂許信民因與翰俱被逮軍民譁然詣闕下乞留信民詔復信民官而翰廣鞫實除名景帝監國于謙薦之命守備白羊口會廣東賊黃蕭養圍廣州急嶺南人乞信民乃以爲右僉都御史巡撫其地土民聞而相慶曰楊公來矣時廣州被圍久將士戰輒敗禁民出入樵采絕而鄉民避賊來者拒不納多爲賊所害民益愁苦歸賊信民至開城門發倉廩刻木鏤給民得出入賊見木鏤曰此楊公所給也不敢傷避賊者悉收保民若更生信民益厲甲兵多方招撫降者日至乃使使持檄入賊營諭以恩信蕭養曰得楊公一言死不恨尅日請見信民單車詣之隔濠與語賊黨望見謹曰果楊公也爭羅拜有泣下者賊以大魚獻信民受之不疑蕭養且降而都督董興大軍至賊忽中變夜有大星隕城外七日而信民暴疾卒時景泰元年三月乙卯也軍民聚哭城中皆縞素賊聞之亦泣曰楊公死吾屬無歸路矣未幾興平賊所過村聚多殺掠民仰天號曰楊公在豈使吾曹至是訃聞賜葬祭錄其子致爲國子生廣東民赴京請建祠許之成化中賜諡恭惠久之從選人盧從愿請命有司歲以其忌日祭

焉

張驥字仲德安化人永樂中舉於鄉入國學宣德初授御史出按江西慮囚福建有仁廉聲正統八年吏部尚書王直等應詔博舉廷臣公廉有學行者驥與焉遷大理右寺丞巡撫山東先是濟南設撫民官專撫流民後反爲民擾驥奏罷之俗遇旱輒伐新葬塚墓殘其肢體以爲旱所由致名曰打旱骨椿以驥言禁絕還朝進右少卿已命巡視濟寧至淮揚饑民驥立法捕蝗停不急務蠲逋發廩民賴以濟十三年冬巡撫浙江初慶元人葉宗留與麗水陳鑑胡聚衆盜福建寶豐諸銀礦已而羣盜自相殺遂爲亂九年七月福建參議竺淵往捕被執死宗留僭稱王時福建鄧茂七亦聚衆反勢甚張宗留鑑胡附之流剽浙江江西福建境上參議耿定僉事王晟及都督僉事陳榮指揮劉真都指揮吳剛龔禮永豐知縣鄧顛前後敗歿遂昌賊蘇牙俞伯遇剽蘭溪又與相應遠近震動驥至遣金華知府石瑁擊斬牙等撫定其餘黨而鑑胡方以爭忿殺宗留專其衆自稱大王國號太平建元泰定僞署將帥圍處川分掠武義松陽龍泉永康義烏東陽浦江諸縣未幾茂七死鑑胡勢孤驥命麗水丞丁寧率老人王世昌等齎榜入賊巢招之鑑胡遂偕其黨出降惟陶得二不就撫殺使者入山爲亂如故時十四年四月也驥旣招降鑑胡而別賊蘇配養等掠金華亦爲官軍所獲賊勢乃益衰其秋景帝嗣位召驥還卒於道驥所至咸有建樹山東兩浙

民久而思之鑑胡至京帝宥不誅更遇赦釋充留守衛軍也先入犯鑑胡乘間亡被獲伏誅竺淵奉化人
耿定和州人王晟鄆城人鄧驪樂昌人俱進士驪兵潰被執不屈死詔爲營葬淵等贈官錄一子

馬謹字守禮新樂人宣德二年進士事父母孝遭喪親負土以葬正統中以御史按浙江時修備倭海船
徵材于嚴衢諸郡謹恐軍士藉勢肆斬伐請禁飭之報可所至貪猾屏跡疏振台處靈紹四府饑吏部驗
封郎中缺人久帝令推擇會謹九載滿尙書郭璉薦謹廉直遂用之十年薦擢湖廣右布政使正統末湖
南叛苗掠靖州命謹同御史侯爵撫諭參將張善率兵繼之謹等至招數千人復業其出掠者擊敗之尋
與善破淇溪諸寨景泰初復與善大破臘婆諸洞已同參將李震擊破青龍渡馬楊山諸賊追奔至雞心
嶺先後斬首千四百有奇師還靖州賊復出掠搗其巢斬獲如前武岡城溪諸賊結廣西蠻據青肺山復
與震攻破之獲賊楊光拳等五百六十人斬首倍之扶城諸砦聞風款附謹出入行間三歲衝冒鋒鏑與
諸將同而運籌轉餉功尤多轉左布政使錄功進秩一等六年五月遷右副都御史仍支二品俸巡撫河
南撫流民三萬一千餘戶天順初廢巡撫官謹亦罷歸久之卒謹性廉介楊士奇嘗稱爲冰霜鐵石
程信字彥實其先休寧人洪武中戍河間因家焉信舉正統七年進士授吏科給事中景帝卽位薦起薛
瑄等三人也先犯京師信督軍守西城上言五事都督孫鏗擊也先失利欲入城信不納督軍從城上發

箭礮助之鏖戰益力也先遂却景泰元年請振畿輔饑民復河間學官生徒因用兵罷遣者皆報可進左給事中以天變上中興固本十事其言敬天則請帝敦孝友之實以答天心帝嘉納之明年二月出爲山東右參政督餉遼東巡撫寇深奏盜糧一石以上者死又置新斛視舊加大屬信鈎考信立碎之曰奈何納人於死深由是不悅信尋以憂去服闋起四川參政理松潘餉借侍郎羅綺破黑虎諸寨天順元年信入賀時方錄景泰間進言者特擢信太僕卿京衛馬舊多耗信定期徵之三營大將石亨孫鏗曹欽並以奪門功有寵庇諸武臣爲言太僕苛急請改隸兵部信言高皇帝令太僕馬數勿使人知若隸兵部馬登耗太僕不得聞脫有警馬不給誰任其咎帝是之乃隸太僕如故明年改左僉都御史巡撫遼東都指揮夏霖恣不法僉事胡鼎發其四十罪信以聞下霖錦衣獄門達言信不當代奏帝責令陳狀時寇深方掌都察院修前劾信徵下詔獄降南京太僕少卿五年召爲刑部右侍郎母憂歸成化元年起兵部尋轉左四川戎縣山都掌蠻數叛陷合江等九縣廷議發大軍討之以襄城伯李瑾充總兵官太監劉恆爲監督進信尙書提督軍務至永寧分道進都督芮成由戎縣巡撫貴州都御史陳宜參將吳經由芒部都指揮崔旻由普市冰腦南寧伯毛榮由李子關巡撫四川都御史汪浩參將宰用由渡船鋪左右遊擊將軍羅秉忠穆義由金鵝池而信與瑾居中節制轉戰六日破龍背豹尾諸寨七百五十餘明年至大壩焚寨

千四百五十前後斬首四千五百有奇俘獲無算按諸九姓不奉化者遷瀘州衛於渡船鋪增置關堡改大壩爲太平川長官司分山都掌地設官建治控制之帝降璽書嘉勞錄功進兼大理寺卿與白圭同涖兵部言官劾信上首功不實信四疏乞休不許信欲有爲而阻於圭不自得數稱疾六年春旱應詔言兵事宜更張者四兵弊宜申理者五大略言延綏兩廣歲遭劫掠宜擇大臣總制四方流民多聚荆襄宜早區畫京軍操練無法功次陞賞未當語多侵圭圭奏寢之改南京兵部參贊機務明年致仕踰年卒贈太子少保諡襄毅信有才力識大體征南蠻時制許便宜從事迄班師未嘗擅賞戮一人曰刑賞人主大柄也不得已而假之人幸而事集輒自專非人臣所宜在南京守備臣欲預錢穀訟獄事信曰守備重臣所以謹非常也若此乃有司職耳論者躋之子敏政見文苑傳

白圭字宗玉南宮人正統七年進士除御史監朱勇軍討兀良哈有功巡按山西辨疑獄百餘從車駕北征陷土木脫還景帝命往潯州募兵尋遷陝西按察副使擢浙江右布政使福建賊鄭懷冒流剽處州協諸將平之天順二年貴州東苗干把豬等僭號攻劫都勻諸處詔進右副都御史贊南和侯方瑛軍往討圭以谷種諸夷爲東苗羽翼先剿破百四十七砦遂會兵青崖復破四百七十餘砦乘勝攻六美山干把豬就擒諸苗震讐湖廣災就命圭巡撫四年召爲兵部右侍郎明年李來寇莊浪圭與都御史王竑贊都

督馮宗軍務分兵巡邊圭敗之固原州七年進工部尙書成化元年荆襄賊劉千斤等作亂敕撫寧伯朱永爲總兵官都督喜信鮑政爲左右參將中官唐慎林貴奉監之而以圭提督軍務發京軍及諸道兵會討千斤名通河南西華人縣門石狡猾重千斤通隻手舉之因以爲號正統中流民聚荆襄間通竄入爲妖言潛謀倡亂石龍者號石和尚聚眾剽掠通與共起兵僞稱漢王建元德勝流民從者四萬人圭等至南漳賊迎戰敗之乘勝逼其巢通奔壽陽謀走陝西圭遣兵扼其道通乃退保大市與苗龍合官軍又破之雁坪斬通子聰及其黨苗虎等賊退保後巖山據險下木石如雨諸軍四面攻圭往來督戰士皆蟻附登賊大敗擒通及其眾三千五百餘人獲賊子女萬一千有奇焚其廬舍夷險阻而還石龍與其黨劉長子等逸去轉掠四川連陷巫山大昌圭等分兵感之長子縛龍以降餘寇悉平錄功加圭太子少保增俸一級遭父憂葬畢視事三年改兵部尙書兼督十二團營六年阿羅出等駐牧河套陝西數被寇圭言鎮巡官偷肆宜治綏巡撫王銳鎮守太監秦剛繙兵官房能俱獲罪去圭乃議大舉搜河套發京兵及他鎮兵十萬屯延綏而以輸餉責河南山西陝西民不給則預徵明年賦於是內地騷然而前後所遣三大將朱永趙輔劉聚皆畏怯不任戰卒以無功十年卒官年五十六贈少傅諡恭敏圭性簡重公退卽閉閣臥請謁皆不得通在貴州時有憤中官虐而欲刺之者悞入圭所圭擁衾問之其人驚曰乃吾公耶卽自

列不殊仆於地圭呼燭起視傳以善藥遣之人服其量次子鉞字秉德進士及第授編修累官太子少保禮部尚書習典故以詞翰稱卒贈太子太保諡文裕

張瓚字宗器孝感人正統十三年進士授工部主事遷郎中歷知太原寧波二府有善政成化初市舶中官福往貪恣瓚禁戢其下住誣瓚於朝瓚遂列住罪住被責其黨多抵法大臣會薦遷廣東參政轉浙江左布政使十年冬以右副都御史巡撫四川播州致仕宣慰楊輝言所屬大壩干灣溪諸寨及重安長官司爲生苗竊據請王師進討詔瓚諭還侵地不服則征之瓚率兵討定請設安寧宣撫司卽授輝子友爲宣撫以鎮詔可賜敕獎勞以母老乞歸母已卒會松茂番寇邊詔起復視事先是僉事林璧言松茂曩爲大鎮都御史寇深侍郎羅綺嘗假便宜專制其地故有功今惟設兩參將以副使居中調度事權輕臨敵稟令制府千里請戰謀洩機緩未有能獲利者宜別置重臣彈壓或卽命瓚兼領專其責成十二年七月命瓚兼督松茂安綿建昌軍務瓚至軍審度形勢改大壩舊設副使於安綿而令副總兵堯或軍松潘參將孫壽軍威疊爲夾攻計乘間修河西舊路作浮梁治月城避偏橋棧道軍獲安行轉餉無阻十四年六月攻白草壩西坡禪定數大砦斬獲亡算徇茂州疊溪所過降附抵曲山三砦攻破之再討平白草壩餘寇先後破滅五十二砦賊魁撒哈等皆殲他一百五砦悉獻馬納款諸番盡平留兵戍要害增置墩堡乃

班師帝嘉其功徵拜戶部左侍郎辭歸終制十五年起左副都御史總督漕運兼巡撫江北諸府十八年歲大祲疏請振濟發銀五萬兩復救贖移淮安倉糧分振而贖已卒贖功名著西蜀其後撫蜀者如謝士元輩雖有名不及贖惟贖大千之役或言楊輝瀾愛庶長子友欲官之詐言生苗爲亂贖信而興師其功不無矯飾云謝士元字仲仁長樂人景泰五年進士授戶部主事督通州倉陳四弊屢與監倉宦官忤天順七年擢建昌知府地多盜爲軍將所庇士元以他事持軍將奸發輒得民懷券訟田宅士元叱曰僞也券今式而所訟乃二十年事民驚服訟爲衰止考滿進從三品俸治府事如故以憂去服闋起知廣信永豐有銀礦處州民盜發之聚數千人將士憚其驍曠不敢剿士元勒兵趨之賊遮刺士元傷左股裹創力戰獲其魁塞礦穴而還入覲改永平遭喪不赴服闋擢四川右參政進右布政使弘治元年就擢右副都御史巡撫其地土番大小娃者將煽亂士元託行邊馳詣其地賊恐羅拜道左徐慰遣之歲大祲流民趨就食士元振恤有方全活者數萬明年坐事下獄事白遂致仕

孔鏞字韶文長洲人景泰五年進士知都昌縣分戶九等以定役設倉水次便收斂民甚賴之以弟銘尙寧府郡主改知連山猺獞出沒鄰境縣民悉竄鏞往招之民驚走鏞炊飯民舍留錢償其直以去民乃漸知親鏞相率還鏞慰勞振恤俾復故業教以戰守道路漸通縣治遂復都御史葉盛征廣西以鏞從諸將

妄殺者鏞輒力爭所全活甚衆成化元年用葉盛等薦擢高州試知府前知府劉海以猺警閉城門自護鄉民避徭至者輒不納還爲猺所戕又疑民陰附賊輒戮之賊緣是激衆怒爲內應城遂陷鏞至開門納來者流亡日歸城不能容別淤城東北居之附郭多暴骸民以疫死復爲義塚瘞焉時賊屯境內者凡十餘部而其魁馮曉屯化州鄧公長屯茅峒屢招不就鏞一日單騎從二人直抵茅峒去城十里許道遇賊徒令還告曰我新太守也公長驟聞新守至亟呼其黨擐甲迎及見鏞坦易無駟從氣大沮鏞徐下馬入坐庭中公長率其徒弛甲羅拜鏞諭曰汝曹故良民迫凍餒耳前守欲兵汝吾今奉命爲汝父母汝我子也信我則送我歸賚汝粟帛不信則殺我卽大軍至無遺種矣公長猶豫其黨皆感悟泣下鏞曰餒矣當食我公長爲跪上酒饌既食曰日且暮當止宿夜解衣酣寢賊相顧駭服再宿而返見道旁裸而懸樹上者纍纍詢之皆諸生也命盡釋之公長遣數十騎擁還城中人望見皆大驚謂知府被執來給降也盡登陣鏞止騎城外獨與羸卒入取穀帛使載歸公長益感激遂焚其巢率黨數千人來降公長旣降諸賊次第納款惟曉恃險不服鏞選壯士二百人乘夜抵化州曉倉皇走匿獲其妻子以歸撫恤甚厚曉亦以五百人降已與僉事陶魯敗賊廖婆保他賊先後來犯多敗去境內大定上官交薦擢按察副使分巡高雷二府益招劇賊梁定侯大六鄧辛酉等給田產分處內地爲官備他盜廣西賊犯信宜岑溪皆擊敗之

治績聞賜誥命旌異遭喪服除改廣西猺獞闢鏞至悉遠遁十四年兵部上其功賚銀幣尋進按察使蒞
浦賊來寇總督朱英以兵屬鏞擊平之進食二品祿已遷左布政使旋以右副都御史巡撫貴州清平苗
苗阿溪者桀驁多智其養子阿賴尤有力橫行諸部中守臣皆納溪賂驕不可制鏞行部至清平詢得溪
所昵者二人遂以計擒溪磔之并討平雖背苗郡蠻震懾鏞居官廉歷仕三十餘年皆在邊陲觸瘴成疾
乞骸骨不許弘治二年召爲工部右侍郎道卒年六十三平樂李時敏者爲信宜知縣嘗與鏞共平猺亂
有功遷知化州粵人以孔李並稱

鄧廷瓚字宗器巴陵人景泰五年進士知瀘安縣有惠政丁母憂服除遷太僕寺丞貴州新設程番府地
在萬山中蠻獠雜居吏部難其人特擢廷瓚爲知府至則悉心規畫城郭衢巷學校壇廟廨舍以次興建
榜諭諸獠受約束政平令和巡撫陳儼上其治行帝令久任九載秩滿始遷山東左參政尋進右布政使
弘治二年以右副都御史巡撫貴州廷瓚自令至守淹常調者踰三十年至是去知府止三歲遂得開府
以生母憂歸服闋還原任都勻苗也富架長脚等作亂敕廷瓚提督軍務同湖廣總兵官顧溥貴州總兵
官王通等討之副使吳俦遣熟苗詐降富架誘令入寇伏兵擒其父子官軍乘勝連破百餘寨生繫長脚
以歸羣蠻震懼廷瓚言都勻清平舊設二衛九長官司其人皆世祿自用其法恣虐激變苗民亂四十餘

年今元兇就除非大更張不可請改爲府縣設流官與土官兼治庶可久安因上善後十一事帝悉從之遂設府一曰都勻州二曰獨山麻哈縣一曰清平苗患自此漸戢論功進右都御史八年召掌南京都察院事甫數月命提督兩廣軍務兼巡撫越二年進左廷瓚治尙簡易於吏事但總大綱結羣蠻以恩信不輕用兵而兵出必成功鬱林雲鑑大桂諸寨及四會饑民作亂以次討平兩廣遂無事十三年復召掌南院未行卒贈太子少保諡襄敏廷瓚有雅量待人不疑時多稱其長者至所設施動中機宜其在貴州平苗功爲尤偉云

王軾字用敬公安人天順八年進士授大理右評事遷右寺正錄囚四川平反百餘人擢四川副使歲凶請官銀十萬兩爲糴費以按嘉定同知盛崇仁贓罪被訐下吏事白還職改陝西弘治初擢四川按察使三年遷南京右僉都御史提督操江八年進右副都御史總理南京糧儲旋命巡撫貴州明年入爲大理卿詔與刑部裁定條例頒天下十三年拜南京戶部尙書尋命兼左副都御史督貴州軍務討普安賊婦米魯時鎮守中官楊友總兵官曹愷巡撫錢鉞共發兵討魯大敗於阿馬坡都指揮吳達被執普安幾陷友等請濟師乃以命軾軾未至而友等遣人招賊賊揚言欲降益擁衆攻圍普安安南衛城斷盤江道勢愈熾又乘間劫執友右布政使閻鉦按察使劉福都指揮李宗武郭仁史韜李雄吳達等死焉軾至以便

宜調廣西湖廣雲南四川官軍土兵八萬人合貴州兵分八道進使致仕都督王通將一軍十五年正月參將趙晟破六墜砦賊遁過盤江都指揮張泰等渡江追擊指揮劉懷等遂進解安南衛圍而愷通及都指揮李政亦各破賊砦賊還攻平夷衛及大河扼勒諸堡都御史陳金以雲南兵禦之賊遁歸馬尾籠寨官軍聚攻益急土官鳳英等格殺米魯餘黨遂平用兵凡五月破賊砦千餘斬首四千八百有奇俘獲一千二百捷聞帝大喜嘉勞召還京賜賚有加錄功加太子少保已改南京兵部參贊機務連乞致仕不允武宗立遇疾復請詔加太子太保賜敕乘傳歸卒贈太保諡襄簡

劉丙字文煥南雄知府實孫也成化末登進士選庶吉士改御史巡按雲南雲南諸司吏舊不得給由父滿子代丙請如例考入官流戍愈發必經兵部多淹延致死丙請屬之撫按土官無後者請錄其弟姪勿令妻妾冒冠服俱著爲例後督兩淮鹽課中官請引二萬爲織造費部議許之丙執不可得減四之三歷福建四川副使俱督學校三遷四川左布政使正德六年以右副都御史巡撫湖廣所部鎮溪千戶所掌子坪長官司與貴州銅仁四川酉陽梅桐諸土司犬牙相錯弘治中錯溪苗龍麻陽與銅仁苗龍童保聚衆攻剽土官李椿等竇縱之而篁子百夫長龍真與通謀後遂四出劫掠遠近騷然先後守臣莫能制丙將討之賊入連山深箐爲拒守討丙率師破其數寨賊走據天生崖及六龍山貴州巡撫沈林兵繼至連

攻破之前後擒童保等二百人斬首八百九十餘級都指揮潘勛又破鎮筓諸寨擒麻陽等百六十人斬首級如前餘賊遠遁璽書獎勵丙操履清介敢任事所至嚴明法令修舉遷工部右侍郎採木入山越二載犯風痹得疾卒詔贈尙書諡恭襄

贊曰英景間瓦剌逼西陲邊圉孔棘而黃蕭養葉宗留之徒劫掠嶺南浙閩境上其後荆襄流民嘯聚則以劉通石龍爲之魁他若都勻松茂黔楚諸苗徭叛者數起羅亨信侯璉諸人保固封圻誅馘禁亂討則有功撫則信著宣力封疆無忝厥任矣孔鏞以知府服叛徭其才力有過人者韓愈言柳中丞行事適機宜風采可畏愛不如是惡能以有爲哉

明史卷一百七十二終